

三原縣新志卷之六

知縣焦雲龍重修

邑人賀瑞麟編纂

人物志第六上

名臣 忠烈 勇略

稟山川靈異之氣被 朝廷棫樸之休固宜奇才偉士輝映一時易曰觀乎人文以化成天下諒哉原自有明以來若端毅若康僖若谿田若恭毅德業問學非後進之師耶十室之邑必有忠信豪傑之士無文猶興吾烏知今無振拔有爲而不以凡民自待者乎人顧視立志如何耳附列女女有士行扶綱常丈夫有弗若者馬谿田蓋嘗言之

名臣十九人

漢吉茂三國志常林傳注字叔暢馮翊池陽人世爲著姓好書不恥惡衣惡食而恥一物之不知建安初關中始平茂與扶風

三原縣新志 卷六上

蘇則共入武功南山隱處精思數載州舉茂才除臨汾令居官清靜吏民不忍欺轉武德侯庶子後爲武陵太守不之官轉鄧相以國省拜議郎黃初中病亡茂修行從少至長冬則被裘夏則袒褐行則步涉食則茨藿臣役妻子室如懸磬其或餽遺一不肯受雖不以高人亦心疾不義而貴且富者先時國家始制九品各使諸郡選置中正差敘自卿以下至於郎吏功德材行所任茂同郡護羌校尉王琰前數爲郡守不名爲清白而琰子嘉仕歷諸縣亦復爲通人嘉時還爲散騎郎馮翊郡移嘉爲中正嘉敘茂雖在上第而狀甚下云德優能少茂愠曰痛乎我効汝父子冠幘刳人耶

唐李靖唐書本傳字藥師三原人姿貌魁秀通書史仕隋爲殿內直長吏部尚書牛宏見之曰王佐才也高祖定京師秦王引

爲三衛從平王世充以功授開府蕭銑據江陵召靖安輯陳圖
銑十策詔拜行軍總管武德四年閩兵夔州時秋濤瀨漲靖曰
兵以速爲神今乘水傳壘震霆不及塞耳此必禽也銑降或請
籍銑將拒戰者家貲以賞軍靖曰王者之兵弔人而取有罪止
不籍乃度嶺至桂州酋領馮盎等皆來謁南方悉定授嶺南撫
慰大使檢校桂州總管輔公祐據丹陽反召靖入朝授方略東
討靖出不意率黃君漢等輕兵至丹陽公祐懼出走禽之丹陽
平置東南道行臺以爲行臺兵部尙書太宗踐阼授刑部尙書
兼檢校中書令突厥部種離畔帝方圖進取以爲定襄道行軍
總管率勁卒三千夜襲定襄破之進封代國頡利走保鐵山遣
使謝罪請舉國內附以靖爲總管往迎之靖謂副將張公謹曰
詔使到彼虜必自安簡萬騎自白道襲之必得所欲機不可失

三原縣新志

卷六上

二

韓信所以破齊也督兵疾進遇候邏皆俘以從乘霧行去其牙
七里乃覺部眾震潰頡利亡去於是斥地自陰山北至大漠遂
滅其國尋獲頡利可汗於別部落餘眾悉降遷尙書太僕射會
足疾乞骸骨授檢校就第頃之吐谷渾寇邊以爲西海道行軍
大總管決策深入大戰數十吐谷渾伏允自經死靖更請立大
甯王慕容順而還改衛國公進開府儀同三司薨年七十九贈
司徒諡曰景武按公所著書舊志載三十餘種然多不見今武
經七書有問對三卷子德謩嗣官至將作少匠坐善太子承乾
流嶺南以靖徙吳郡靖兄端字藥王以靖功襲永康公梓州刺
史靖弟客師右武衛將軍累戰功封丹陽郡公致仕居昆明池
善騎射喜馳獵雖老猶未衰年九十贈幽州都督

韓瑗唐書本傳字伯玉三原人少負氣節博學曉吏事貞觀中

以父仲良襲爵永徽三年遷黃門侍郎俄同中書門下三品監
修國史進侍中兼太子賓客王后之廢瑗雪泣極諫不納明日
復諫曰赫赫宗周褒姒滅之臣讀詩至此常輟卷歎息不意今
日親見此禍帝大怒詔引出褚遂良貶潭州都督明年瑗上言
曰昔微子既去殷是以亡張華不死晉不及亂陛下富有四海
安於清泰忽驅逐舊臣遂不省察乎帝愈不聽瑗憂憤自表歸
田里不報顯慶二年許敬宗李義甫奏瑗以桂州授遂良桂用
武地倚之謀不軌於是貶振州刺史踰年卒年五十四長孫無
忌死義甫等復奏瑗與通謀追削官爵籍其家神龍初武后遺
詔復官爵

李朝隱唐書本傳字光國三原人名法中第調臨汾尉擢大理
丞武三思構五王御史鄭愔請誅之朝隱以不經鞠實不宜輕

三原縣新志 卷六上

三

用法忤旨貶聞喜令遷吏部員外郎時政出權幸內授官但斜
封其狀付中書宣所司朝隱執罷千四百員遷長安令宦官閻
興貴有所干請曳去之睿宗嘉歎進大中大夫一階以旌剛烈
成安公主奪民園不酬直朝隱取主奴杖之由是權豪斂伏開
元初遷吏部侍郎銓敍明審久之降滑州刺史徙同州擢河南
尹政清嚴姦人不容息太子舅趙常奴怙勢橫閭里朝隱執而
榜辱之帝賜慰勉授岐州刺史召爲揚州都督府長史還爲大
理卿出爲嶺南採訪處置使卒於官贈吏部尚書諡曰貞

後唐任圜五代史本傳三原人明敏善談見者愛其容止李嗣
昭節度昭義辟圜觀察支使梁兵築夾城圍潞州嗣昭危甚問
圜去就計圜勸嗣昭壁守不可有二心已而莊宗破梁夾城聞
圜爲嗣昭畫計甚嘉之由是益知名嗣昭從莊宗敗梁兵於胡

柳園頗有功莊宗勞之曰儒士亦破敵耶仁者之勇何其壯也嗣昭討張文禮戰沒園代將其軍卒以信義降之拜工部尙書兼眞定尹北京副留守知留守事爲政有惠愛明年郭崇韜領成德軍節度使改園行軍司馬尋罷之魏王繼岌暨崇韜伐蜀辟園參魏王軍事蜀滅表園黔南節度使辭不就繼岌殺崇韜以園代將其軍而旋康延孝反園將三千人會董璋孟知祥等共擊敗延孝於漢州拜園同中書門下平章事兼判三司是時明宗新誅孔謙園選辟才俊抑絕僥倖公私給足天下便之與安重誨議當爲相者二人相惡園求罷職以太子太保致仕退居磁州朱守殷反重誨誣園與守殷連謀遣人矯制殺之園受命怡然聚族酣飲而死愍帝卽位贈園太傅

元郝天挺元史本傳字繼先英爽剛直有志略受業於元好問

三原縣新志

卷六上

四

以勲臣子世祖召見備宿衛春宮裕宗遇之厚屢遷拜中書右丞與宰相論事有不合輒面斥之成宗崩仁宗以太后命首定大難及武宗還自朔方遂入正大統定策之際天挺與有力焉仁宗臨御天挺與張閭等共議大改革尙書省之弊遂成皇慶之治又出爲江西河南二省右丞召拜御史中丞首陳紀綱之要以獵爲喻曰御史職在擊奸猶鷹揚焉禽之弱者易獲其力大者必借人力不然或有傷鷹之患矣帝嘉其言又疏陳七事曰惜名爵抑浮費止括田久任使論好事獎農務本厲學養士詔中書省舉行之尋拜河南省平章政事河南王卜憐吉歹爲丞相待以師禮由是政化大行卒年六十七贈光祿大夫中書平章政事柱國襲封冀國公諡文定按元史本居安肅州父和尚拔都魯多著武功爲河東行省五路軍民萬戶卒葬三原遂

家焉今按著有新齋集

明趙天泰表忠記建文元年以明經爲翰林編修壬午出亡之日天泰與焉時衣葛因自稱葛衣翁又號天肖子後老死於蜀韓詩贊曰河西傭葛衣翁負羊裘乞市中夜悲泣傷此衷謝主人死勿桐火埋我西北風

來恭谿田通志洪武中貢士拜御史擢僉都御史彈劾不避權貴有讒恭者高皇私幸其第見其妻績棉恭方荷鋤園中遂誅讒者而益重恭

李節谿田通志字文度永樂年以歲貢投給諫論事務存大體遷四川副使振肅風紀氣節凜然宣德間都督陳懷鎮四川擅作威福嘗置一簿列三司名銜令每日入謁次第作花字眾唯唯惟命節獨毅然不可袖簿出遂抗疏劾其不法數事召懷回京眾服其剛介尋陞按察使卒

三原縣新志

卷六上

五

段信谿田通志字宗實有氣節勤學強記正統丙辰進士觀政刑部出任杭州司李廉介不撓獄無寬滯擢御史巡按雲南纖塵不染滇人有詩曰擔頭不帶滇南物只插梅花到處香邑人勒碑名其里曰梅香復按南北直隸監軍口外所至風節著聞英宗朝北虜大舉入寇廷臣交推遷僉都出守紫荆關移守倒馬關極力捍禦邊境賴甯遷大理寺左寺丞

王恕明史本傳字宗貫號介菴正統十三年進士授大理左評事進左寺副條陳刑法不中者六事遷揚州知府天順四年超遷江西右布政使平贛寇憲宗嚴覈天下方面官黜河南布政使侯臣等十三人以恕代臣成化元年南陽荆襄流民亂擢恕撫治之會丁母憂詔奔喪兩月卽視事恕辭不許與尙書白圭

共平大盜移撫河南父憂服除總督河道浚湖修閘因災變請講求弭災策帝爲賜山東租一年畿輔亦多減免十二年雲南鎮守中官錢能貪恣甚大學士商輅等議改恕右都御史巡撫鎮壓初能遣指揮郭景遺安南王黎灝珍奇諸物灝遂欲通雲南道又交干崖孟密諸土官納金寶無算諸臣畏匿不奏恕遣騎執景景懼自殺因劾能私通外國罪且盡發能貪暴狀能大懼急屬貴近召恕還恕居雲南疏凡二十上直聲動天下遷兵部尙書嚴拒請託同事者咸不悅而錢能歸屢譖帝亦惡恕數直言命巡撫南畿舊制官田徵半租民田全免後民田歸豪右官田累貧民怨乃量減官田耗稍增之民田奏以常州羨米六萬石補夏稅又補他府戶口鹽鈔六百萬貫所部水災奏免秋糧六十餘萬石周行賑貸全活二百餘萬口二十年復改南京

兵部尙書時錢能亦守備南京語人曰王公天人也吾敬事而已恕坦懷待之能卒斂戢林俊下獄恕言佛至千餘寺費內帑數十萬此外也俊言當不宜罪帝不懌恕論列無少避先後應召陳言者二十一建白者三十九皆力阻權倖天下傾心慕之遇朝事有不可必曰王公胡不言也則又曰公疏且至矣已而果至時爲謠曰兩京十二部獨有一王恕於是貴近皆側目帝亦頗厭苦之會南京兵部侍郎馬顯乞罷忽附批落恕宮保致仕朝野大駭既歸名益高臺省推薦無虛月孝宗卽位廷臣薦召爲吏部尙書陝西缺巡撫恕推蕭楨詔別推恕執奏卒用楨言官多稱恕賢且老宜置內閣參大政帝曰朕用蹇義王直故事何必內閣也恕感激眷遇益以身任國事方以疾在告聞帝頗擢用宦官再執奏竟報許先是中外劾大學士劉吉者必薦

恕吉以是大憲合私人魏璋等共排之恕知志不得行連章求去帝輒慰留特免午朝遇大風雨雪早朝亦免徽王見沛乞歸德州田盧溝橋成中官李興乞進潘俊等官已修京城河橋興復請授四人官五人冠帶壽甯伯張巒請勳號誥券巒妹壻通政經歷高祿超遷本司參議御醫徐生超補院判中書舍人杜昌夤緣遷秩御醫王玉自陳乞進官已得旨恕皆力爭寢之是時劉吉罷印濬入閣亦與恕不相能太醫院判劉文泰往來濬所求遷官爲恕所沮銜甚恕里居日嘗屬人作傳濬謂其沽直謗君文泰乃訐恕傳中自比伊周以彰先帝拒諫無人臣禮恕以奏出濬指抗言臣傳作於成化二十年致仕在二十二年非有望於先帝也帝下文泰獄鞫之得實置濬不問恕力求去聽馳驛歸廷論以是不直濬及濬卒文泰往弔濬妻叱之出口以若故使相公齟王公負不義名何弔爲恕敷歷中外五十餘年剛正清嚴終始一致所引薦何喬新章懋等皆一時名臣賢才久廢者拔擢恐後宏治二十年間眾正盈朝職業修理號爲極盛者恕力也正德三年四月卒年九十三訃聞輟朝贈特進左柱國太師諡端毅五子十三孫多賢且顯

三原縣新志

卷六上

七

按公行事史已詳其大節但諸家所記尙多可傳今依張志附載於後陸廷枝說聽云成化丁酉王公巡撫雲南不挈僮僕惟行竈一竹食蘿一服無紗羅日給惟猪肉一勛乳豆一塊時菜一束醬醋水漿皆取主家結狀出示云欲攜家僮隨行恐致子民怨嗟是以單身自來意在潔己奉公豈肯縱人壞事人皆錄其詞而焚香禮之烟霞小說云王公鎮滇先是中官多不法乃百方冀悅之公不爲動政不使人者悉革之並翦其羽翼中人銜之公每出行部導從者十數人而止一曰公出中人令刺客雜其中將乘隙刺之公於馬上遽曰今從者何多一人因檢之得其懷刃客吐實因具爰書杖遣之中人聞之欲自殺公借三司謂之曰我所行之事不過爲民除害耳所罪之人不過爲公清惡耳與公何涉毋容過自疑也中人乃惶恐謝罪不敢別行非義而百姓安堵矣雷禮列傳記云中官王敬乘傳索奇玩恕言當此凶歲宜遣官

賑濟而乃橫求玩好耶上乃械敬下獄戮之哀談云韓魏
公聞更祖宗一法度壞祖宗一紀綱則終日不食富鄭公知
青州活飢民四十餘萬王公自淮揚以至撫南畿其所全活
以億萬計愛君憂國之心發於至誠故知無不言言無不盡
死生以之不法事沒其部下所得金寶輸之京師勳臣世師無
中官諸不法事沒其部下所得金寶輸之京師勳臣世師無
不斂戰所役官軍士民皆還部業使人至齋無敢索賄勢家
假驛傳運私貨者皆自雇役於是聲振遐邇西樵記云王
公為冢宰署於門曰宋人言受任於朝者以饒及門為恥受
任於外者以苞苴入都為羞今動曰贊儀而不羞於人我甯
不自恥哉一時帖然使非真誠積久而孚亦自不敢書之適
足以增多口矣獻徵錄云恕在吏部訪海內之士隨器薦
用以弼成宏治之治柴虎臣考古類編云恕在職裁抑僥
倖褒獎名節中貴無敢請謁即舊輔萬安輩有所軒輊亦
矚不輒撓王阮亭池北偶談云邱文莊公濬著世史正編
持論嚴正至其為相則逐三原王端毅公惡莊定山欲誅之
何其明於論古而闇於立身如此王弇州說部云客有問
明之大臣為誰曰不知也無己于忠肅之任王端毅之直劉
忠宣之篤乎又曰大臣者吾必以端毅為巨擘焉次則劉忠
宣也孜孜為國知無不言者端毅也孜孜為國知無不為者忠
宣也張志云經世編云王公羣經無所不涉獵尤熟於書
詩今考其耄而好學能識其大如啟聖宮雖定議於輔臣張
璉其說實倡於端毅闕里志云宏治元年吏部尚書王恕請
聖廟祀啟聖王以祀國公無繇萊蕪侯點泗水侯鯉洙國公

三原縣新志 卷六上

八

孟孫氏配享永年伯程响獻靖公朱松從祀非學有本原何
以及此今按公所著書有石渠意見四卷又一卷拾遺二卷
經籍格言三卷歷代名臣諫議一百二十
卷奏議十五卷文集十六卷詩集十四卷

承裕端毅公第七子也字天宇七歲能詩賦十五從莆田蕭公

學遂深造二十作太極動靜圖說為名卿傳誦成化丙午鄉舉

完婚自著婚禮用中呈父執而行之恕官吏部令日接賓客以

是周知天下賢才選用無不當宏治六年成進士時端毅致仕

即歸養正德間任兵垣出理山東河南屯田減登萊糧額三畝

徵一斗還青州彰德軍田先賜王府者三百六十餘頃武宗立

屢遷吏科都給事中會劉瑾專權羣臣多出其門裕獨遠之上

疏乞進君子退小人及諸不法事罰米輸塞上再遷太僕卿會

上於內殿教習武事乃預為之備一日將大閱降旨用戰馬五

萬裕即以應命大臣驚曰方旨下懼倉卒無備何處之裕如耶

抑此外尙有餘馬耶裕徐曰尙餘四萬耳咸歎服陞南京太常卿宸濠作亂欲趨南都裕分守通濟門有逆黨潛造甲兵藏郭內將應賊裕覺之按以極刑後賞功陞戶部右侍郎卻其舊用公堂銀千兩言官論禮部尙書席書賑濟事不明往勘功罪昭然帝手書公平正直褒之嘉靖六年爲南京戶部尙書奏准天下罪犯贖金俱納粟穀以備賑濟清釐私充官機匠四百餘名歲省糧四千八百餘石逋稅一百七十萬石積羨銀四萬八千餘兩在部三年致仕先是以進士歸養作宏道書院與羣弟子講理學闡宗旨受業者率多名儒卒年七十四謚康僖詳見明史及谿田通志今按著有論語蒙讀一卷論語近說一卷動靜圖說進修筆錄草堂語錄漫錄厚鄉錄宏道書院志考經堂集庚申集辛巳集星輶集諫垣奏草婚禮用中李衛公通纂刊橫渠遺書呂氏鄉約鄉儀等書 太極動靜圖說附 太極肇判乾坤攸位迺旋迺轉陰陽行焉由是生生化化萬物咸備而人生其中得元亨利貞之理爲仁義禮智之性理也者默默然無形可見無聲可聞然賦之於人非動乎其未賦之先蓋靜之謂也人之有性猶天之有理未感而見之於外徒深以存之於內則失其變化之機矣是故象勞兼樂所謂法天而不載者也象安兼壽所謂法地而不覆者也斯皆常人之爲若夫動靜以時無迂焉則與天地爲一矣嗚呼其聖人哉 進修筆錄摘附 只作一場話說 噫毋輕言如金石如四時可也 人稟天地之氣以生窮通固在乎命而亦在乎人爲且如一方地雖曰肥瘠苟不播之以種其穀必不能自生 聖人可學而至者也可

不敬乎 異端者吾道之蠹賊也 事無大小惟謹乃安 欲治天下當以求賢爲先務堯舜禹湯文武如無臯夔稷契伊傅周召則不能成其治矣 欲學聖賢之事業當學聖賢之出處出處不正雖有事業何足尙哉 人欲仰不愧俯不忤須要謹言慎行 人猶木也養之則成棟梁失養則爲薪蒸 人有廉恥則可不然則無所不至矣 心誠實故其言純粹心委曲故其言譎詐 苟欲齊家事上須要箇敬字馭下須要箇忍字君能納諫其國必治 觀人之發言如何則知人之存心如何詩云英英白雲露彼菅茅如何治民之人而使號寒啼飢者繼屬於道路耶 積金莫如積粟蓋粟可食而金不可食也世俗之人有譽人而曰此人似古人者吾嘗因是而思之亦嘗因是而怪之以爲所謂古人者但以其去世久爾然古人未必皆是仁義之人今人未必皆是無仁義之人豈可以此語而譽人哉 山必有麓無麓則崩河必有源無源則竭木必有根無根則枯惟人也亦然 文王能不顯亦臨無射亦保此所以爲聖人也 國雖安也讒臣一出未有不危家雖富也敗子一出未有不貧欲國久安者當屏讒臣欲家久富者當處敗子 大丈夫立身於天地間豈徒然哉其處也必欲爲一家人之儀型其出也必欲爲一國人之矜式而又欲德同天地名偕日月焉無私議人之是非無私議人之富貴不惟見自己之無恥抑且起其人之嫌疑 君臣父子人道之大倫也君雖非其君而臣事之不可以不忠父雖非其父而子事之不可以不孝二者之間各盡其道而已矣 心正則身正身正則萬事皆正矣是故正萬事莫如正身而正身又莫如正心也 呂望爲人儼然

喬松之參天也 賞罰者國家之大柄顧其中否何如爾 予
妄發一言日夜愧悚甯有窮乎 凡百事務皆當處之以誠風
俗偷矣天其濇之紀綱紊矣天其振之天理日昧矣天其明之
人欲日滋矣天其遏之不濇而不振不明而不遏吾將焉恃嗚
呼哀哉 麟生而羣獸異鳳出而眾鳥憎彼君子兮豈不亦猶
是乎 人一之一身惟心爲主心正則身正心不正則身亦不
正矣天下之大惟君爲主君治則天下治君不治則天下亦不
治矣 凡事只要熟 多見行當審多聞言當謹

張曉谿田通志字光曙孝子景之子也成化己丑進士令襄垣
多善政時有清水明鏡之歌擢監察御史民號泣攀留立祠巡
鹺長蘆兼理河道巡按四川所至汙吏有解綬去者上書論萬
貴妃事同列讀其詞皆縮舌上笞而釋之陞湖廣僉事施州夷

三原縣新志

卷六上

七

亂眾莫敢往曉請行曰此不可以兵加當以德動之至則宣朝
廷恩威亂者咸服遷河南副使河決於黃陵岡奉命督役工竣
晉按察使陳州有告毆死少年者三年莫能決曉閱屍圖驚曰
安有少年齒豁者乎訊之果捕得少年其屍乃一老乞嫗也事
遂白人稱神明以母憂歸卒今按著有靜菴存稿

原曉子也明史本傳字士元正德九年進士授吏科給事中疏
陳汰冗食慎工作禁貢獻明賞罰廣言路進德學六事中言天
下幅員萬里一舉事而計臣輒告匱民貧故也民何以貧守令
之哀斂中臣之貢獻爲之也比年軍需雜輸十倍前制皆取辦
守令守令假以自殖又十倍於上民旣困矣而貢獻者復巧立
名目爭新競異號曰孝順取於民者十百進於上者一二朝廷
何樂於此而受之人君馭下惟賞與罰邇者庸才廝養莫不封

侯腰玉或足不出門而受賞身不履陣而奏功禦敵者竟未沾恩覆軍者多至逃罪此士卒所由解體也疏入權倖惡之傳旨謫新添驛丞嘉靖初召復兵科仍加俸一級南甯伯毛良殺其子錦衣掌印指揮朱震等多違縱原先後論之皆奪職閒住帝進張鶴齡昌國公封陳萬言太和伯世襲授萬言子紹祖尙寶丞又以外戚蔣泰等五人爲錦衣千百戶原抗疏極言請行裁節未幾劾建昌侯張延齡強占民地定國公徐光祚子外戚玉田伯蔣輪昌化伯邵蕙家人擅作威福事雖不盡行權貴皆震懾進戶科右給事中以議大禮撼門哭再被杖創重卒貧不能歸葬久之都御史陳洪謨備陳原與毛玉裴紹宗王思王相胡瓊等妻子流離狀請恤於朝不許隆慶元年贈光祿少卿李志原在新添驛時學者爭負笈以從居八年日與從游之士講論經義不輟今按著有蛩鳴稿黃花集玉坡奏議

雒昂雒氏家乘字仲俛號三谷幼受業王康僖之門康僖每奇之謂馬理曰此子心純志篤他日光吾道者也嘉靖癸未進士授太常博士擢吏部給事中未三年疏凡數十奏劾都御史汪鏞迎合張璫黨奸害忠宮禁火乞修省世宗以羽士張鶚金贊仁陞太常少卿極言不可乞收成命直聲著聞出爲僉事歷河南布政使考陞河南巡撫奏議條陳期月間乃六十上徽藩不道服用僭越昂爲劾奏被逮廷杖斃闕下後徽藩事敗隆慶三年六月恤贈戶部侍郎賜祭葬今按著有望洋稿表忠錄

溫純明史本傳字景文嘉靖四十四年進士知壽光縣殲巨寇馬天保墾田勸耕決獄一本經術擢給事中隆慶三年穆宗旣禫除猶不與大臣接純請遵祖制延羣工決章奏屢遷兵科都

給事倭陷廣海衛總兵劉燾以戰卻聞純劾燾欺罔黔國公沐朝弼有罪詔許其子襲爵純言事未竟不當遽襲中官陳洪請封其父母純執不可言官李己石星獲譴疏救之趙貞吉更營制純以政令多門極陳不便遂復舊制俺答請貢市高拱定議許之純謂弛邊備非中國利出爲湖廣參政捐贖緩拒武崗王之行賄亂宗者遂乞歸萬歷初用薦起河南參議分部南陽約唐府無侵民徭賦境內輯甯人貳冏卿陟棘署晉光祿面規張江陵奪情之非忤意歸江陵沒起守舊官累擢巡撫兩浙改漕折減織造復陂池葺泮宮禁淫祀人情大悅入爲戶部左侍郎督倉場母憂去起南京吏部尙書召拜工部尙書父老乞養終喪召爲左都御史礦稅四出純極論其害不報諸閹益橫純等憂懼不知所出乃倡諸大臣伏闕泣請帝震怒問誰倡者對曰

都御史臣純帝爲霽威遣人慰諭曰疏且下乃退已而卒不行妖書四起大索長安疏言楚宗無反狀請會議而事始決御史于永清按陝西貪懼純舉奏與都給事中姚文蔚比而傾純純疏發永清交構狀語頗侵首輔沈一貫給事中陳治則鍾兆斗皆一貫私人先後劾純御史湯兆京不平疏斥其妄純求去章二十上杜門九閱月帝雅重純諭留之三十二年大計京朝官純與吏部侍郎楊時喬主之一貫所欲庇者兆斗及錢夢皋等皆在謫中疏入久之忽降旨切責仍留被察科道官而察疏仍不下純求去益力夢皋兆斗連章許純廷臣大駭爭劾夢皋等俱留中時喬稱純公忠清正南京給事中陳嘉訓等極論二人陰有所恃朋比作奸當亟斥之而聽純歸以全大臣之體帝予純致仕夢皋兆斗亦罷純清曰奉公五主南北考察澄汰悉當

肅百僚振風紀時稱名臣卒贈少保天啟初追謚恭毅今按著有學一堂文集三十卷二園詩集二園學集續集自省錄齊民要書

按恭毅公疏稿劉燾爲兩廣總督云總兵誤

雜遵明史雜于仁傳字道行涇陽籍三原人嘉靖中進士吏科都給事中神宗初卽位馮保竊權帝御殿保輒侍側遵言保一侍從之僕乃敢立天子寶座文武羣工拜天子耶抑拜中官耶欺陛下幼沖無禮至此遵乃大學士高拱門生保疑遵受拱指遂謀逐拱遵疏留中等劾兵部尙書譚綸因薦海瑞吏部尙書楊博稱綸才詆瑞迂滯疏遂寢頃之綸陪祀日壇咳不止御史景嵩韓必顯劾綸衰病張居正素善綸而馮保欲緣是爲遵罪因傳旨詰嵩必顯欲用何人代綸令會遵推舉遵等不敢俱貶三秩調外遵得浙江布政司照磨保敗屢遷光祿卿改右僉都

三原縣新志

卷六上

十四

御史巡撫四川罷歸卒今按著有諫垣奏議二卷

于仁遵長子也本傳字少經萬歷十一年進士歷知肥鄉清豐二縣有惠政入爲大理評事疏獻酒色財氣箴神宗震怒會歲暮留其疏十日明年正旦召見閣臣申時行等於毓德宮于于仁疏授之帝自辨甚悉將置之重典時行等委曲慰解見帝意不可回乃曰此疏不可發恐外人信以爲真願陛下曲賜優容臣等卽傳諭寺卿令于仁去位可也帝乃領之居數日于仁引疾遂斥爲民久之卒天啟初贈光祿少卿按李志云被廷杖削籍歸田與史不合今按著有代警編二卷閩史表譚國朝名臣品衡歷代人鑒

來復通志字陽伯萬歷中進士起家戶部主事陞郎中提學四川值奢酋亂後考核從寬士子頌之兵備揚州天啟七年秋日

巡鹽御史率僚屬爲魏闡建祠蠲吉上梁俟復至同拜未幾復一帆競渡眾拭目俟之不意別趨海州矣眾銜之尋闡敗得免於禍參藩大梁遷山西右布政司治兵雲中北虜邀賞數萬騎突至城下戎服登陴指揮戰守凡七日夜虜退惓惓借餉修戰司農告匱憂憤成疾卒於

知曰世之人稱其詩文畫奕

琴方脈諸絕技而不稱忠孝大節蓋不知公者也今按著有詩文集清源近稿留餘閱餘勞餘諸草

忠烈九人新增十二人

金楊達夫金史本傳字進卿太和三年進士有才幹召補省掾草奏章坐字誤降平涼府判官主簿鄆縣事一從簡易吏民樂之達夫亦愛其山水之勝因家焉日以詩酒自娛了無宦情會有詔徙民東入關達夫與眾行及韶避兵於州地之橫嶺爲遊騎所執將褫衣害之達夫挺然直立馬首略無所懼稍侵辱之卽大言曰我金國臣子旣爲汝所執不過一死忍裸袒以贖天日耶遂見殺兩山潛伏之民竊觀者皆相告曰若此好官異日祠之當作我橫嶺之神

三原縣新志

卷六上

五

明焦源清明史焦源溥傳附字湛一由進士歷官宣府巡撫七年秋坐萬全衛失守奪官謫戍久之釋還年七十李自成陷關中與從弟源溥同被執勒令輸金抗節不食七日死李志瑞王婚清力奏從儉率往例數十萬侈費朝端歎服督德州糧歷剔諸弊一塵不染備兵岢嵐邊烽告驚躬擐甲胄登陴受矢入關旬陞山東按察使力反魏璫冤獄遷山西左藩甫下車庫使嘗以利卽斃杖下撫宣府因忤監視宦寺王坤歸里自成執時加以嚴刑視之如飴人勸之食笑曰死有重於泰山客憐我而進

食吾何顏見祖宗於地下今按著有組織編雍勝略二書

源溥本傳字涵一萬歷四十一年進士歷知沙河濬二縣考最召爲御史熹宗嗣位移宮議起刑部尙書黃克纘請寬盜寶諸閹源溥折之曰光宗神宗元子也爲元子者爲忠則爲福藩者非忠孝端孝靖神宗后也爲二后者爲忠則爲李選侍者非忠貴妃三十年心事人誰不知張差持梃危在呼吸尙忍言哉況當先帝御極之初忽傳皇祖封后之命請封不得治容進矣張差之梃不中則投以女優之惑崔文昇之藥不速則促以李可灼之丸痛哉先帝欲諱言進御之事遂甘蒙不白之冤若竟置弗問不幾於忘父乎李選侍一宮人更非貴妃比如聖諭阻陛下於煖閣挾陛下以垂簾及凌虐聖母狀第可求曲宥前辜量從優典而移宮始未不可得而抹殺也盜寶諸閹不可得而寬

三原縣新志 卷六上 六

宥也若竟置諸閹弗問不幾於忘母乎疏上舉朝寒懼天啟二年夏歸服闋還朝出按真定諸府例轉鳳陽兵備副使時崔文昇出鎮淮西欲甘心源溥遂移疾歸崇正二年起故官分巡河東道遷甯武參政有平寇功就遷山西按察使七年擢右僉都御史巡撫大同時邊事日棘兵缺伍餉又乏歲荐饑民淘馬糞以食源溥請蠲賑增餉當事不能應踰年自劾求去遂罷歸十六年冬李自成陷關中與從兄源清同被執勒令輸金源溥瞑目大罵賊拔其舌支解之李志上嘗書名御屏以小焦呼之自成破關悲憤圖恢復不果被執欲投以三邊總督溥指賊罵曰爾爲賊我恨未殺汝我朝廷重臣有死無屈莫多語速殺我賊聞之一室三日夜罵益厲至嚼齒穿齦髭髻盡張賊令左右授筆書餉銀貸死溥曰瞎賊奴我安得有銀與賊且安得云餉乃

舉筆擊賊中面罵不絕口賊大怒令斷其舌遂磔於市今按著有逆旅集

喬巍通志字維嶽幼從馮少墟溫元知遊學間淹博踐履篤實待異母弟極友居繼母喪盡哀登萬歷進士授司農郎司餉山海關清慎勤勞轉參政出巡川南時奢安二寇畔平之以事左遷僉事尋擢山西冀甯道參政便道過里值逆闖踞西安徵索不少屈與表弟王伯達僕人王崇德同日被害時並稱之

黨還醇明史本傳字子眞天啟五年進士授休甯知縣有善政以父憂歸崇正二年服闋起官良鄉十二月 大清兵薄城督吏民乘城拒守或言縣小無兵盍避去還醇毅然曰吾守土吏也去將安之救兵不至力屈城破與教諭訓導典史驛丞並死焉事定父老覓還醇尸得之草間赤身面縛體被數鎗羣哭而斂之事聞贈光祿丞予祭葬有司建祠官其一子李志署中妾媵友僕死者一十二人

三原縣新志

卷六上

十七

張耀明史本傳字融我萬歷中舉人從學溫恭毅之門知聞喜縣慈惠撫民民爲立祠崇正初歷官貴州布政使張獻忠死其部將孫可望李定國等率眾奔貴州耀急言於巡撫請發兵民守禦巡撫以眾寡不敵難之俄賊眾奄至耀率家眾乘城拒擊城陷被執賊帥與耀皆秦人說之曰公若降當用爲相耀怒罵不屈執其妾媵忱之曰降則免一家死耀詈益甚賊殺之並其家屬十三人今按著有碩寬堂集枕流別集望日編釋今種輓

歌附

貴陽城崩誰登戰布政張公奮刀箭手提銀印血糢糊冒陣一呼天地變賊憐神勇欲降公泰山身擲鼎鑊中奮馬

一軍皆辟易舌如雷光不敢食大夫羞與賊同生妾媵歡然爭死敵願爲良臣安可得殺身成仁亦何益腐肉如山魂祖褐白

畫賊中猶盜擊

秦三輔通志字陸海萬歷戊午舉人令新城值吳橋兵變直政
新城三輔率眾守陴夜以繼日賊眾城破著衣冠北叩云臣力
竭矣惟有隕身以報陛下耳被刃而死

孫璜通志字用謙由歲貢仕鹽山教諭崇正癸未春 大清兵
至左右促璜與知縣同出走璜曰臨難苟免何以爲臣乃偕令
手劍臨城分陴拒守已而城陷璜遂自縊鹽山士民私諡曰忠
愍

石隆學古堂集字長卿號映昆文學朗弟也年舞象卽能作賦
騎劣馬一茶頃馳五十里挾弓抽矢如戲俎豆讀書十行俱下
尤精史傳家貧好施嘗周友人之急捐千金不顧也癸未成進
士憤時政擬上書爲權貴所遏賊入秦請由宣大阨險據居庸
爲上防河守太原爲中策若邊固關最下督師李建泰竟出下
策遂憤鬱成疾避地江南甲申五月聞北都陷痛哭數日不語
不食三日死湖口友人劉湘客經紀其喪今按著有春日詠懷
詩

三原縣新志 卷六上

十六

新增國朝張承諫字直庭性至孝繼母譖其妻於父父因不悅
遂出妻中道光辛丑進士由刑部主事陞員外郎素剛直事長
官不阿長官僕恃勢非禮輒笞之莅職勤敏或問之答曰吾欲
致力朝廷過爾優逸何以堪事記名御史 特旨簡放肇慶府
署肇羅道時粵匪入境當事堅不出兵承諫卽憤激率募勇拒
賊賊卻走窮追之會賊援大至承諫冒矢石血戰自卯至午身
受八鎗力竭死之事聞 賜卹時邑人楊聯捷從九銜在承諫
任所隨承諫帶勇德慶州莫村播植等處堵賊以眾寡不敵力
竭殞命亦經奏准議卹

余聞直庭死時當事議以貪功冒險不欲奏聞聞者從而和之夫謂直庭書生不諳兵機則可然其一死直可愧世之貪生畏事而不忠君父者此而可議則貪生畏事者反得爲賢耶向之封疆大吏聞變雉竄卒不免賊害視直庭何如哉韓昌黎書張中丞傳後謂小人之好議論不樂成人之美千古同一慨也當直庭省親復入京時筮之不吉或許以再筮直庭慨然曰不吉吾將終不行耶徒亂人意何爲然則直庭致力朝廷之志固已素定於中見危投命自問無憾人言豈足重輕哉

王襄字贊臣舉人軀幹短小而義憤勃然奉縣諭在鄉團練聞高陵回變卽率健兒百餘往禦賊眾潰死之同時死者八人而武官坊團首孫秉萬素入行伍性剛正有義氣箭傷二賊與解田等遇害襄僕杜魁以身護襄死尤慘襄事上蒙 給雲騎尉世職襲次完時恩騎尉世襲罔替

三原縣新志

卷六上

七

給雲騎尉

王金吾諸生素骯髒傲然自大不屑意人人亦不肯近然直爽無齷齪態回亂守北關西城發鎗中一賊死反受賊鉛丸不爲動賊攻益急卽又擲磚石厲聲謂賊曰王老子在此汝欲何爲已城陷賊出不意砍其背仆至死罵不絕口其日金吾母李氏弟金聲妻王氏弟生員金鼎在家悉殉難

王棻增生性慷慨帶勇守北關城賊來益眾乃歸家拜母曰兒不能顧家矣屬弟善事母卽出登陴嚴堵城陷猶巷戰不勝死王垠字友山歲貢生爲人坦白尙意氣賊破北關與其妻薛氏衣冠詣家廟焚香拜畢卽分左右對縊死其弟生員塤妻白氏守志二十餘年亦聞變投井時廩貢張樹衣冠同妻孫氏縊死

貢生王丙照同妻王氏及子張楹同妻呂氏及子皆投井死
劉瑩字玉山副貢生年七十餘言動不苟精研書理一字不肯
放過回賊至諭以義理禍福賊卽去旋一賊至又諭之竟直刺
瑩瑩大罵死之同里巨在寬張坦與瑩相友善皆七十餘寬亦
老貢生聞瑩遇害憤甚見賊輒罵不止賊刃傷之次日賊來問
誰罵我者一賊指寬棺曰在此乃啟棺刺腹斷其舌坦雅好士
類愛清潔嘗營將就園闢地窖居之聞變卽不逃賊退走哭瑩
及寬柩乃大悲曰我何爲獨生歸臥三日不食賊至罵曰豬賊
朝廷何負於爾而反乎誓不與汝共生速殺我遂被殺坦學憲
書吏

王巍字際唐舉人有孝行賊攻城急衣冠欲自決恐傷母心頃
之母赴水死巍亦赴水

三原縣新志

卷六上

三

李河清字廉堂舉人團練守城城危有人問計清曰讀一場書
豈其忘耶旋同妻趙氏仰藥死

張振剛字毅堂諸生有膽略遇事敢爲團練守村城誓必殺賊
賊攻村振剛登城樓發鎗斃賊賊怒火城門焚死同難者數十
餘人

岳震川武舉會試甫歸卽辦團分守河岸修堞牆公正勤勞送
糧涇陽遇賊戰死

朱炳壬戌回亂約鄉中精健百餘人守六吉堡屢挫賊鋒六月
三十七月初一兩日賊千餘人攻堡血鬪一日夜力竭被焚死
同時死難者四十八人

張潛字少文性豪爽輕財好義喜交遊弱冠補諸生以訓導改
捐同知分發甘肅會同治壬戌夏四月髮逆由南山竄陝旣東

颺回變作三原城內回民數百家洶洶蓄異謀高陵失守獲賊謀密告邑侯余公亟清內患時里俠宋成金募勇入殲之事定而外賊攻益急三關陷丞佐有逃者城紳亦多出走居民自焚火起城中益鼎沸余公失計欲自縊潛獨堅請登陴嬰守且馳白其姊胡礪鋒郎中母慨出五萬金固人心賓陽橋之捷卽賞外勇金三千兩由是城得無虞多潛策也當城急時有勸潛去者正色曰守先人祠廬如官守土且我策名雖在籍亦烏可去蓋有定識定力云以積勞邁疾逾年卒事上照同知軍營病故例 賜卹 贈知府銜並蔭一子州判軍興以來守城查門尤爲出力亦以積勞病故均經請卹者又有營兵姚德信生員劉需張玉瑄

嗚呼壬戌之變吾邑殉難人士蓋不可勝數矣若諸人者或

三原縣新志

卷六上

三

慷慨殺身或從容就義或積勞病故僅能詳其死事如此吾爲志必信而徵惜哉然使忠義之氣竟湮鬱而弗彰又奚可也故並錄其婦女死節之最著者於列女而餘則見雜記篇

勇略十人補一人新增二人

北周毛遐北史本傳字鴻遠曾祖天授定州刺史始昌子傳至遐四世不絕正光中蕭寶夤討關中諸賊以遐爲府長史寶夤敗還長安三輔騷擾遐因辭還北地與弟鴻賓聚鄉曲豪傑東西略地民羌多赴之共推鴻賓爲主旣而賊帥宿勤買奴自號京兆王遐與鴻賓縱兵追擊七柵皆平後寶夤構逆謀遐知之乃寄書與鴻賓索馬迎接復於馬祗柵建旗鼓以拒寶夤攻其將盧祖遷禽之詔授遐南幽州刺史又攻破其將侯終德寶夤將內外勢異輕騎走巴中孝武帝入關稍遷驃騎大將軍儀同

三司卒

鴻賓遐弟狀貌頗異昆季之中尤爲輕財好施及賊起與遐一守一戰後拜岐州刺史明帝以鴻賓兄弟所定處多乃改北地郡爲北雍州三原縣爲建忠郡以旌之後爾朱天光自關中還洛鴻賓領鄉中壯武二千人以從拜西兗州刺史羈寓倦游之輩四座常滿鴻賓資給衣食與己悉同轉南青州刺史未幾徵還孝武帝與齊神武有隙令鴻賓鎮潼關車駕西幸漿糗乏絕鴻賓奉獻酒食迎於稠桑武帝把其手曰寒松勁草所望於卿仍留守潼關

鴻顯遐乳母產也養爲弟因姓毛氏位散騎常侍勁悍多力後隨諸兄戰關多先鋒陷陣大統四年爲廣州刺史鎮東陽陷東魏卒俱見遐傳

唐劉宏基唐書本傳少以蔭補隋勳侍大業末從高祖攻下西河宋老生敗棄馬投塹宏基斬其首拜右光祿大夫師至蒲先濟河下馮翊爲渭北道大使命殷開山副之西徇扶風眾至六萬南渡渭次長安故城隋將衛文昇來拒時諸軍尙未至宏基最先勝高祖悅賜馬二千匹京師平功第一授右驍衛大將軍討薛舉戰淺水原八總管軍皆沒惟宏基一軍力戰矢盡爲賊拘帝以臨難不屈優護其家仁杲平始克歸官之如初劉武周犯太原從秦王屯柏壁以勁卒二千由隰州趨西河躡賊歸路賊銳甚宏基堅壁儲勇及宋金剛遯走率騎尾之介休與王合擊大破之累封任國公從擊劉黑闥還除并越將軍會突厥患邊督步騎萬人備塞自邠北東拒子午嶺西抵臨涇築障遮虜貞觀初李孝常等謀反坐與交除名歲餘起爲易州刺史復封

爵召授衛尉卿改封夔國公以老乞骸爲輔國大將軍太宗征遼召爲前軍大總管戰駐蹕有功累加封戶至千一百卒贈開府儀同三司并州都督陪葬昭陵圖形凌烟諡曰襄子仁貴襲封

元楊子江谿田通志元世祖攻襄陽不克子江用礮擊破其城取之官封便宜都元帥護國進義武莊公

仇敏谿田通志字好古甘肅行省照磨提舉都城所副使歷奉元路總管封南陽郡侯

明薛經字平遠號近峯幼好騎射神明孫吳兵法慨然以伏波自任西夏劉哮亂籌畫制勝報捷賜飛魚緋衣授鎮撫又授西安後衛統轄各屬倉旗屯糧軍籍雜務襲指揮免合族軍徭征火落赤真相台吉深入敵境火酋內向遂寢戈漢南茶賊叛用

三原縣新志 卷六上

三

計禽之授漢中守備轉調靖遠衛守備時邊患亟卻之遷四川都指揮僉事體統行事雲南土官阿克等入境截殺有功保奏擢四川行都指揮使司指揮張惟忠誣以罪姪大中力請昭雪以前功陞山海關參將卒於官補

溫編張志恭毅弟也修幹岳立爲諸生有聲庠序會甯夏變亂改從戎萬歷中守備漢南潔已奉公明而能斷郡邑有訟成就剖焉居鄉時恭毅建橋施粥築兩城修學宮早夜經營傾囊解衣以成之

國朝梁加琦通志字玉鉞安塞人籍三原成童時喜韜略及長技勇絕人順治元年由將材隨八固山攻取太原屢膺前鋒陝督孟喬芳奇其才薦授遊擊三年以姚黃張獻忠等殘蜀加琦駐略陽餽運川餉時糧董徵應招買河西一帶動以萬計加琦

會知縣王業泰請修倉廩百間以儲造船數百艘濟運蜀平晉副將十七年率兵攻川東擒斬偽總兵陳貴榮等康熙元年臺議設總統彈壓諸軍特授加琦全蜀勦撫總統八營總兵官管左都督事勦平山西逆寇五年攻取太昌賊袁宗第搗其巢撫降偽新化伯馮起鳳是年十二月攻殺逆黨萬餘於巫山賊首劉二虎自縊遂平晉秩一品恩蔭有加

來講李志順治己丑武進士授鄖撫旗鼓守備南漳賊發率偏師搗其穴賊解散復單騎諭降萬餘人賊再犯太和伏兵夜出斬首三百餘遷廣西梧州游擊

常日暄通志康熙十四年滇逆方熾慶陽土寇作亂犯涇陽三原攻馮家堡三晝夜將陷日暄同魏良佐蔣四等率鄉兵一十人往援殺賊數十賊撤圍合營並力衝殺日暄力戰鞭死渠

三原縣新志

卷六上

十五

魁並賊黨數人眾寡不敵十八人俱戰死馮堡獲全

新增王登福上王堡人有膽力善技勇同治二年二月二十六日與回賊遇於趙氏河側時從行者三十餘人而賊亦二十餘登福一人接仗左右格殺用矛如飛賊大驚卻走三十餘人卒皆脫免登福後以賊眾受傷未幾死

穆世文素能爲鄉人排難解紛皆呼爲老鄉約回亂率鄉人避寺坡地窰中獨守窰口賊至與鬪三日夜身受傷三十餘處賊卒不得窺得生者數百人復修文勝寨鄉人賴之世文死頌其德不忘

三原縣新志卷之六上終

三原縣新志卷之六

知縣焦雲龍重修

邑人賀瑞麟編纂

人物志第六中

賢能 隱逸

理學 孝義

文學 壽民

志士 方伎

質行

賢能八十四人新增五人

漢吉黃三國志常林傳注茂同產兄為長陵令是時科禁長吏擅去官而黃門司徒趙溫薨自以為故吏違科奔喪為司隸鍾繇所收

南宋吉翰南史本傳字休文初為龍驤將軍劉道憐參軍隨府轉征虜左軍參軍隨道憐北征廣固賜爵建城縣五等侯參宋武帝中軍軍事臨淮太守復為道憐驃騎中兵參軍從事中郎為將佐十餘年清謹勤正甚為武帝所知賞元嘉中歷位梁南秦二州刺史徙益州刺史加督在任著美績甚得方伯之體累遷徐州刺史假節監徐兗二州豫州梁郡諸軍事時有死罪囚典籤欲活之因收典籤付獄殺之原此囚生命自下畏服莫敢犯禁卒於官

唐韓仲良瑗父也唐書瑗傳武德初與定律令建言周律其屬三千秦漢後約為五百依古則繁請從寬簡以示維新於是採開皇律宜於時者定之終刑部尚書

路嗣恭唐書本傳字懿範始名劍客以世蔭為鄴尉席豫黜陟河朔表為蕭關令連徙神烏姑臧二縣考績為天下最明皇以為可嗣漢魯恭因賜名云轉渭南令主杜化東陽二驛時關畿用兵使人係道嗣恭儲具有素而民不擾後為郭子儀朔方節度留後大將孫守亮驕蹇不受制嗣恭因稱疾守亮至即殺之一軍皆震永泰三年檢校刑部尚書知省事出為江西觀察使

中國人民銀行總行編印
重慶新華書店發行

以善治財賦稱大歷八年嶺南將哥舒晃殺節度使五嶺大擾詔嗣恭兼嶺南節度使嗣恭募勇敢士八千人由開道出不意斬晃及支黨萬餘俚洞魁宿爲惡者皆族夷之拜東都留守卒應嗣恭長子恭傳字從眾初蔭著作郎貞元間出爲虔州刺史詔嗣父封鑿贛石梗嶮以通舟道德宗時李泌得君帝嘗曰誰與君有恩者朕能報之泌言嗣恭子應臣常愧其長者思有以報之帝曰善卽日加檢校屯田郎中服金紫累遷宣歙池觀察使封襄陽郡王李錡反應發鄉兵救湖常二州錡不能拔元和六年授左散騎常侍卒諡曰靖

恕嗣恭次子恭傳字體仁從嗣恭討哥舒晃授檢校工部員外郎得從便宜擢降將伊慎用之賊平恕功多累遷鄜坊宣歙觀察使以右散騎常侍致仕卒贈洪州都督

三原縣新志

卷六中

一

李令問靖孫也靖傳元帝爲臨淮王時雅與舊及卽位以協贊功遷殿中少監豫誅竇懷貞封宋國公進散騎常侍知尙食事恩待甚渥然未嘗輒干政後坐其子與回紇部酋承宗連婚貶撫州別駕卒

李彥芳靖五代孫靖傳太和中爲鳳翔司隸參軍家故藏高祖太宗賜靖詔數函上之皆太宗手墨文宗愛之不廢手其舊物悉留禁中又敕摹詔本還賜彥芳并束帛衣服權德輿嘗讀太宗手詔至流涕曰君臣之際乃爾耶

元竇復初歐陽元竇氏族譜序燕竇之裔內翰儀之派也爲人清慎簡諒德器深厚縉紳間以公輔期之嘗被選爲京少尹稍遷京大尹有惠政於燕燕人德之拜中書參議

郝佑天挺子也挺傳字君輔小字朶魯別台由宿衛補官仁宗

時拜殿中侍御史以正直著名大受知遇遷陝西行省參知政事拜陝西行御史臺侍御史

張徹明志字克禮由憲史任御史臺照磨歷雲南肅政廉訪使僉事屢遷浙江中書省左右司郎中所至著能聲

明杜棠谿田通志字善政儀度豐偉剛毅寡和博物洽聞尤善星遁風角之術由鄉薦任真定通判靖遠伯王驥征麓川從征有功賊平擢兵部職方郎中參贊戎政復調南京戶部所在得大體南部堂後樹忽冬花眾譽其瑞棠正色曰冬花春秋書異何瑞之有其剛正類如此性至孝母喪廬墓後爲雲南知府政績著聞致仕進三品卒年八十一

申春明志字時孟永樂中舉人授御史性孝友官二十年居憂省祭凡三至家致哀盡禮嘗按廣西山西所至有聲遷雲南澂江府知府卒於官

三原縣新志

卷六中

三

張鶴徹曾孫明志字九皋天資英敏襟度軒豁永樂中領鄉薦授行在戶部主事遷南京戶部員外郎景泰初知順德府歷任三載政平訟理致仕歸卒

梁澤谿田通志字汝霖家貧爲縣書公牘知縣莫謙奇其書遣入學舉成化戊子省元己丑登進士以庶吉士改御史巡按貴州山東所至左試諸生右斷疑獄剖決如流彈劾不避權貴貪污吏多解綬去爲怨家所奏謫茶陵令改華容值歲饑民賴其賑陞汝甯同知決疑伸冤擢懷慶知府禁戢鄭府軍校一郡凜然遷遼東苑馬寺卿浙江右參政總督糧儲所至除弊便民

張顛谿田通志字有孚通尙書永樂戊子舉人孝友有鄉行早與靖川馬尙賓爲友朝夕講學所得深純任四川慶符知縣公

廉爲民所戴

雒守一谿田通志字執中博學剛方莊重守禮宣德壬子鄉舉授廣昌壺關二邑訓導蔚州學正所至勤於訓誨俸廩外一不屑受歸休家貧饗殮不給罔事干謁終日偃臥而已子光溥字文淵廩膳生善書工詩與馬雲岩爲吟社友學士大夫無不以科第元魁期之士卒婦女咸知其名相詬者必曰汝是雒光溥然竟不第

申瓊通志字廷瓚天順己卯舉人任山東蒙陰令嘗集古昔孝順事實爲民講解又督治農器以溥耕鑿之利教養兼舉蒙人繪象祀之今按著有孝順事實

李濟節孫也谿田通志字傳舟宏治中拔貢入太學任芮城簿剛毅練達因民爲治九載轉本縣丞又九載芮人奏陞本縣知

三原縣新志

卷六中

四

縣改臨潁老少涕泣遮留時臨潁告訐風熾有頑民十餘氏脇制官長濟至悉下獄繩之法刁風頓息釐弊振弱諸廢俱起時許州守邵二泉行社倉法惟濟如式積貯萬斛後以疾歸囊篋蕭然溫自知志料濟在臨潁時拔任姓於門役中教之後任方面培植賈姓寒士後入相

李伸谿田通志字道甫善博誦少得後卒業王康僖乃究理務約宏治壬戌進士授臨汾知縣晉王府軍校肆橫殺人前令莫敢治伸至悉寘之法境內肅然擢御史巡紫荊等關時礦賊千餘作亂伸執首惡餘黨解散巡按江西激揚得體正德中守嘉興有巨室吞人產爲郡害伸廉得立定爰書有殺兄謀奪其官者獄久不決伸一訊而服民咸稱快歷四川副使初庭訓甚嚴故其學行政理多有可觀在江西時以王陽明爲友自謂深得

其學云

秦偉谿田通志字世觀爲諸生時與谿田講誠敬之學後遊太學偕谿田及呂涇野張西渠崔後渠馬柳泉寇涂水相約講學所得益遂登宏治乙丑進士授戶部主事督宣大邊餉監軍張永欲賞所私偉弗與永竟沮其事出守保定有中貴占民田廬偉執奏不法狀繫罪中貴斂跡遷山西參政令行禁止民但知有秦參政不知有撫按也分守平陽獄訟者爭歸之爲巡按所忘交劾以去今按著有西澗詩集

穆相谿田通志字伯寅正德辛巳進士授沂水知縣邑經兵燹民多流亡寬代輸及不急之征歸業者三千餘人刊藍田呂氏鄉約以禮化民兩遇大盜降之歲饑煮粥給食疾者藥之所活甚眾擢浙江道御史巡視東城權貴斂手敕巡三關築隘口四百五十七置器械三萬餘斷囚八百餘案巡按山西開沁水以通溝洫又疏清源太原渠招降青羊山巨盜復巡江西以勞成疾卒今按著有周易引蒙四書說義浮山奏稿巡歷行稿治沂

錄

王承祥端毅公第四子也來儼然撰墓碑字天瑞由舉人爲順天府倅憂去起補理民事再請告去起補理馬政濬河均賦考牧蕃盛擢都察院經歷以都御史薦遷貴州參議單車就道不以家隨未幾分守山西冀南覈賦役嚴防守禁左道悉當時要務再移河東駐蒲州伐巨石衛城以免黃河冲齧大盜誣朝邑良家獄且成極辨釋之或曰朝邑公鄉也甯不避嫌曰吾知有法耳曷知其他襄垣有兄弟俱顯貴者僭擬非倫門樹五楹綽楔命撤其二中貴守潼關數以私干皆拒不納中貴怒所以中

之然無可中也意沮而罷在晉十年聲籍甚會襄垣顯貴方用事遂罷歸

馬文玘谿田通志字玉之文雅莊謹任潁州訓導每黎明坐齋中課諸生業日入而退寒暑弗輟潁士興起多成名歐陽永叔裔之在潁聞其貧訪而周之遷甯晉教諭甯有二生久病或謂宜申御史黜名文玘弗聽惟調護之後瘳成通籍故其卒於官也弟子悉哀奠悲思焉

趙瀛通志字文海嘉靖己丑進士章邱知縣歲饑賑濟全活甚眾除兇緝盜以治行擢戶部郎出知嘉興府疏濬城河以其土運之南湖建煙雨樓時田多逋糧吏緣爲奸乃分田地山蕩二則賦額均平迄今賴之兵備易州多著邊功遷山東參政歸里囊篋蕭然今按著有小學史斷

三原縣新志 卷六中 六

咎如思李志字子學嘉靖中進士洪洞知縣寬徭省刑弔疾苦除積蠹後補章邱治績更茂擢御史分宜當權不附歸里今按著有吏隱堂集

任舜臣谿田通志字承華年十三爲諸生學官遣令就馬谿田學授之經輒解正德辛未進士選給事中疏將上有忌者遂改授長洲知縣在官廉明有聲爲縣丞所污乃懷恨成疾人咸惜之

雒遵道温自知志料嘉靖王子舉人諸城知縣諸故東南巨鎮賦繁役重俗囂民頑一以不擾治之邑患盜計擒盜魁朱虎境內帖然律身茹蘖飲冰一無所取邱月林負海內人望不輕許可乃以廉靜寡欲稱之後移肥城一如治諸

焦玆谿田通志字廷玉性巧嗜學志存忠義尤善書札由貢生

任鄢陵知縣勸課農桑均徭省刑有惠政陞順天推官獄無冤滯致仕終於家

來聘李志字安國嘉靖中進士以行人擢御史值朝廷議大禮受廷杖左遷丹陵知縣近邑虎啞人聘爲文告神虎伏就捕邑人異之謂不啻昌黎驅鱷魚也歷官四川按察使今按著有雲峯近稿

趙應元吳中行撰家傳字文宗涇陽人由三原籍登進士授華陽知縣次補郊縣奏績擢御史巡按湖廣張江陵柄國會有人貪肆不檢法當罷以恃江陵爲奧援莫敢誰何應元首論之去江陵銜之江陵假歸葬應元竣事還朝遇諸塗江陵私語曰先人事當借重應元正色曰御史以復命行無迴事反境之理輒謝去江陵益銜之行次汝南引疾乞休臺長希江陵指劾有所迴翔偃蹇始得遷南京大理寺丞命甫下而卒

三原縣新志卷六中 七

胡汝安溫自知志料字恭甫由進士授大理評事歷陞左寺正多所平反遷長沙府沿江修港以泊商船多方化導以息健訟河泊大使王巒被陷於王奇者四年而昭晰一旦罷吏劉易強占他人墳論罪還主豪民陳愚因均地斃死州官監生皮乙乾因謀姦踢殺孀母廣賄隱情諸莫能決者獨能決之上官薦揚人覲至衛輝聞父疾歸有懷故隙者喉南道論之遂罷尤孝事後母友於兄弟今按著有晴山集及樂府

李士達通志字伯順萬曆甲戌進士中牟知縣闢荒招流築隄鑿河奏最擢南京江西道御史疏發奸黨忤張江陵出爲四川僉事天全黎州永甯三土司亂平之遷敘州參議征叛賊有功

歷官山西布政使時番酋叵測朝議綏服改四川布政使管川東事單騎申命咸受約束以艱歸遂不復出

王紹先通志字伯生成甯人三原籍萬曆癸未進士工部主事監修潞王府省費巨萬忤奸璫陷之詔獄尋謫山東運判後主昌平糧儲糾劾奸璫再謫代州同知稍復南刑部員外郎歸閉戶讀書修輯陝乘

來儼然通志字望之萬曆乙未進士太和知縣躬行阡陌勸課農桑孝弟力田者表其閭戒飭士子蒸蒸向化期月邑大治移壽春尋調曲周直指爲上章請曰令固訟不罰鍰賦不染一文者也願無調因復任太和擢兵部職方司主事今按著有自愉堂集

王之鼎李志字玉鉉萬曆中舉人文安知縣潔已奉公以循良

三原縣新志 卷六中 八

擢工部主事出守夔州請減夔關稅務以甦商困時流寇猖獗多由秦入蜀議者欲盡誅秦人之商蜀地者鼎白直指驗明親給路引互七日夜全活數萬人

劉士璉通志字翼明萬曆庚子舉人父輔平績學力行以明經老璉少事繼母至孝天啓中擢司刑魏璫專恣璉獨抗拒不附崇正八年兵備達州有巨惡爲民害立斃杖下人快之流寇圍成都官民無策璉總理八門設法阨守危城以全敍首功晉本省方伯

周仕李志字汝信萬曆中進士鍾祥知縣力拒強璫歷兵部郎屢遷河南左轄所至有聲歸之日環堵蕭然

秦一鵬李志字搏所萬曆中進士南兵部武選司主事遷郎中兵備濟南尋參議河南復兵備曹濮值妖蓮作亂熄其黨地方

以靖遷霸州寢逆璫之祠司泉山東捐俸安遼兵之亂尋遷山西布政使奢酋逆亂出奇略一鼓授首歷任齊晉大梁口碑載道

李恆茂保安州志字環津舉人萬曆中保安知州廉明清正州民德之以績滿遷秩民挽留不釋至伏闕上書莅任凡七載建祠於州衙之西刻石紀德政後遷登州府知府

魏良槐通志字震明萬曆庚子舉人冠縣知縣清介自矢歲凶躬親施粥稚子來者卽於粥廠延師課讀割俸贖鬻妻女俾復完聚邑鮮科第擢節柴馬銀置田百畝穀千石資書院膏火冠人勒碑頌德遷蒲州牧饑饉之餘加徵遼餉良槐力除耗羨及胥隸侵漏民安之移平度州舊有仲哥集年荒無人盡心安撫復業萬餘人擢戶部廣西司郎中出守韶州府卒於官生平孝義飭躬明季寇掠倡義築堡城桑梓賴之

三原縣新志

卷六中

九

馬逢樂通志字時遇萬曆中舉人爲天雄判遷莒州牧值大饑捐俸以賑全活無算終遼州知州

張善治李志字平野萬曆中舉人幼隨父三極廬祖墓三年初仕郊縣知縣以治績擢戶部主事督德州倉除積弊輸餘糧召對賜晏褻以潔己奉公遷南康知府捐俸築紫陽堤河水安瀾逆闖亂隱迹林泉優游著述今按著有敦倫庸言

王家佐温自知志料字公輔萬曆中舉人中牟教諭遷交河知縣有惠政艱歸李自成破秦徵繫不屈知家無擔石放還遯跡蕭寺怡然終身

秦樂天李志字元一天啟中進士歷趙城南宮知縣人稱召杜兩邑祀名宦擢戶部主事出天津餉道因忤勳貴改四川參議

值逆闖變避僞聘不受卒

來臨復弟也通志字馭仲博學宏才能詩善書法選貢屯留知縣潔己奉公聲著循良遷登州府同知益多惠政剛腸勁節忤權貴掛官歸里優游著述今按著有御風閣集叢筆齋集十六卷其妻黃氏有玉香館遺詩

晉雲鶴海印樓集字鳴宇同弟雲鵬攻苦成名藩臬累年清修自好恥事權貴頗喜聲詩嘗與蜀太史黃昭素倡和尊崇前輩獎勵後進其天性也今按著有仙客集

馬子儀溫自知志料號冶溪逸其名以字行伯兄質樸不能生計弟喪明子儀帶經而讀由歲貢司訓禹庠歲饑以俸粟救濟貧者郡守金陵卜公甚異之因賑州民全活甚眾一時士庶皆重子儀之倡也後陞韓藩教授不仕與溫恭毅結耆英社卒年

三原縣新志 卷六中 十

八十五今按著有禹庠歸田二集

馬逢臬李志字千里萬曆癸丑進士弱冠有倜儻才廿一史盡讀之出知襄陵縣除富民供具驛遞養馬興學倡義建橋疏渠擢御史抗疏請正紀綱指斥梃擊紅丸及黑敕票提等事又力救楊漣以明移宮之案廣平陷發死事監軍高邦佐之寃劾熊廷弼不誅逃臣不恤忠節以誤國又劾御史劉廷元三不忠表提牢王之案發覺之功憂歸轉山東參議詔還復授御史上劾忠討賊疏京察降山西都事後授南吏部考功主事開河濟書院歸里築仁塢堡鄉人賴之今按著有西臺奏議畿南疏草四

吟稿

薛大中通志字允執萬曆庚戌進士甯陵知縣移太康改黃縣益勵清操運遼海米豆二萬有奇開聖水黃城龍灣田千頃

給諫陳六事抗疏言移宮紅丸槌擊論法諸事議論剴切以疾歸

秦熙李志字伯載崇正中進士濰縣知縣人感惠政盜賊避去性方嚴不爲阿諛

劉曰俊士璉子通志字虞臣崇正戊辰進士擢諫垣疏通水利捐金修渠數邑獲利疏裁三原偏稅累官密雲總督署有箭道歲額十三路總兵官供給銀二萬兩俊莅任盡歸兵餉奉詔嘉美歸田後值崇正十三年奇荒人相食曰俊施粥三月救活甚眾

常道立通志字還一萬曆中進士戶部主事歷員外郎服闋補兵部郎屢遷河南布政使晉巡撫時遭流寇屢立戰功降其渠魁因總理熊文燦主撫罣誤歸李自成入關不屈死之今按著

有撫豫奏疏

秦所式李志字懷生崇正中進士祥符知縣多惠政邑民圖像立祠調諸城紳士賦詩紀其績擢戶部主事歷河南巡撫流寇猖獗督師擒其渠魁劉超等械送京師上賜杯段笏馬

王健通志字大龍崇正中進士風格峻整動由禮節仕聊城知縣強幹清廉請改遼餉立折馬法以甦民困所在使之晉兵部職方主事甲申走揚州匿蹟餘杭山中今按著有經濟乙編

張守約張志字曰唯萬曆中舉人聞喜知縣母憂服闋補陽信稍遷沁州尋以宣府丞陞口北赤城道流寇充斥漸迫京師守約盡心守禦寇不敢逼偏師失利絕粒以終

房建極李志字秉中從溫恭毅馮少墟學崇正中進士新鄉知縣寇氛爲患屢出奇破賊再補安邱拂巡使者指左遷布政司

照磨尋擢兵部主事將之任會李自成破關中遂潛匿荒曠逆
闖執其子廷楨迫之卒不出嗣聞燕京陷北向稽首隕血臥土
室中未幾卒里人私諡曰貞靖

國朝李承尹通志字任伯崇正癸未進士督學三楚飲冰以拔
真才備兵沔上尤多惠政沔故有歲納官柴後業戶逃竄遺患
比鄰判田歸里永蠲其征城東有蓮池舊納魚課遺累網戶立
碑蠲稅一方以甯歸里侯于唐從學舉業遂獲聯捷清操碩學
邑人重之

王宏祚端毅六世從孫通志字玉銘雲南籍崇正間舉人官戶
部郎中督餉大同 國初擢岢嵐道復留大同理餉務內擢仍
官戶部郎是時天下甫定圖籍散逸宏祚精於典故善強記凡
直省州郡錢糧之數皆綜核無遺戶部特疏委修賦役全書書

三原縣新志 卷六中 十一

成加太僕少卿遷戶部左右侍郎晉尙書嘗疏謂欲安民生在
絕私派強兵勢在嚴冒餉至水旱災傷則捐恤宜早催科期會
則程限宜寬語皆剴切明暢順治十八年改刑部尙書復調戶
部適有議裁州縣存留及改漕糧官運爲民運者宏祚固爭之
始得寢補兵部尙書康熙九年乞休歸至金陵感疾卜居秦淮
之上卒諡端簡

王家楫李志字仙舟前庚辰進士順治乙酉授吳橋知縣下車
早虐爲文告神翼日大雨省催科勤撫字瀛海十七屬咸以爲
法擢禮部主事分校禮闈出爲江南屯田水利道遷汝南兵備
參議時兵燹慘目率守令日勞來輯之後忤臺使者解歸

劉培陽通志字敬錫順治乙酉舉人建德知縣劇盜李有嘯聚
剽劫培陽詣山麓繪形勢授主兵方略賊渠就擒次補南和澧

水橫溢沒田千餘畝乃築堤捍禦人稱爲劉公堤遷知壽州折獄如流民俗頓化因補賦註歸復補霑化多惠政今按著有學海樓集

楊在陞通志字臺卿順治中進士扶溝知縣地瘠民流在陞招集逃亡凡歸業者三年始算緡大盜張元錫白虎爲亂請於中丞擒而磔之在扶七年增賦七千石有奇擢戶部主事今按著有棲雲山房稿

李宏標通志字元文由選貢授永州州判洪經略特薦擢桂陽知州桂陽新遭兵燹標勞來安輯凋敝頓起時大兵進取滇黔轉輸不給標繪圖上陳請寬民力左遷去桂人祀名宦子彥瑁彥玟彥瑁字輯五康熙丁未進士值三藩變彥瑁爲圖大將軍參軍秦蜀平旋掌典籍未幾出爲肇慶丞尋守本郡撫綏釐剔

三原縣新志卷六中

十三

政聲大著服闋再知黃州府改萬緣菴爲啟聖祠重修文廟先儒祠像葺鼓樓以培文峯纂郡志以重文獻嚴訟師以安民卒祀黃州名宦彥玟字重五從學二曲李顒默契先儒宗旨每無事輒靜坐認取喜怒哀樂未發氣象母喪三年不飲酒食肉入內丁卯登賢書官中翰聞兄訃哀痛幾絕未數月卒彥瑁孫渢以例貢保舉攝裕州事時有墾荒增賦令力罷之後爲內黃知縣

蕭恆通志字月如順治壬辰進士授安福知縣邑田水衝沙壅多虛糧恆力請直指題減糧額千餘石至今賴之遷邛州知州侯于唐通志字廣明順治壬辰進士翰林院庶吉士擢御史終養後再起巡漕立條約十二錮弊悉除尋理兩淮鹺務禁私販絕耗費詔以敬慎剛方褒之居鄉重葺文廟廊廡築白渠堤通

水道邑賴其利今按著有舟署偶存燕臺集

樊咸敘李志字子功由副貢授中書舍人隨甯南靖寇大將軍征滇黔籌畫軍機屢建勳勞復隨五省經略征楚立功歷任廣西蒼梧道

梁鉉通志字子遠號仲琳與胞兄士駿幼號神童同領順治辛卯鄉薦鉉成進士選庶常屢上封事擢給事中直陳得失不避權貴掌兵科軍政絕公侯提鎮規禮門無私謁晉少司農三十載猶僦屋以居都下目爲窮官而不名有勸置田宅者引清白吏貽子孫語謝之喪母哀毀失明予告歸里尋卒生平善飲工詩屢見名家詩選子澁之澁之字震海由諸生爲湖口知縣俗有常規銀數萬兩供上官往來澁之曰非王章何爲規事不經何爲常吾不忍以民脂媚人急革去設鑼署門榜曰不平

三原縣新志 卷六中 十四

則鳴民無冤抑捐俸廣立義學歲旱詣城隍廟裸體暴烈日甘霖大沛再補富川邑轄獠獍積習業盜抗糧以兵捕之不馴至挾刃相拒澁之單騎冒險以義服之晉兵馬司指揮守東城歷光祿寺署正清操如一日以罍誤逮獄問官受囑欲誣之從子履中同甥李果率家屬鳴冤 行在尋蒙昭雪復職澁之字靜海履中父也別有傳見孝義今按鉉著有谷香齋詩集

按履中字敬堂諸生亦能詩與劉九畹善九畹稱其績學好古能世其德家徒壁立而歌聲出金石所謂道德博聞之士李光宸通志字君沃少有遠志逆藩變作制府哈公占重其才延之幕下會蒲城令以民叛告制府將屠之光宸以爲未叛按之果誣康熙十八年哈公與奮威將軍王進寶勇略將軍趙良棟謀分道取蜀議未決光宸進曰逆無能爲也湖南特下流地

今退屯衡州所用皆親屬猜嫌易起大兵乘之如拉朽耳進寶
良棟大奇之請令從軍入蜀舉爲廣元知縣廣元久經兵燹人
無固志有訛傳逆黨潭宏復叛者光宸戎服晝夜行城上語民
曰我縣令也賊來以身當之汝曹無恐人心始定先是保甯兵
餉悉由廣元陸運請於制府以舟運出昭化公私利之憂歸再
補金堂清白江灌溉諸邑年久渠壞視地勢開新渠其利如舊
秦琅李志字昆尤前己卯舉人順治己未進士夙稱博雅與浙
江八士戚价人等齊名性孝義有友以親喪謁領囊資之授刑
部主事遷郎中清正不阿數抗議讞獄平反得宜卒於官

來鑑續志字宜公年十四補邑弟子員以恩貢授廣東南雄府
經歷徵稅廉明遷湖廣嘉魚知縣催科撫字外文章風雅推重
一時歲餘以直道忤歸日與四方知名士往來倡和著有雲起

閣詩草十八卷

三原縣新志

卷六中

七

房廷楨建極長子李志字興公弱冠領賢書明季闖寇揆虐薦
紳廷楨代父見賊卒能全父名節順治己亥成進士授豐城知
縣著字豐實政一書膺最擢兵部主事遷刑部郎大司寇比之
于定國張釋之遷臺諫歷官僉都御史有柏府奏疏及文集
張大垣李志字紫臣順治中進士高淳知縣寬賦除弊舊有雜
徵胥吏乘採辦浮價飽橐大垣廉知一切屏除又爲民請臺使
得減漕費千餘兩陟新安郡丞改興化多所設施以勘荒勞瘁
卒於官

樊咸修李志字子章弱冠以尙書魁鄉薦丙辰成進士仕嘉興
知縣邑有漕糧向例藉供應名斂民財修力除之其巨室索窶
人負往往倍券以償小民凋敝多方經畫風移俗易薦擢給諫

言論悉中典要陟廷尉以無冤民爲任艱歸卒

來濬李志號梅岑國學生初任歸州州判境接荒徼土司恃險不戒郡民時罹慘虐濬親入峪洞陳利害示威德猺獞自是不敢入境剽掠郡有巨猾豔鄰女姿乘親迎時劫藏密室訶知之發奸召壻合卺後改祁州陟太原都閫經歷卒於官今按著有金石備考

王焯通志字仲發康熙庚戌進士直隸阜城知縣地雜旗屯民多影射首行均稅法俾豪無匿田田無匿稅更立徵輸十限民無逋賦境內帖然擢刑垣旋掌吏垣論事多達大體晉通政轉僉都陟太常卿皆著清聲尋乞歸

陳嘉績李志字顧青名醫堯道子也事親孝待諸弟恩義兼盡居鄉罔有忤於人康熙癸卯鄉薦初爲濬縣知縣邑戶丁絕女

三原縣新志 卷六中 十六

以錢應差爲盡除之運糧河道例征民植柳代莪萬株河干指爲甘棠繼知澄海忽洋賊以千餘刻期拔城獲閒設備宵分賊果大至城上矢石雨下賊奔潰邑中雞犬無驚擢御史奏革廣東總兵曠職劾江西蘭溪令貪酷疏薦甯羌知州劉棨清廉勤敏後棨歷官藩司終始未通聞問與法司決獄罪當夾糝者至暮散署方得釋刑嘉績令供實卽釋遷奉天府丞擢大理左卿未幾疾作歸囊橐蕭然年八十三卒子元善從善同善孫士義相繼登賢書

梁世勳加琦季子張志字廷庸號鶴汀由一品蔭生授奉天治中時有防禦滿兵暫借民房之議爲均多寡立保伍各有甯居無相凌雜擢刑部員外遷郎中出守永平除怙勢鳴張積爲民害之彭三救者踵至弗聽也有以貧悔婚者予之俸合卺公堂

在郡十年擢兩淮鹽運使移直隸巡道晉山東按察布政使所至有聲巡撫廣西修增文廟佾樂葺書院籌膏火再撫安慶地濱大江蜀楚狂瀾奔滙炎涼嘴尤礙行舟沉溺屢告世勳捐貲於郡城東關開秧草溝故道以殺江勢商民感悅內遷戶部侍郎屯田巴里坤率勵將弁墾荒決渠砂磧盡成沃壤尋以疾終子翥鴻歷官漕運總督

陳鴻猷張志字爾嘉康熙丁卯舉人安貧飭躬讀書之外他無所預秉鐸綏德日與諸生講解課藝不責束修士風聿變科第蔚然

溫儀張志字可象敦篤好學善書畫康熙癸巳進士御試春日早朝詩名列第二充書局纂修官雍正初試進賢知縣超擢保定知府安州姬璋殺族人姬朝楠以報父讐儀以孝思可取

三原縣新志 卷六中 十七

量從末減容城魏超因姦致死黃桂林妻孫氏邑令周松坐桂林誣告儀爲昭雪超伏法晉霸昌道尋改兵部郎歸里諸生從之受舉業務求瑰麗可喜原邑舉業之變自此始而科第日盛爲人坦率不立崖岸賢不肖皆樂近之年七十三卒今按著有棲賢錄燕游稿

陳同善張志字克怡由舉人爲崇安知縣武夷五曲有朱子講堂久圯捐俸繕葺蓋以重道興學爲先務也

王璞張志字林青勤學篤行康熙庚子副車肄業太學雍正初爲嘉禾知縣疾歸乾隆元年再補蒲圻有清節解組後行李蕭然紳士贈以數百金堅不受歸家授徒足不入市井亦不妄受年七十餘卒

楊玉生張志字雲章由吏員授浙江三江場大使遷嵯縣知縣

再補鎮海捐俸建鯤池書院置學田百畝知道州廉得蔣居鄉絕產久爲他人侵盜清釐田價並山場數十處建營道書院俗重聘金女有待年四十者爲立保甲法以覈之於是婚嫁及時以老歸

楊遵時張志字爾功進士辰溪知縣辰爲下邑歷來多收耗羨以資俸廉之不足遵時盡除之母喪服闋補太和值水災盡心賑濟親歷各鄉暮無止宿之所露處終夜以循聲擢知亳州製文廟樂器選俊秀百有八人延樂師教數月而成惻惻無華操守清介卒於官

來叔洙張志字聖瀾順治甲午副貢以教習爲雄縣知縣雄爲七省要區俗號難理叔洙催科有法敬老尊賢勸閭里孝弟力田集諸生執經問難文風蒸蔚建橋便行旅人稱來公橋云

三原縣新志

卷六中

十八

新增賈天培字因伯號益樓乾隆戊辰進士以知縣試用廣東時歲歉監糶香山等處有以美差賀者天培怫然曰萬口嗷嗷恨不得發太倉轉溝壑心滋戚矣公乃欲我腹諸孳耶故所監糶較諸官獨減價全活甚眾事訖歸父老牽羊酒爲送有泣下者制府百公奉命勦海寇以天培隨寇平敘功授英德知縣律身淡泊民無冤滯暇詣鄉校爲諸生講書遊田間訊農疾苦爲子弟親讀法民戴如父師未逾年卒於官貧不能歸柩英人斂錢助之泣送數十里天培工制藝有畚古堂文稿

王琛字錫之嘉慶癸酉舉人以大挑一等試用江蘇知縣署任甘泉宿案積五百餘數月釐剔一空緝私梟起獲鹽二十餘萬斤奏投寶應寶應地低窪清水勢高於黃舊設閘洩以利運天旱民田資灌溉田水足卽閉閘吏每拖延斂錢至害禾民甚苦

之琛偵知卽親歷督閉歲以登調補江甯水災請賑首捐俸以倡賑之日不假吏胥手民得實惠疫作施藥全活無算居恆布衣蔬食約以自處以勞卒於官

李建北字星菴號石農由庶常出宰山東平陰防堵教匪有功調補樂陵兩邑皆有漕運監督者累示之意索規費建北以必稟上憲乃敢予常峻拒之當道以居官清慎又奏陞東平州知州因長子喪請假解組建北爲人孝友初入翰林方與人飲酒忽聞父訃至自蜀仆地氣絕頃甦曰我天地一罪人卽束裝徒步徑走蜀扶柩歸葬與朝邑李時齋先生同年相好也先生爲撰墓銘云

曹擢新字蓉舫道光甲戌進士明敏精強保山知縣艱歸服闋補平谷奉文團練立保甲法並著兵法精旨上憲稱其才飭各屬遵行由是盜賊頓息平谷士風不振毀諸寺觀取其材創近光書院是歲卽有捷秋闈者調東安邑民刁惡至持鳥鎗傷人官役無敢捕擢新設方拿獲十餘匪戮之地方以靖所至斷獄如神案無留牘民不稱冤訟亦漸希人服其廉能謂之活閭羅又謂白面包公卒於官著有詩集

楊士果字育泉道光甲辰舉人咸豐癸丑大挑一等試用四川知縣素豪邁直樸尙氣節及赴官清白自矢不以家累自隨單騎就道一子一僕徒步相從時川中用兵士果幫辦糧臺憤調度失宜陳勦賊六策當事不能用署納谿屏一切陋規減浮費除盜賊納谿通雲貴山路崎嶇舊以九十里爲六十里驛站苦之爲改正鹽商構訟以數百金餽堅卻之歲餘呈誤解任制府廉得其情欲他委未幾卒不能歸鹽商以前惠賻百金子友機

以非父志亦卻之友機與弟友權皆諸生權尤有才早卒婦呂氏守節十年餘事姑甚孝姑卒數月亦卒以未符例不得旌附錄之

理學四人

陸稼書先生曰宋史特立道學傳以尊周程張朱猶司馬遷作世家以尊孔子後人自不必學蓋自儒林與道學分而世之儒者以爲道學之外別有一途可以自處雖自外於道猶不失爲儒遂有傲然自命爲儒詆毀道學而不顧者尊道學於儒林之上所以定儒之宗歸道學於儒林之內所以正儒之實有味哉其言乎提醒人心之功大矣然張志以通志不分道學儒林爲未審馬遷之儒林經師也故特列理學一門且稼書亦以宋史尊周程張朱遂創此例而谿田先生則吾邑之周程張朱也仍其日使人知所趨嚮而循是以進聖道庶幾可明卽於稼書之意亦不悖矣

三原縣新志

卷六中

二十

明馬理明史本傳字伯循號谿田同里王承裕作宏道書院講學理從之楊一清督學三秦見理與呂柟康海文大奇之曰康生之文章馬生呂生之經學皆天下士也宏治十一年以春秋魁鄉試再試禮闈未第游國學與柟及林慮馬卿榆次寇天敘安陽崔銑張士隆同縣秦偉交相切劘文章德義名震都下正德九年舉進士授吏部稽勳司主事改文選與郎中不合引疾歸居三年起考功司主事偕郎中張衍瑞等諫南巡被杖未幾復歸授徒講業嘉靖三年復薦起稽勳員外郎與郎中余寬等伏闕爭大禮下詔獄再予杖奪俸復職屢遷考功郎中故戶部郎中莊禪正德時首導劉瑾覈天下庫藏瑾敗落職至是奏辨

求復當路者屬理理力持不可寢其事五年大計外吏大學士
賈詠吏部廖紀以私憾欲去廣東副使魏枝河南副使蕭鳴鳳
陝西副使唐龍理力爭曰三人督學名著天下必欲去三人請
先去理乃止明年大計京官黜張璫桂萼黨吏部郎中彭澤璫
萼竟取旨留之遷理南京通政參議復謝病歸三年復薦起光
祿卿未幾告歸閱十年復起南京光祿卿尋引年致仕理自筮
仕至謝政無日不從事學問其學以居敬窮理爲主四方學徒
轉相授受縉紳士子下逮田夫野叟無不欣慕之雖四裔亦知
其名安南使至問吏部郎黃清曰遠聞馬道學名所願一見今
何不在仕列清曰馬公高尚朝廷不薄馬公馬公自高尚也高
麗使至亦問馬主事爲聖朝第一人宜加厚遇乞頒賜所爲文
使國人矜式其見重如此年八十三嘉靖三十四年關中地震

理與妻俱死穆宗立贈右副都御史賜祭葬天啓初追諡忠憲
馮從吾關學編先生好古儀禮時自習其節度至冠婚喪祭禮
則取司馬溫公朱文公與大明集禮折衷用之處父喪與嫡生
母之喪關中傳以爲訓乃其難進易退之節人尤以爲不可及
嘗曰身可繼道不可繼見行可之仕惟孔子能之下此者須自
揣分量可也崔銑稱其愛道甚於愛官當世以爲確論先生不
談佛老不觀非聖書初年介而毅方大以直至晚年則益恭而
和直諒而有容其執禮如橫渠其論學歸準於程朱然亦時與
諸儒異同蓋自有獨得之見云今按所著有四書註疏周易贊
義尙書疏義詩經刪義周禮註解春秋修義陝西通志詩文集
若干卷 語錄附 先生坐諸子侍乃教其斂容居敬頃曰如
此心中樂否曰然曰此邪念銷矣先生又曰必如此方有進步

存心如持權衡常在定盤星上稍錯便不低則昂把捉不定
因問門人曰顏子不違仁曉得渠下手處否曰不知先生曰
只爲此工夫便是 先生言方寸中常要整齊整齊便幹得事
人有周章者只爲方寸不整齊故也 先生言程子曰人能放
此一身公共在天地萬物中一般看有甚妨礙說甚有滋味予
嘗欲體之而未能也 江浦張公瑄以尙義致仕其長子衣裳
藍縷不能出門戶番陽童公軒以太常卿致政公服之外別無
褻服貨莊田以給衣食莊田又盡以賣藥爲生俱廉吏也 先
生偶被人侵侮不覺發怒己而悔之令良心誦王文正公喜怒
不見故事一條數過徐曰某學力端的全欠而今而後致不努
力 榮不足以驕辱不足以剉利不足以歆害不足以怵常不
足以肆變不足以驚方見學力 敬非只是閉門叉手靜坐要
在隨事謹恪做去若只閉門靜坐卽是禪學有體無用 自反
而縮曾子之學得其要也克己復禮顏子之學得其要也其視
篤信聖人者有本末內外之閒矣 先生言毋輕人禍之門毋
輕己實自棄 人不可恃其有恃其道德者與無者均也況恃
其富貴者哉 處事貴從容切不可急迫急迫中從容不害事
從容中急迫欲事之濟難矣 今人常將勢利在口頭動說某
人得某官卻能使人畏某人得某職有錢說得口津津 今之
學者有體無用只緣止讀得硬本子不會用身心工夫故別無
展拓遇事便周章莫措手處反被刀筆吏笑於戲吾儒果真有
體無用者哉但不能用力於身心之學故耳果能有用力於身
心之學者則天地可位萬物可育於天下國家何有乎 治天
下國家易治一己之私難已治而不及於天下國家者有矣已

不治而能治天下國家者未之有也 先生語門人曰凡富貴
功名在外者切不可入於方寸在我者服膺而勿失可也 或有
言其人不可與處者先生曰人皆有長苟取其長畧其餘則但
見其可愛不見其可憎人無有不可與處者矣 佩問求放心
爲學問之要如何曰心不可斯須放且如讀書一事稍放心便
記不得收入腔子來卻記得讀書且然況天下之事乎 悅問
吾弗能已矣是如何曰言不知遵道則已知則如行者之赴家
不至於家不已也如食者之求飽不至於飽不已也 悅問孔
子嘗不忘於天下觀其擊磬於衛常夢周公如有用我吾爲東
周欲接楚狂使子路告隱者其用世之意如此中庸言遯世不
見知而不悔正吾夫子之事何謂也曰遯世不悔此是聖人之
體其他欲用世處都是聖人之用惟其有體故能有用二者並
行而不相悖者也又曰遯世不悔是不怨不尤潛龍之德也其
他欲用世處是欲爲見龍而未能也有龍之德然後可見故夫
子皇皇於用世亦不爲過若他人便是學至於穀 世祿問何
如斯可謂之好人先生曰學會子之三省體顏子之四勿行有
不得當如孟子之三反雖不及人不爲憂矣 昂問康誥曰如
保赤子曰如保赤子一節通言孝弟慈皆在於誠也 上羅整
菴先生書附 續得答人語良知書二篇先貴鄉學者傳其師
說如此理嘗辭以闕之不意尊意正如是也夫良知者卽孩提
之童良心所發不慮而知者也與夫隱微之獨知異矣與夫格
致之後知至則又異矣其師曰此知則彼知也又以中途有悟
如夢斯覺爲言此真曹溪餘裔其師如此徒可知矣乃又以其
所見非程朱之學夫程朱釋經之言自今觀之千百言中似亦

有一二誤處然語其體認宗旨之真持守斯道之正續孔孟既墜之緒關佛老似是之非則千古不可泯滅可遽輕議之哉今乃往往是陸非朱又復陰主僧說排吾儒焉於戲此亦欺人自欺已也昔唐虞之時深聖讒說恐驚我師故侯明撻記書識工颺若驅洪水猛獸不敢緩也及周末老莊氏出讒慝又作賴孔孟相繼明道彼如螢火在晝無能輝焉自漢以來又增佛教孔孟不作二氏遂熾由是迄于宋世唯讒慝是崇雖人主宰相鮮有不宗師焉者天下之災視諸洪水猛獸害人尤甚幸而茂叔輩二三君子迭作極力闡闢吾道復明至今三尺童子通句讀者無不排斥二氏知趨向焉非斯人之功而誰功嗚呼辨苗莠而鋤之以粒食後人良亦勞矣今乃復拾鋤去之莠播而種之以亂我苗其亦不知唐虞之政孔孟之教斯人之功矣夫其亦不知斯害之大矣夫我夫子辭而闢之良是良是使微夫子言愚聞之亦潛有說也不盡不盡

三原縣新志 卷六中

西

谿田先生諸書多失存者惟文集語錄尤罕見今從馮少墟關中四先生要語鈔附如右雖止二十餘條亦可見先生學問之一端學者所當熟讀而深玩之也語錄諸家志多不載然鄧潛谷函史有之陸稼書靈壽志有之蓋有德之言簡切明白尤足爲學者修己治人之準做其例載之知道君子亦或有取於此

又按張志有曰黃梨洲明儒學案關中理學長安馮從吾渭南薛敬之高陵呂柟蘭州段

堅三原王恕子承裕及馬理七人熊愚齋學統持論最嚴止列呂馬於附統五人不與焉

周廷谿田通志字公所總角時語吃而煩及遊巖峩精舍聞平心定氣之訓久之乃厚重言有序不吃其善變化氣質如此尤發憤懣學冬月以麥草煖足讀書遂博通經史中嘉靖戊子鄉

試爲仲兄紹鳴訴誣枉人命時夏月逐日行百里雖屈辱勞苦若不自知者及兄病在獄卽入獄供侍湯藥兄賴以痊事亦得白長安生黃甲爲異端學來精舍師命廷與居而化之甲不以粒米自隨廷炊熟與食食已甲乃端坐如泥塑人月餘未嘗交一言廷亦終未忍絕也其忠厚如此後入太學卒

皆如心谿田通志字子推廩膳生性穎悟讀書能悟人所不到處厭科舉之學慨然有求道志嘗衣冠危坐整飭身心言動酬應悉遵道義年二十九卒如心資性剛介往來衢巷未嘗與鄉人立談若將浼之者課弟如思讀書雖舉於鄉猶夏楚之俗士譎而譁確然自執未嘗摧沮庶幾立矣今按所著有咎氏春秋敬齋集

溫子知通志字无知恭毅公長子少穎異授書輒成誦暇則整

衿坐不嬉戲既長攻制舉義入燕秦棘闈三中副車乃專精經義務學益力案頭恆置程朱語錄以恩胄進南雍執經於焦太史竑欣然有會以克己毋自欺爲鵠不欲驚於高遠清虛也馮少墟開關中書院講學遠近從者甚眾獨契子知延之斯道中天閣商性命之業恭毅建石梁築學宮修城施粥竭力贊成教兩弟日知自知有名當世疾革執弟子曰朝聞道夕死可矣卒祀正學書院以子瓊贈戶部郎今按子知著有无知子集乾坤正氣書

道必有理無理卽非道學以窮理爲先而世或詬病理學是必使人人無理人人不學而後可抑必學其非理之學而後可關學自橫渠後在明惟高陵呂涇野爲最著而谿田則媿美涇野今去谿田三百年於茲矣獨無人焉起而繼其響豈

不重可悲哉夫聖賢教人以義理之學無非欲人知性分之固有盡職分之當爲惟其理之是而已非求有異於人而爲之也然理自生而已具學必講而後明講學始孔子學之不講孔子憂之而今以爲恥張蘿谷曰恥講學恐他日可恥者當大有在也又曰或謂非惡講學惡講學而僞者僞誠宜惡然惡必其人夫彼僞爲君子不猶愈於眞爲小人而無忌憚者乎衡以眞僞之辨亦可爽然自失矣

文學二十七人新增八人

唐林寶明舊志太常博士元和朔方別帥閻某者封邑太原以官非本郡上謂宰相李吉甫曰有司之誤不可再也宜使儒生條其源系攷其郡望子孫職任並總輯之每加爵則令閱視吉甫命寶撰元和姓纂十卷二十旬而成

三原縣新志 卷六中

三

明張淵谿田通志字本深長身美髯穎敏篤實見者懽然起敬早遊邑庠甘淡泊善楷書洞究周易爲文清拔有氣貢入太學成化末授廣平經歷非其義一介不取人餽帛值其出家人受之歸悉其故明日還其人僚長待如賓友廣人德之官滿復保留在官十三年告歸其操履端慎如初門人王康僖尊稱爲頤壽先生子楠字直大忠信孝友童時父病楠號泣籲天祈減年以壽父尋愈府守王衡稱曰孝童爲廩膳生善書凡一時碑記及王端毅康僖所撰文皆其所書云

雷鳴谿田通志字大震由貢生任四川芒部軍民大同二府同知博學多能卜筮陰陽醫書皆誦習精熟爲舉子業恆不屬草試嘗冠多士選日吏部考亦首冠年七十致仕歸讀書猶二鼓始寢

馬尚賓韓苑洛集名貴以字行生而穎敏祖母徐教之學卽奉書晝夜讀能盡識大義及長祖母語曰吾聞汝外曾王父云道在中庸尚賓遂專心中庸時處士師敏深於中庸因與研極其理吉士解栖霞嘗就問退而歎服永樂中詔求遺逸有司以應不就尚賓用周易六壬皇極諸書占事知來皆奇驗說者謂當與君平堯夫并傳今案著有周易雜占中庸講義靖川語錄靖川集

江尚賓子雍大記字文淵博學好古事親重禮隱居教授呂涇

野柁撰墓碑曰雲巖先生得君子之道九焉其細者勿論也曾

祖毅齋名彥真力舉牲武筆家丁村厥祖抑菴仲良割田拯貧德來

野鴿父氏靖川博學篤孝齊名師敏杜棠不就辟舉公繩厥武

隱居讀書不殞家聲上事靖川鉅細中禮有所承受罔弗誦習

三原縣新志 卷六中

七

既其效也言稱行稽老而不替馬氏之緒爰茲有光可謂得子

道矣躬煮稻粥以養湧病伯兄湧遺子女予有室家可謂

得弟道矣河既蚤卒季弟河老而猶念收鞠馬瑩從弟瑩爰有居處

可謂得兄道矣舉先人草莖學書及已燃薪誦讀谿田嘗誨諸子日昔元亂

人莫敢學先君時以草莖畫地學書先王母懼禍輒沒其迹以誨璠理珊瑚理早聞道未有

爵秩著名朝野可謂得父道矣教學不倦興之以詩肄之以禮

博之以經史約之以小學大學論語孝經先後弟子數以千計

邦伯州牧亦出其門可謂得師道矣糾合耆俊共舉鄉約剖決

里訟人無後言丁村之俗宛若膠庠可謂得處鄉之道矣數化

盜賊艾爲良民可謂得禦暴客之道矣貫穿百家受命如響賦

詩豪敏每驚座客凡所註釋多關日用可謂得遊藝之道矣年

既耄童顏兒齒步履登降未嘗馮杖屬續之刻尤能前知革病

曰今夕亥分兩可謂得養身之道矣是固不可泯焉而弗銘也
吾殆去矣果然銘曰雲巖先生壽且德沒而葬之巖巖側今按著有小學論語
直解遵述錄通鑑節畧閒稿浩然子竹園近草

張伋焦源溥撰墓誌字逸穉號勉齋諫議原之孫也性端嚴孤
介白矢家無擔石不以動念子夜篝燈書聲動四壁督學許敬
菴深器之謂決科如拾芥而守棘闈者五竟不得一上公車自
是品益高避不入富有力者之門閒出其不可遏抑之奇於筆
端直追鍾王求者填門溢戶乃遜之廣陵持縑素者踵相接也
復遷之西泠或更踪跡之於是閒道歸海印樓集同時有張光
先者字玉芝清修自好少爲先聖像虔奉而心師之習雲麾將
軍書得其神妙凡碑版殿額題柱非伋卽光先得其尺幅爭相
寶重光先持身不苟與張伋並峙其出處同其壽考近耄期亦
同伋有子富光先無子溫自知曰白太傅司馬溫公均無後也
於今爲烈矣

三原縣新志

卷六中

天

溫日知通志字與恕恭毅仲子也萬厯中舉人潛心墳典文詞
古雅性至孝事母朝夕唯謹凡事必請少有誤輒長跽受教出
八里閘遇長者則執弟子誼少則進而教之論詩謂太合則成
尋常套子致來徐袁之厭惡然太離則晦詭失之牛鬼蛇神矣
徐袁卽不艱澁氣味薄甚每欲參厚薄離合之中自成一家言
論文格必欲創故神奇歸於腐臭語必欲翻故腐臭復爲神奇
士林以爲名言今按所著有嶼浮閣詩文集藝園圖詠瓠中飲
雅綢繆急著藪澤集

陽春芳李志字伯盛萬厯恩貢端嚴持重勵志濂洛關閩之學
爲博興縣訓轉洛川厯鎮番諭所至樂道敦仁諸生企仰之

溫淵知李志字元肆號笑園與弟溥知皆諸生工詩文砥節義
一時詞場伯仲推壇坫焉今按淵知著笑園編年集溥知著鏤
心集

國朝溫自知張志字與亨恭毅季子也十歲喪父一慟幾絕十
九爲博士弟子員提學賞其夏聲賦來陽伯趙子函郭引伯諸
名流咸推重入太學與黃思白程端伯輩相善西遊朝那總督
楊鶴延爲上客欲以軍功上太常堅辭庚辛之交大禩捐錢穀
活人無算製二廣柳車掩骼數千壬午焚韋杜田券惟義所在
畢力赴之逆闖陷關中榜掠諸紳士籍民財自知亦與焉是時
闖踞秦府逮者至親鞠於堂上眾謂不免韓詩作與亨繫獄詩
憂之及進見對以先人宦資盡於龍橋言甫畢有朱衣金幘侍
闖右者厲聲曰知爾貧可卽甯家旣出詢知朱衣者安定張國
紳也時爲僞政府尙書其初落魄自知曾調之故脫於難康熙
元年知縣林遜開志館延自知纂修稿未及半而卒河濱李楷
私謚孝靖先生今按所著有穫音及續集遺集代集海印樓文
集諸遊草三原志料海印樓龍橋各志

岳映斗李志字筐六崇正癸未進士幼師溫恭毅執經於无知
夙稱博通築園谷口楊杜之間風景最勝與遠近士課業其中
間寄託詩歌順治乙酉授庶常分校戊閏拔知名士甚多以才
望充纂修官歷官秘書院侍讀學士今案著有瓠園集

韓詩通志字聖秋號固菴崇正己卯舉人家素封耽精講誦不
事生產資用漸絀歌聲出金石少師三水文太青窮典墳邱索
之藏而不沾沾拘守章句質以奇辭奧字茂先景純不能越也
尤敦氣詔寓居江南交遊皆知名士 國朝官兵部郎著作甚

多名家選詩必首列焉今按著有學古堂集寒山問答太青外紀明文西行笈言諸書

劉澆通志字學海幼聰穎弱冠騰聲庠序奉繼母盡歡事伯兄瀾如父家人化之於書無所不通醫卜象數胥臻精妙終身布衣子弟奉絲紉則置之篋中未嘗著體啖飯踰常人惟羅蔬果嘉肴列前不一舉箸學使呂雲藻歎曰古所謂淡泊甯靜者其殆是歟今按著有逢窗雜咏十卷

楊爾恪通志少時父卒揚州伯兄爾恂育之學問博通動必循理伯兄性嚴先意承志能盡其懽持身清潔雅不喜流俗吟詠之外無餘學者從遊經指授無不騰達孝廉王自卓刑部郎楊瑛森進士璋森皆出其門

石朗張志字仲昭少有文譽一時工舉業者如李承尹侯于唐

皆請益登丙戌鄉榜令桐城南漕二米歲有區頭之役蓋於眾糧長之中輪僉什一以彙總焉上下運解水脚耗米日費不貲以致敗家蕩產不可勝計力請革除潔己愛民公餘惟事吟詠諸名家選詩必推壓卷左遷潮州桐民立祠樅陽山子之屏亦能詩善書今按著有桐音桐山詩歷詩草華嶽紀事諸種

溫樹珖通志字虞白順治丁亥進士授堂邑知縣甫三月罷歸家居事親備極色養甯夏巡撫黃圖安欲薦其才樹珖以親老辭嘗取天文地志河漕關樞兵刑諸書精覈條列爲世用具康熙甲寅吳逆蠕動倡邑人修城浚壕集鄉勇爲守禦踰年卒人知其用之未竟也子德嘉康熙戊午舉人博學好古深契陳白沙以勿忘勿助爲致力處與焦之序同纂邑乘未終而卒今按珖著有清湄詩稿德嘉著有北山集

杜恆燦通志字蒼舒號杜若八歲能文十七補弟子員值寇亂家中落嘗走四方負米養親鄉試中副車遂入太學課輒冠六館名益噪考授通判需次未就念老親食貧因策蹇南遊時時得巨公詩文及珍玩錦綺物歸壽其親先是居京師與中翰吳煒交訂觀文大社以振興古學爲志及煒使關中過焦穫復廣其社於邑之學古書院煒去恆燦主講席學者多宗之會長安梁化鳳鎮崇明遣迎爲上賓既至化鳳以堤成出獵恆燦陪副乘卽事作平洋河十章軍中譜爲鏡歌尋遊楚滇復入吳久之歸卒甯都魏禧稱其天性孝友從父昆弟爲經紀婚娶衣食甚眾篤行不可及自祖父以來急難好客所居濱白渠南車騎冠蓋輻輳每酒酣耳熱潑墨揮毫無不厭所欲而去一夕悉焚所著書弟煇急起收之得詩文若干篇今所傳春樹草堂集也

孫枝蔚通志字豹人世業鹽筴甲申之亂年二十四散家財求壯士起義不果走江都學賈三致千金一日忽自悔曰丈夫當讀數千萬卷書耳何至齷齪學富家爲於是折節讀書遂以詩名世年六十舉博學宏詞時有奔競執政之門者京師語云萬國玉帛朝東海一點丹誠向北宸枝蔚恥之求罷不允促試

體仁閣下不終幅而出

天子詔示諸布衣處士有文學素

著老不任職事者授京銜以寵其行及格者八人枝蔚與焉部擬正字 上薄之特予中書舍人吏部集驗於庭獨臥不往

旋被敦促乃徐入逡巡主爵者見其鬚眉皓白引之前曰君老矣枝蔚正色曰未也我未四十卽若此且我前以老求免試公不以爲老今我不欲以老得官公又以爲老何也部臣愕謝卒以老官之枝蔚貌魁梧性伉直初以明季流離好講兵事家在

三原毀於賊比從京師歸復走江都王阮亭云古詩能發源十
九首漢魏樂府兼有溫儲之體以少陵爲尾閭者今惟先生一
人其爲詩沉雄奇古興至卽書不事雕飾而意致灑如自命在
杜韓蘇陸諸公間餘子不屑也今按著有漑堂文集前後續諸
詩集

梁舟張志字木天總戎加琦子也以進士令安肅再令江都治
績偉然吏民畏服時與司李王阮亭同官廣陵文章聲氣卓爲
海內領袖汪懋麟方在童年爲舟與阮亭所拔識懋麟序舟詩
以爲高韻逸格梯乎漢魏軼乎六朝惜早年而卒今按著有平
山近草徜徉小草

焦之序張志字雁和中丞源清子也聲滿膠庠爲人修飭康熙
乙酉知縣李瀛重修邑乘士大夫咸推之序操筆於田賦深致

意焉曰民生所繫吾以杜宿弊也試必冠軍提學亦以遠大期
之然數奇以明經老

張天龍張志字潛飛殫心米元章書其得意者最爲近之同時
李燦字玉炯善草書王章字玉章善王覺斯書

袁仁林張志字振于靜重好學不苟言笑進士喬墉曰與先生
語不覺矜躁俱釋非有道不能也嗜韓文手自箋註學使試嘗
奪幟與選貢員世泰齊名袁善書求者常盈門尤精參同契年
近九十卒員亦昌後焉今按著有古文周易參同契註韓文箋
註虛字說瓠園叢語

張郊張志字東野康熙辛卯舉人精熟文選嫻音律畫師倪雲
林曠達不羈年二十四喪妻不再娶爲文尙才氣同社七人兄
鴻及楊璋森維珩張岫名噪一時至賦詩則郊獨自負而旗鼓

相當者惟岫岫字子山雍正癸卯舉人詩宗中晚駱宕可喜郊嘗引爲知己郊終於延安教授岫仕山東知縣未任卒今按郊著有坳堂集抱葉吟滋菊館文鈔易農詩集

李瑛張志字仲修其先世以賈起家獨能不囿於俗厭浮夸崇詩書弱冠爲諸生康熙丁酉薦而不售遂寄情詩酒孝廉李世祥稱其詩有瀟灑出塵之致猶子之藝亦能詩膺賢書早卒今按瑛著有近天樓詩集

侯佐元張志字輔卿弱冠讀書卽知爲己之學絕意仕進不懈而進於古文譽日隆遠近多負笈從之康熙三十一年大祲著有倒蔗集可補食療本草所未及今按又著有忍齋隨筆

金啓九晚文集字奕山會稽人徙家三原好讀少陵昌黎東坡集詩詞古雅江南名宿王一元見而奇之自是詩益進酒酣耳

三原縣新志

卷六中

熱灑灑數千言商州牧王如玖聞而致之幕如玖故相國熙猶子也解詩能飲其客江南錢卓人詩尤工三人居甚歡未幾如玖家隸慢卓人卓人怒去啓亦慷慨辭歸與諸生劉紹錡善錡亦好古能詩啓來錡具飲啓獨酌錡操筆立其旁爲詩以酬啓卒錡鬱鬱不自得唯作詩積二千首卒病死年二十三今按啓著有芝鄉集錡著有浴花堂集

新增劉紹放字繼貢號九晚澇之曾孫雍正乙卯學使王蘭生拔貢成均應博學宏詞奉旨以知縣用宰四川什邡調南充巡撫碩色保舉御史辭擢成都縣艱歸服闋授福建甯洋碩又以經學薦入京免考部銓湖北石首奉旨以御史經學二次改要缺調山西太原大計卓薦引見賜蟒衣內段遷陽曲又擢解州未赴任以病告歸紹放博學通明所至以經術飾治政績

卓然一切簿書錢穀皆躬任之獄訟必反復研究雖小事必務求真情講學宗程朱工古文詞著述甚富所著有周易詳說春秋通論春秋筆削微旨書考辨詩逆志四書凝道錄衛道編家禮補註九晚詩文集纂修縣志

周元鼎字象九號勉齋乾隆庚寅舉人辛卯進士陞兵部郎諳習吏事於書無所不讀凡詩賦星數諸史六書之學靡不淹貫工琴善奕尤精篆隸晚更研究經傳潛心性命然其學以陸王爲主嘗刊布陽明集要所著滙菊軒文集亦多逞其才辯掎擊朱子

李秀字芝山諸生豪邁有氣節生長南方作西湖採蓮詩三十首一時名俊稱之通天文兵機善劍擊拳勇之術遊京師元夕過琉璃廠諸惡少毆一士曳泥中秀不平輒揮拳逐之惡少莫能支羣散去京師語曰義士義士制府某欲招致卒不往詩如其人雖老貧慷慨謳吟泊如也著有百尺樓稿今不存

趙體鼎諸生與勉齋周元鼎及某名失攷一時有三鼎之目元鼎

講學宗陽明而體鼎獨信朱子嘗不相能有舉人苟若魯者附元鼎說謂朱子大醇不無小疵時體鼎當客席執問若魯朱子大醇固人人知之必指其小疵所在若魯不能答客亦不得飯久之或促若魯出得免其守正如此

王自策字贊山嘉慶庚午舉人慶陽府訓導少受業賈一樓天培後遊耕石元熙南雅蕪二顧之門學益進制藝出入諸大家時輩少及之者周貞木學使特聘主講宏道書院名士多出其門晚侍母家居曲意承歡於師門尤有古誼奉賈顧三先生木主終其身

王先生諱萬适字次伯道光辛卯舉人麟受業師也性情敦樸博學篤行生平觀書手自鈔錄不下數千紙葬兄不用俗禮兄女謂吾父供叔父讀書乃爾耶先生泣然曰正爲供吾讀書故也兄遺一敝裘每冬著之曰以此思吾兄不忘耳嘗輯諸史孝友傳爲篤倫書數十冊欲付麟訂以傳世未及而沒

楊秀芝字梅友一字玫園諸生長身偉軀性孝友生平貧苦甚處之怡然好吟詩不屑意舉子業遇佳山水輒獨往凡九登太華友人嘗贈錢促應秋試乃襤被冒雨遊昆明未央諸故址而歸行事類古高士接人冷落若難合久而知其天真無世俗周旋態愛才而善諱後生樂近之早遊朝邑李時齋先生之門重節行敦氣詎凡四方講學士秀芝皆與之交與涇陽詩人劉世奇尤相契其爲詩有王孟遺意晚益趨淵明矣自署所吟有因地因事因年共二十餘冊東里劉昇之嘗刻其女樂府一編與世奇詩並傳

李學源初名學濂後改今名字鏡湖道光甲辰舉人勤讀書好深湛之思砥礪廉隅爲詩古文辭迥異恆蹊官同州府訓導十餘載每朔望謁廟必先同僚至學署如塾館受業常盈座凡諸生丁憂起復及舉節孝不受一錢予學宗程朱而君喜陸王說閒有不合亦不予鄙也晚又不右陽明云所著有竹嘯堂詩文集及讀易說

志史類也史例不一志亦然馬班無獨行而范史紀之函史唐傳有孝義又有篤行李時齋先生朝邑志特多志士德民蓋卽范氏所謂情迹殊雜難爲條品片辭特趣不足區別者也予仿其意增志士質行庶備闕漏或亦不戾古法云

志士三人

宋養植字徠松諸生挺特有志氣少家貧既入庠家人欲令改業輒斷髮示必讀書事繼母孝聞人講聖賢學甚嚮之乃牽於科名報母而未決旋遭亂母被害益憤不欲生冬月衣麻衫走慶陽從軍意復讐久之歸張總愚入陝奉縣諭練勇訓督不少懈而急公固窮家人計米而食量薪而炊亦不以語人年未四十卒識者惜之

郭李生彬字勉之沈毅有才而行義不苟本姓郭先世以甥承舅嗣冒姓李後復姓仍曰郭李少習賈繼鬻古書籍久之知慕正學講行古冠昏禮人非笑不顧也刊先儒講學書數種未成遭亂版燬尤善籌畫亂後邑中修城屯田防練賑恤諸務深賴其力上憲委修嶽廟及龍洞渠悉能條陳利弊得失數年辦公

三原縣新志

卷六中

美

一皆自備薪水不用公局一錢其廉潔如此同時有張怡繩者與生彬雅相得才亦相埒而知學則自生彬始別有傳

張怡繩字宜堂亦賈人也聞生彬讀小學書遂愛之於是益親師友廣見聞最重近思錄略成誦然怡繩尤敏幹識大義壬戌始亂城中危甚倡同志捐費立同德局事以定詳見雜記事兄待姪皆有恩意爲劉氏主賈事獨贊其尊賢好義督刻正學諸書以成其美其廉於辦公好行古禮一如生彬病危衣衾皆白製如式遺命尤諄諄屬以禮斂葬戒不用一切陋習及浮屠法一時賈人中勤勞辦公而不受薪水者又有數人李館字省齋王憲字宸章王楓字丹初皆已逝

程子曰大凡儒者未敢望深造於道且只得所存正分別善惡識廉恥如此等人多亦須漸好然則賈有士行賈人中不

易有豈獨買人中不易有哉如生彬怡繩是已世之士其名而賈其行者可以媿矣

質行六人

楊秀元字一臣本名恆孝諸生事父甚謹尤善奉繼母友愛諸弟持身儉約處家無私蓄不妄取接人直諒鄉人某素無賴人勸其宜避然卒面規之某亦感悟晚不復與科舉曰吾躬耕養親而已奚名利爲乃買田獻陵側顏其居曰半半山莊蓋欲半耕半讀云農暇輒手鈔顏之推家訓李二曲反身錄等書又著有農言著實一編言歲時占驗早晚種植與一切耰鋤耕穫之事特詳老於農者或不能知也精地理家言爲父擇葬地曰此地堪輿書所謂不利地師者然吾冀安吾親果有之從父地下亦所願也葬四日而卒

三原縣新志 卷六中

三

賀先君諱含章字貞堂性不能爲飢餓故自號質直學使吳大澂爲之傳曰君六歲而孤爲祖所鍾愛母教之嚴年未冠應童子試不售貧不能讀書乃棄儒而賈往來吳楚閒一日同賈崔某竊千金逸去主進者鳴之官并疑及君後三日硯下得崔手書白賀君不與其事因免於禍君嘗謂崔性躁急酌酒吾遇之厚一不與校故不忍以竊金事累之君之居心坦直而忠厚卽此可見矣生平邃於醫理求診者踵相接不少倦亦不索謝貧者并其藥資施之事母王以孝聞教子弟以謹樸不妄求而尤以孝弟爲本以慎交游爲重嘗書小學書及先儒格言置座右

時自觀省

麟年十八讀書王先生所手鈔呂涇野書至季氏舞

佾歌雍都從恥惡衣惡食來語甚愛之歸而述諸先君先君教以不此之恥當思其可恥者購薛文清公讀書錄先君見之乃曰恨吾不早見此書此汝終身業也採訪者多言先君醫術而未詳內行故

節錄吳傳并略附此

瑞麟曰夫古人之於親也無美而稱之是誣也有善而弗知不明也知而弗傳不仁也先君處平世窮約終身無所自見而不肖之生也晚其於平生事跡蓋亦有不知者矣立身行道是曰顯揚區區籍名邑志謂足傳吾親哉顧嘗讀武功朝邑高陵富平諸志例得列其先君之行而不以爲嫌愧麟不肖無康呂諸公文章德行足以論譔明著取信後世方蹈不仁之罪是懼若誣親以善固知恥矣又敢乎哉

李志道字性善性勤樸不苟言笑在家必早起親躬灑掃事母曲致甘旨終身孺慕年三十餘妻亡不再娶喜構古書籍雖居賈暇輒手不釋卷教子煒舉孝廉

梁生甲字肇乾又字健菴敦厚有長者風與弟友愛終身無間委以家政不復稽其出入家人漸侈靡惟躬節儉感格而已其生平處事接物得力在肯喫虧三字

三原縣新志 卷六中 三

梁聯甲字鼎齋諸生健菴弟也事兄如嚴父素嗜飲飲輒醉或至號咷聞兄至輒肅然改容至愛姪景先尤篤摯景先讀書宏道書院日輒數次至或手食物景先鍵戶讀停步立移時乃叩入恐誤景先功也一時士論稱之景先貴得賜封如其官

仇維祺字壽軒貢生歷署寶鷄乾州訓導晚爲宏道書院監院和平謹厚老成縝密一時推爲鄉祭酒尤有古長者風年未五十喪偶或勸其繼娶不答七十八歲無疾而終

隱逸 十一人

唐田游巖唐書本傳三原人入太白山母妻皆有方外志愛夷陵清溪止廬其側長史李安期表其才召赴京師行及汝辭疾入箕山居許由祠旁自號東鄰類召不出高宗幸嵩山遣中書

侍郎薛元超就問其母賜藥物絮帛帝親至其門游巖野服出拜儀止謹樸帝令左右扶止謂曰先生比佳否曰臣所謂泉石膏肱煙霞痼疾者帝悅因敕游巖將家屬乘傳赴都拜文館學士進太子洗馬裴炎死坐素厚善放還

明趙昂谿田通志字爾若年十七中永樂戊子鄉舉任上林院監署正四十致仕植花教子足不踐非禮之地身惟著繪葛之服遇人論官事拱手而退鄉鄰有鬪閉門不出壽七十一無疾而終子愷字彥康與大學士晦菴劉公爲忘形交由監生任清豐和順二縣主簿陞肥鄉丞在和順時晦菴已入內閣愷入賓席蹲坐侍吏恐晦菴聞曰此必趙彥康也出見果然

王仲智谿田通志名智以字行淳樸簡重言笑不苟好拯貧濟乏嘗於邑之西園結草爲亭以琴書自娛鄉人稱爲西園公蓋方諸東園公也善教子恕卽端毅公爲一代名臣弟仲和以德行爲鄉人所宗凡有爭訟必就決之婚喪禮多資以行

馬仲良谿田通志仁厚愛人不言人過耕常讓畔居常讓席不事爭訟鄉鄰有鬪者輒閉門不視其兄嘗笑之曰吾弟畏人見樹葉下恐破頭也曰弟非畏人畏理不直耳里人張氏馬氏蒲氏無田則割田與耕有車一乘歲與朋友共之傲而無憾他里王氏聞其仁來卜鄰乃與同爨十有五年如兄弟焉

聶信谿田通志字仲孚由貢生升新鄭訓導平生節儉一扇常持之數年不易所著衣經年如新

馬浩温自知志料字子充食餼學宮家徒壁立藿食水飲講誦弗輟幾不知有寒暑晚中明經選例得謁授博士愀然曰昔賢不云乎甯緣五斗米辜負一漁竿陶靖節何人哉桑榆景迫案

頭殘編足供伊吾奚必彈冠爲其高尚如此

馬天章通志字季襄少從學溫恭毅以女妻之立志端亮善詩賦工篆尤精繪事不求聞達人謂烟姿霞韻前有田游巖後有馬季襄今按所著有文雅齋集

梁文煥通志明經居峩阜闢園築舍種樹蓄魚不遠室廬而具邱壑之致溫恭毅爲御史大夫欲薦於朝固辭之寄情詩酒人高其節

胡廷器通志字含素少喜讀古書不事帖括善寫山水精篆隸狀貌奇偉躬耕藪澤垂釣溪谷距城市才一舍地名可得聞身不可得見也今按所著有傳響樓集二十卷七叩一卷

梁爾升李志字君旭美髯修幹隱居元扈山房時遊吳越與知名士相唱和今按著有元扈山房集

三原縣新志 卷六中 罕

國朝李三畏李志字四知至性醇篤天資敏異幼值鼎革棄舉子業一意經史遨遊吳越齊楚間一時名公巨卿爭相逢迎遼左李用九攝邑篆就詢利弊陳積害五款除之勒石縣門

孝義元四人明三十九人補二人 國朝四十六人新增百二十六人附五人

前志多分載孝行義行然其行事多不能分蓋未有孝而不義未有義而不本於孝者合爲一類知孝弟乃爲仁之本而親親仁民愛物理實一原然或一時義氣於事合宜於人有濟雖不必盡以孝著而皆足風世卽生存者亦備錄之俾覽者興起云

元張德明蘇天爵撰墓碑字彥明少讀詩書言動悉遵軌度有張澤者屢因婚嫁假貸積負甚多憐其貧一不責償取其券焚之邑人李和雲陽李仁皆爲隸於人其家欲得錢縱之爲民德

明以私錢數千緡畀之仍爲經紀其家嘗曰今海宇承平年穀豐足若鄉校不修則無以興治化乃請於縣候買地建學遠近觀感爭遣子弟就學以子貴封奉議大夫涇陽縣子

李子敬舊志字恭甫質謹孝友善治生好賑窮乏關中饑有田業者賤售救死子敬所買數頃後聽贖惟取原直卽不能贖亦畀還之計直錢四千六百五十緡里巷火燬數百戶近其居火自熄復捐錢二百五十緡恤被災者與弟子懋創學古書院計費緡錢二十萬割田以供釋奠廩師生蕭公斲同公恕詣其家以相其事行省上其義詔旌其門元史孫秀實傳子敬嫁不能嫁者五十餘人葬其不能葬者五十餘喪焚通券四萬餘貫有司以名聞旌之李朮魯卿創建三皇廟碑始其父自雲陽遷龍橋鎮力稼穡儲藥品采精良謹市售家遂饒裕益訓子孫勿驕情年八十有六終其二子繼業益謹敦信義恤匱乏急婚葬已責紆逋開困救急施無德色制授子敬進義校尉管民匠官其子秀汴梁民匠總管孫統以承事郎使京畿及秣倉子懋秩承事郎其子善繼以奉議大夫知鄜州

王忠續文獻通考能盡孝道值母有病欲爲之娶忠曰吾母疾安忍爲此母卒廬墓日夜哀號疏食飲水人所不堪有司奏旌其門舊志擢爲學官三調借階合水教授

張世昌吳元喆撰墓碑字周卿幼事祖父左右就養無幾微失及長恂恂禮讓益恢廓有容昆弟四人有出仕者輒資其不給使守官箴季弟世榮爲廣東廉訪使僉事去關陝萬里風十異宜父以爲憂世昌裹糧踰嶺徼往視之覆命無虞父乃安世昌遂無出仕意薦辟交至皆辭家用有餘推以周親舊之急鄉鄰

弗輯官有不能諭者聞其片言相與推去其見服於人如此
明賈克明谿田通志樓底人廉介信實治梓人業鄉鄰有喪其
貧而甚者自具飲食爲造棺又助其穿壙而葬之崇賢街劉氏
祠孤魂作木主三百明日公能施錢我獨不能施以力乎辭值
不受

王理谿田通志字本性景泰庚午舉人任山西布政使經歷後
調廣東忠信孝友鄉黨所稱

張昶谿田通志字世宏幼沉重篤於孝友先世業醫昶深究素
難技益精父仲遠病昶祝天願減壽一紀以壽父父思鳩肉
卒無鳩稽首顛天鳩至執而烹之以進復思食鮮魚時冬日薄
暮徒步夜至西安漁家得魚味爽還烹而進之疾愈未幾父復
患風痺昶同寢者十二年飲食寒煖曲爲調攝仲遠竟不起計
歲實符所祝人曰其莊曰孝莊按子曉有傳

三原縣新志

卷六中

聖

秦邦彥谿田通志字國美由貢生訓導潁州教諭原武嘗迎父
柩於淮上遇盜捐金與之護柩痛哭感動舍之而去姪恆少孤
鞠而誨之學弗成爲治生產焉所在以經授徒門人成名者眾
李良心谿田通志字孺仁忠信孝友父鎮晚年生良心課其學
業日以顯揚期之值大比良心倍加勤苦及放榜日鎮屬纊絕
氣二日矣偶報者造門云良心中若干名忽起而問之乃再生
二年而歿其平日孝能慰親類此張志良心後爲什邡令

劉銘谿田通志字銘善爲人寬厚自奉甚薄篤於親故

王清舊志字源潔性耿直勤於農業以其餘貲居積致富 按

銘清皆嘗出粟千石以備賑濟正統三年並詔旌義民

王九思賑恤出粟數千石詔旌義民舊志逸今補

陳恭谿田通志字守敬能安分治家勤儉賑窮恤價畧無德色
出粟五百石備賑濟詔旌義民

薛約字博齋大中父也呂新吾坤撰墓表云孝友公直家貲累
巨萬恥以居積自多歲饑賑鄉里計口授糧有藝習者或給之
資使自爲計有以田鬻者約曰有田則一歲饑無田則歲歲饑
甯厚周之不使流移時北山流民載道以麥和豆穀爲麪人與
一升日爲常屋舍無家者耕無種借之不責償里人王西字少
貧約常矚之後宰華亭邀約至及行與之贖約曰聞君廉卽所
贈多矣願留此以養遂不受生平不談死友過不言人中菀曰
人有過生時可聞而改身往矣當與諱之牀第之言果實耶何
與於我枉耶愈辨愈彰君子以爲名言補

約誠長者哉宜其生給諫子也新吾之言信矣前志缺焉然
則考輯舊聞豈易言無遺耶亟補之以風世

三原縣新志

卷六中

聖

皆復性李志父疾侍藥餌衣不解帶者三載病革嘗糞父歿家
貧不能葬衰服者九年與諸姪同爨四十年及分箸盡讓其善
產遺有垂芳錄按子如心如思俱有傳

梁彥杲喬世甯邱隅集字士明無厚資其性好施正德嘉靖閒
每歲饑卽煮粥哺饑者死無歸者輒棺葬之所施棺以千計或
不能棺卽又爲席槨坎掩度日惟布衣粟食白衣食外則盡爲
施藥餌修橋梁矚急難之費

溫朝鳳張志字鳴岐恭毅純父也生九月而孤旣長賈蜀以違
母遠遂舍歸服田母遇其妻王氏嚴居常嗃嗃其妻兢兢孝養
卒得歡心

王養教志料米市丐僧也能孝母每遇新菜果雖重價必購以

博母歡或庖羞不精必咎其內子

李三雲志料焦穫里人馬服輅城北里人二人同居作線生理其子母錢不計多寡不分爾我至老無疑貳其妻冠服互用亦無閒言各有子亦能成立温恭毅題其閭曰李馬同居

張三極李志南康守善治之父生平多潛德事二親孝本天性父沒攜其子善治廬墓三年

梁應基梁希贊李志皆母病割股愈疾

張獻科張志八歲喪父毀瘠幾不勝衣負土成墳其母好施予先意承志歲饑施食寒施衣病施餌死施槥行之不替曰吾母意也及歿擗踊嘔血廬墓三年夜半輒前號曰兒侍母

杜鶴齡通志五歲母病每夜誦孝經籲天祈代母尋愈父病不解衣者四年夢神授方內載海風藤一味詢醫人皆不省後得

三原縣新志 卷六中

醫

其藥於京邸人以爲孝感所致云

王一正通志字琇菴少孤敦龐好施萬曆十四年捐金三百賑饑復散其積麥百石同妻趙氏日糜餓者既又助餉五百金巡撫汪喬年巡按張爾忠上其事詔賜義官冠帶旌其閭温少保建龍橋咎大參建凌雲塔協修貲助邑令爲復其役

楊聰李志字敦素教授春芳祖嘉靖閒歲大饑聰輸粟二千餘斛邑令重其義例爲散官固辭不受

秦一鶴李志字琴侶蜀布政一鵬之弟性尙義兄所遺俸金盡出以濟危困有郭姓者負數百緡憐其貧招至家出券焚之

張學顏世家詩禮尙義好施崇正中大荒以千金周急遠近活者甚眾

梁尙達志料能生計善養其兄當受室必先兄凡衣食亦必先

兄後已

雒建基志料家被盜劫囊笥一空惟後樓下有秦氏所寄二十餘楨存次日秦氏子來唁首詢已楨雜曰惟君家物無恙其良心不沒乃爾

李名芳李志字碧軒仁厚尙義崇正歲大饑捐穀五十石活數十家甲申兵入境被執挈一婦令芳看守芳潛釋之賊索婦不得加以炮烙至死不告甘心灰燼焉

李思道李志字肖峯敦義好施嘗撫養無依孤幼成立歸之崇正中凶荒輸五百金於官施粥救人以爲有力者倡兼輸茶局馬濟國用賜七品冠帶

來廷對李志字舒五受業溫恭毅門慷慨尙義友人王宗禹卒其子行乞於市憐之百計籌畫贈以金教之營生聞者嘆息

三原縣新志 卷六中 五

申懷珍李志邑庠生家貧力學事親能孝歲凶炊粥濟急不顧己困癸未之變投井死

來嗣續李志號西園崇正庚午副車關內大荒施粥活饑民甚眾繼遭疫癘道殣相望又施棺掩骼

溫本知李志字固有嗜學篤義伯季產業蕩盡悉以己業畀之甘貧無怨教子樹珖成進士

高捷李志字龍門十歲爲諸生學使李維禎謂其神氣雋邁瞬息可千里數舉省試不利值流寇蜂起練鄉勇授方略爲一邑屏衛又出穀濟荒全活甚眾

房東昇李志生有夙慧甫總角日讀十七史事母孝嘗湯藥侍左右久而不懈嘉靖中舉於鄉

房東曷李志性篤孝親在則負米以養歿則負土以葬馮恭定

題其閭

張輔堯李志父歿廬墓三年

賈允相李志字臺鼎陂南里人流賊臨堡舉家潛伏其父匿不密爲賊所執允相聞父呼號聲挺身出救亦爲賊縛罵賊至死不絕口里人勒石於墓

來蒙李志字道先四歲失怙諸兄宦遊獨蒙事繼母王氏氏十九守節七十餘歲蒙依依膝下務得歡心

劉士琚張志號玉峯崇正十三年歲大禘斗粟萬錢至罷市竭粒人相啖士琚先繪圖請賑遂傾囊煮粥叩富戶請糶育乳婦活棄孩八百瘞道殪萬數邑之彭寨飢民聚爲盜令憂之命總旅擒治而某捉良民冒功士琚排邑闥大呼階前於千夫中爭救無辜五命順治乙酉流寇陷申楊諸堡男女多投井其生者

三原縣新志

卷六中

哭

皆士琚從塹隧汲出邑人爲立碑南門內通衢

秦瀆張志字德如邑庠生中丞所式從孫也崇正甲申逆闖據西安徵逮縉紳瀆冒所式名往見以大義說之自成怒械繫至山右八月十四日死於平陽府東關之管家莊

國朝溫樹琴李志字桐伯恭毅孫能守家學母病喘疾日夜侍衣不緩帶食不下咽披髮跣足徧禱神祠母遂瘳又患背痛禱如前夢老嫗以湯洗母背而愈顧炎武曰桐伯出入起居言中規行中矩循循禮法事父母能養志而鄉黨言桐伯之孝者多出於神明感應之說余斷謂恭毅孝靖以理學名其家甯可以荒誕之言溷吾子臣弟友之大道哉按劉志子度字右貞及見大父自知能記其詩歌稍長從瀆化宋振麟授經學有本原制行孝義不愧祖風

焦之雅通志字大雅中丞源溥長子逆闖破西安其父被執罵賊磔市雅與弟之夏尋屍衣線經手持利刃誓欲同死賊聞之嘆曰忠臣孝子也予之屍負歸葬畢棄家隱華山鬱憤而死之夏字次虞散財糾死友報父讐不得遂隱終其身處谷山之陽二曲李中孚題其墓

劉容通志農家子也居嵯峨之麓北山虎入川原噬人一日銜其弟去容追之左手挽虎尾據其背右手執屨擊之奔里許虎益猛容益力奮臂前擊虎額虎乃舍其弟去容負歸得活

王維圻李志母楊氏歿哀毀骨立踰歲忌辰伏墓上號聲不絕從人扶起吐血數升墓草盡赤遂成疾不起時年十八

梁爾壯續志字君陽邑廩生講學高節建平懋堂以養疲癯殘疾後自嫌近名改關壯繆廟嘗立孝義會出粟五百石備婚喪

三原縣新志 卷六中

署

公事之助設他山館受經數百人又修城補橋鑿渠築堰屢賑饑代完賦家產殆盡教子鉉成名鉉後爲倉場侍郎別有傳見賢能

王廷輔李志邑庠生父歿水漿不入口者數日三年不茹葷母性嚴厲中年失明廷輔未娶一身侍左右不懈過勞嘔血猶竭力奉藥餌起臥悉親歷枯瘠不起先母卒

申懷瑛李志字珩儒邑諸生事父養志事繼母無異所生子崱登賢書

來嗣嶽續志字懿園布政使復胞姪也幼賦至性以親老疾衡泌色養以樂其志親歿廬墓六載原邑寄甲涇邑者差徭偏苦鬻產赴納道遇舊識求助卽以完賦十金贈之

崔維喬李志順治三年貿易山東行次河間逆旅有遺金三百

維嵩守之累日遺金人至則山左明經朱應多赴銓資也驗實
畀之朱以五十金爲報維嵩笑曰分惠孰若全獲乎拒不受朱
旋授三原令旌其門

侯達先通志御史于唐父爲人涓謹孝友父病疽吮膿虔禱求
代尋愈荒歲爲長孫毛坊楊杜等里代完通賦千金取花名冊
焚之

曹元李志字孟侯廩生康熙三十一年大荒元家鮮饒積慨然
以周恤爲念村堡宗戚凡六十餘家朝夕計口授粟及歲稔人
爭償其負悉卻之

李時盛通志字文吾因母寡居棄賈業奉母進食澣滌溺器皆
親歷之明季有舊交高姓者以黃金五十兩寄其家值逆闖亂
焚掠殆盡盛室家不保越七年高至取而還之

三原縣新志 卷六中

哭

來淑泗通志字聖濤年十歲值流寇變扶繼母左氏避難訛傳
寇至母投身井中淑泗號泣井上跪求途人覓縵縋救負歸得
活

趙宏祚通志字達宇順治初年流寇餘孽竊發宏祚方五六歲
隨寡母李氏避匿道遇寇欲劫其母宏祚號泣跪拜賊不可宏
祚引頸披胸乞賊手中刃欲自殺以釋其母賊義之舍之稍長
以家貧願爲賈養母旣而有贏貲走江淮閒未一年欲馳歸同
賈者怪之曰夜夢阿母呼我而號是必苦憶我我心忤忤矣卽
歸見母母泣撫曰人傳汝溺於水余痛而呼幾不生汝今固無
恙耶宏祚大哭曰奈何以財故累母自是誓不離膝下終身孺
慕不改云

劉守法李志同弟守富守奇事祖母孝兄弟友愛至老無間同

龔五世縣令題其門曰百忍同芳

員洪麻李志字丕承慷慨好施出粟助有司賑荒輸千金補葺龍橋修理北郭城池

王詢李志字芻夫國子生歲饑出貲二百金全活本族多口又代族人完逋賦恤癯獨

張騰煊李志性樸好義每遇歲歉輒出躬耕積粟以活人高陵劉姓者以篋貲千金寄其家流寇至甯棄私橐守寄物寇退完璧歸之

申培棫通志字林蒼歲貢銓兩當訓導性孝友善事繼母撫弟妹恩勤備至嘗捐千金代輸闔中積逋出資濟凶歲焚券掩骼義行甚多

孫連芳續志字蘭亭邑文學讀書聰穎孝事父母遭奇荒終日

三原縣新志

卷六中

四九

力作奉甘旨友愛昆弟讓產分貲俾各成立張志其孫枝東明醫理事母孝

殷助續志字公輔庠生幼嗜孝經家貧教學供甘旨父母繼亡哀毀幾至滅性臨終惟念葬親貧儉於己無得從厚氣絕復甦命兒孫置手錄孝經於懷始年九十二

王繼蘭續志字子馨六歲喪母辟踊類成人家貧行賈值父病心動輒歸最後父病噎滌穢嘗糞祈天請代事繼母得其歡心從第三人從姪一人凶荒護棺咸得其所

孫逢吉通志字長康慷慨好施率家人收穫見婦女拾遺穗心傷之卽出已麥數石給之里中稱貸者畀之如數不索券時有詩云施金不計王孫報應笑田文三窟謀

侯治國續志字佐宇客秦州牧張公墓值王輔臣變張義守城

泣託其妻子聞道歸幼子抱恙日行僅數里爲賊所獲賊欲留
治國佐兵機治國正色厲辭絕之脅以利刃終不變賊感而俱
釋之卒不負所託

侯于楚續志字上卿賈於吳父病啖喘棄貲馳歸枕臂抱臥百
日會妻張氏產育有乳乃斷其子乳以乳屢進於父而愈繼母
癰毒吮之得痊友人李用美郝天知無子立嗣繼絕經紀其家
侯憲續志字蕭章太學考授州同父病衣不解帶湯藥必親嘗
昕夕泣禱願以身代及歿臥柩次者三年母老曲盡孝養周恤
親族悉承父志云

王居恆續志字完初十歲喪母日夕哭泣父歿毀傷幾絕事繼
母孝讓產於從叔者至再荒歲救蓮姓孤兒成立婚娶於臨涇
旅寓得遺金三封候其人還之邑令徐公旌其門

三原縣新志

卷六中

辛

張枚續志字鼎調順治丁酉鄉舉性孝友善事繼母代輸納周
貧乏者不一其事有爲債所迫鬻子女以償聞之惻然出貲贖
歸

來德曜續志字楚珩太學生天性孝友不事矯飾周乏恤困凡
義所感無不慷慨以施早著令聞懷抱經濟而享年不永識者
惜之

梁激之通志鉉庶子也幼時從宦四方父以果餌賜之輒念曰
吾嫡母在家未食也聞得紈綺輒請於父曰吾將爲嫡母衣也
後嫡母患痢粒食不進泣禱果瘳推產諸昆甘窮約好施歲饑
多所全活以嫡母喪過哀致損士林嗟之

孫聯芳續志字蕙亭幼失怙恃師事其兄連芳曲盡弟道旣長
讀書精岐黃術全活甚眾好施不求報借券盈筐一舉焚之

房楨續志字瑞天六歲喪母日悲泣不食兩遭繼母嚴厲事之
畧無懟色後遊楚念賈客無養病之所創建扶疾館年七十卒
馬遇張志字榮公少爲諸生頗窘躓授徒鄉村歲暮散館攜館
貲八金歸過線馬堡聞哭聲甚哀視之則死者無以斂傾館金
賻之抵家拜其父父問容何戚也對以見死者而哀父曰何不
以館金周之曰己予之矣時家無斗筲而父子以濟困爲樂其
後季弟道以鹽筴起家資用饒裕遇益得行其志族黨有急無
不周全士之寒者歲終不俟稱貸量其所需各爲封識遣使分
送數十年如一日其他焚券義舉甚多或勸自爲計則曰貧富
命也有時而來卽有時而去乘其來也盍廣廈萬間乎蓋其生
平好讀濂洛關閩之書故襟懷洒落勇於爲善如此

崔炯張志國學生乾隆十一年里民積欠地丁錢糧一千有餘
三原縣新志 卷六中 至

炯代爲完納有立券者卽毀之知縣鍾一元表其門曰善行克
敦里民公題曰真心行善

李璉張志六歲喪母哀毀如成人事繼母不異所生乾隆二十
五年 旌表

張子裕張志字公優邑庠生爲人淳謹好讀易嘗曰讀書宜身
履其地處事宜不愧於志奉繼母承歡依依終身無違

楊道寅張志邑諸生七歲喪母號痛幾絕父病二載日夜侍側
衣不解帶醫云不治乃膝行禱於嵯峨山神祠父尋愈及沒哀
毀如禮負土成墳乾隆二十九年 旌表

申汝德張志四歲失恃奉繼母得其歡心長經營他方聞母病
卽舍業歸母以老病輾轉牀褥汝德躬自扶掖不懈者二十餘
年終喪後始復經營又篤宗誼以族譜散佚考定重修世次釐

然

陳琬張志字公琰事母孝康熙四十三年夜被盜母受重傷號泣奔顛卒得正兇寘之法母亦尋愈學古書院歲久傾圮繪堞剝落琬倡紳士修葺復拓殿基增朱子像邑之市果者奸徒結衙蠹私稅力請罷除凡此士林稱之

李埈張志附貢生年七十一後母李氏長四齡謹事之不異所自出母嘗因其弟持他人金五百質於蜀中途遇盜失其金爲輟食埈憂懼欲償以己貲從弟演聞而義之借箸完金母始悅埈嘗尤多助困周乏云

馬正用張志字廷棟谿田七世孫也少孤其叔罔顧姊氏予數金貿易甯州叔沒二子往依各贈百金又爲之娶逾年消耗再贈如初晚家居焚券千餘金子驥字有德隨之業商族人馬會元年老無子養之終身馬錫熊三十無妻爲之婚娶又能撫馬錫命之孀妻幼子焉

孫佳佐張志字元宰徵君枝蔚猶子也工詩畫能文章孝友好義論者謂不愧家風云

張翹張志字翹天儉於自奉喜於濟人歲歉出粟廩親族置祭田設義學從子少孤無資生策引之同居年八十一卒

任吉士劉志天性純孝父母垂老病篤日夜躬親扶掖毫無倦容暨歿哀毀骨立喪葬皆如禮乾隆四十三年旌表

秦旭劉志字方升丁卯舉人五歲失恃事父以孝聞年四十妻亡不再娶終父身與之同臥起長白王令勸就公車以親老辭不往嘗於除夕父忽邁疾危甚跪禱五祀更餘不起疾頓愈父年七十餘患喘不食叩頭哭禱先祠請減己算以益親壽額爲

墳起翼日漸瘳父體衰恆臥牀席飲食起居躬扶掖者六年父
年八十一卒號泣如孺子時盛暑水漿不入口者三日葬祭如
禮卒年六十九鄉諡孝正先生

劉恩惇劉志幼失恃嫂張氏撫育成立嫂歿祭祀如母所居堡
城傾圮獨力繕完乾隆十三年歲饑出粟賑貸里民賴以存活
者數百家

蓋邑志自乾隆末至今百年矣其間懿德美行泯沒而弗彰者
豈少哉惟孝義貞節猶有故牘可稽而事亦不詳但已請旌卽
不可得而削存其名以俟後人其或事有可知則稍次之至捐
餉一項軍興以來三原實最諸邑然皆率土臣子所當踴躍報
効而不可辭者且亦不勝其書識者又或以爲彰國之盛故於
此姑略焉

三原縣新志 卷六中

三

新增張奇珍字榮寰孝友任恤歸旅櫬周貧士贖罪人食餓者
助婚焚券排難解紛不一而足然終其身敝衣蔬食泊如也康
熙閒人前志逸

王基泰數歲父母有疾旦夕依榻前啼號年十四母歿辟踊泣
血遂至重聽遇忌辰令節跪冢旁哀哭不輟乾隆六十年 旌
胡瑛天性孝友父年老朝夕奉養弗忍離嘉慶三年 旌

李廷佐字輔臣少失怙稍長讀書忽泣問母兒何不得侍吾父
途廬居墓旁三年母歿亦然性好義適蜀重慶饑傾囊數千金
賑之成都三義廟災火延數千家男女裸體奔又雨浹旬陰使
人每人予之金過寶雞聞有婦哭之痛問知夫遠出無音耗悍
弟逼嫁乃密訪姓名假作其夫信封銀寄送並告以歸期婦得
雷已而夫果歸家築室夜聞呼賊急出視之素識也給眾曰賊

南奔矣急令其人北去涇有少年習賈者遺五十金倉皇覓不
得欲投緹乃曰銀我拾矣如數給其金其人視非是不肯受亡
何拾金者持原金至且曰吾母謂李善人不拾金尙出金活人
我獨非人耶蓋薙髮者也廷佐生平善行多故匿姓名不使人
知然人卒多知之故遠近皆曰李善人云其他救荒歛完逋租
恤孤寡立義學修橋梁施棺木修京師及省城會館尊禮賢士
不可勝紀道光十七年崇祀孝子二十九年崇祀鄉賢朝邑李
時齋先生有傳

劉永宦字錫爵嘉慶中重葺學古書院添補膏火督學宋扁其
門曰儒風式古與勉齋周公元鼎善嘗刊行王文成公年譜及
傳習錄

楊丕綬字章侯父得腿疾求方耀州孫真人洞時薄暮山有狼
不懼也後父母歿皆哀毀盡禮有姜姓者其祖父皆簪共賈事
欲抽領本長支字跡卽檢篋中與之凡三千金又字跡數十張
約二萬餘金悉按姓名呼與之親友或艱昏葬輒典衣助其事
道光十五年 旌

楊詔清字文潔貢生父從兄某官粵東歸至漢鎮病詔清聞卽
馳赴扶輿旋里及病危願以身代母病思食瓜時仲春遍覓不
可得適東郊遇老翁語其故遽曰此有藏炭中者願贈之持以
奉母病稍痊歲終母舅歿未能殮遂以館穀十五金盡與之元
旦祀先乃典衣置具晏如也道光十七年 旌

劉永守道光二十一年以孝子 旌
仇文煥乾隆庚寅舉人有學行家貧束脩養親時念母來孺人
苦節奮志名場年四十三始得第母歿哀毀成病未愈年亦卒

光緒三年 旌

張永慶捐貢事親先意承歡歲歉為里黨計口均粟以禮餽送務存人廉恥所居四社數百家多賴全活

劉永寶字季英歲饑發粟賑恤並施義地以葬道殣

劉壬字戒亭紹攸子也沉酣經史踐履篤實有孝行早喪母終身孺慕父歿喪葬盡禮紹攸著述等身壬為刻其遺書甚備情切推解雖至生計窶艱不以為意旁通軒岐家言為人療病輒愈然獨以詩為性情所著有戒亭初集續集江蘇王鳴盛西莊甚稱之為誌其墓

張謐字甯一漢中府教授縣城久圯首捐千金繕葺之按科貢無謐名

李大霽號澍亭庠生衡州府知府歲饑邑宰煮粥按月捐貲送廠獨力修北關城創建邑考院子穎字敏齋庠生光祿寺珍饈

三原縣新志卷六中

五

署署正兼典簿廳義行亦多孫錫齡字孟熙內閣中書嘉慶丙子舉人勤學好義督學錢塘沈公增修宏道書院首捐二千五百金搜刻邑先正遺書二十餘種惜陰軒叢書三十餘種見雜記歲饑出數千金賑恤設義學恤寒峻著有宜蘭室文集未刊遭燬俱光緒三年 旌錫齡卒後妻劉氏咸豐中獨力捐修隍廟約費數萬金

王文燦完本社數村連租邑令翟表其門

王國梁與弟國棟友愛無間鄉人多感而化之

李道生道光中以孝 旌

李潤字涵益中書科中書創建北關文昌宮撫憲扁其門捐數千金補修治城歲歉賑濟子天雲四川候補知縣睦族周貧勤學禮賢嘗從名宿莊浪崔家修聽講易

余從仁幼失怙事大父孝執母喪哀毀骨立嘗與李廷佐創修省城鄉試會館又好施予時俱以善人稱之道光十八年以孝義旌

劉鎮劉鏞李應運廷佐子優生道光中俱以孝義旌

劉汝芝庠生常巍道光中俱以孝子旌

王兆祥咸豐三年以孝子旌

溫之樸庠生孝友好義符象鼎事親以禮族社諸義事多倡爲之咸豐十一年俱以義士旌

袁廷揚秦志潔門克恭張琪楊皋庠生許樟庠生楊架劉鏗劉

士俊師孟張銳武琚段體澈劉釗咸豐十一年俱以孝子旌

王銓事嗣母及生母以孝聞邑令周表其門

李明吾豁達伉爽排難解紛有義氣愛姪猶子供姪善述及子

三原縣新志

卷六中

美

秉鉞讀書皆聘宿儒忠敬延納一時名流造訪必使子姪執鞭遠送冀道途亦聞緒論也秉鉞諸生善述舉人有聲士林閒

馬居正字植楠樂善好施在城都捐義地數十畝以葬無歸之喪建房數十間貧病殘疾者居之捐錢千餘緡修梓潼橋梁奏

聞建坊又創建小李村順德橋子雨霖字春舫諸生捐教職

歷署武功邠州訓導性情爽豁事親孝待弟友修橋築渠道光丙午出千金賑饑善顏魯公書法

余銓字敘清生員事繼母極孝處兄弟能謙謹醇篤邑侯余表其門曰穆行永詒

相里哲優生家世孝友事叔父情文備至處兩兄及堂弟怡怡和睦每賈歸輒相聚庭堂有一美味不集不食家人三十餘口從無閒言

王朝泗字魯學治家有法同居三十餘口敦睦無異言道光丁未歲饑出錢千二百緡買米賑恤四堡初朝泗歸自蘇有盜偵知其富尾之家月餘乃嘆爲書香大家一無所取而去

劉鈺字連珍捐游擊道光八年成都蓮池灾十八年成都饑皆捐銀賑恤修灞橋捐銀四百兩二十七年饑本邑賑濟捐銀四千兩

胡錫爵錫壤兄弟重修

聖廟費金四萬七千餘兩修東關城

垣費金萬三千餘兩修

社稷先農壇治城以及賑饑恤貧捐

備童試卷又不下數萬金里民值納賦因銀價昂貴窘迫甚錫壤常持萬金出兌銀價頓平

張埴字沃田增生孝事繼母友愛諸弟舉鄉飲賓廩生王書元

增生王保元兄弟以友愛聞諸生石毓峰李逢甲皆以孝友聞

三原縣新志

卷六中

孝

逢甲尤能詩精篆刻

郭思讓好行善事子景泰字貞亭舉人事繼母曲盡孝道待異母弟惠愛備至接人謙和鄉里稱之

劉瑩力耕養親農暇以賣石炭爲業得錢卽市肉奉父嗜酒每早晚必温酒勸飲終身無怠王京幼失怙隨母嫁王氏繼父卒迎母歸奉養無缺務悅母心待繼父子女如同母母歿喪葬無失禮張鴻緒字勛樓事寡母善體厥志依依親側數十年如一日精醫理有妙悟三人縣令余皆旌其門

李科名大寨堡人家貧事母備極色養嘗爲人誣恐傷母心忍辱不令知母年八十餘鄉村演劇雖十餘里必負母往觀親滌母穢器不假其妻手妻女亦善承母志雖粗糲終身而母極滋味光緒三年旌

余初遇科名見其言語舉動知其能孝也已而問之人人果然因至家拜其母其母亦以科名爲孝也然鄉之人且謂科名爲媚親嗚呼吾見今之人不媚親而媚他人者何多也可勝嘆哉

任紹桂字馥堂撫憲吏少侍母能順其意母歿甫十歲日常哀泣慶賀事輒不往及長讀書書孝弟忠信禮義廉恥八字木簡上時覽以自勵事父敬謹溫婉終無慢容及至喪葬皆竭心力光緒三年 旌

張問心孝行純篤承重居大父母喪哀不欲生三年不飲酒食肉處內衰麻不去身葬用灰隔法既葬早晚至墓所如定省者期年鄉里或不能葬娶竭力助之疾苦憂患設方保全時又有陳履鼎劉映蒞俱光緒三年 旌

三原縣新志 卷六中

五

王景繼嘉慶閒族某託銀十兩其家人不知也道光中並子母共銀三百六十兩還其子孫

昔包孝肅公尹京時民有自言以白金百兩寄我者死矣願召其子予之呂榮公聞之以爲世人喜言無好人三字者可謂自賊者矣嗚呼如景繼者非所謂好人耶豈其聞而興起歟抑終不肯負人以自欺其心者也

張紹宗道光中三次賑恤闔村錢六七百緡

張登奎李家坡人道光丙午歲饑東里李懷蔭賑恤各村登奎慨然曰我可坐視吾村饑乎遂出五百餘金賑闔村全活四百餘人

康悅來道光丙午旱荒完納西陽合里貧民逋租約費千五百餘金復出麥四百餘石賑同社四堡人全活甚眾貧民感之扁

頌其門曰惠周閭里

溫廷鸞生員端正有品工書法嘗補刊先尙書公遺集臨沒猶屬其妻岳氏善爲守藏岳氏以無子遂承夫志昇送版片邑學古書院公之士林邑侯焦賢之扁其門曰深明大義

張連瑞字輯菴候銓布理問義聲著一時邑中公事及上憲有大興作輒倡首捐貲尤篤師友誼所從師雖老家居猶歲奉脩脯不衰肆友歿有老親或少婦視其能守志皆歲給爲養凡數十年其賑饑救災雖極倉猝而籌畫備至至卹貧交久而益厚助資路遇無依婦人密使人防護其歸風雪中解衣衣故人子又予金俾營生計而身受者多不識亦未嘗自言也教子皆延名宿時論賢之

李懷蔭字澍堂廷佐孫道光丙午大饑倡捐銀萬餘兩賑八十

三原縣新志

卷六中

五

餘村甫竣而亡巡撫林則徐扁其門曰穀詒孫子

馬恆昇嘉慶二十四年賑鄉族捐麥五十餘石道光五年捐麥三十石十六年捐籽種錢一百五十緡

郝德智爲人寬厚歲荒賑饑前後出粟近二千石設義學六十餘年人有售田產者必令出質券後讓價聽其贖日業失則終貧矣鄉人以是多感德者

張連桂字月丹恩貢生孝子琪子也事母至孝母病已絕氣連桂大聲痛哭母復生又二年而卒人謂連桂哭活母與弟終身無閒言生平善教生徒凡經指授多列鬻序或登科第去

劉映蓮同從兄映莖嘉慶十八年二十年兩次完本里逋租捐銀八百餘兩賑饑散籽種共捐銀四千二百餘兩道光中捐備試卷銀三百餘兩修省城捐銀五百兩修名林橋亦捐巨款孫

樹棠庠生同治元年城防捐銀二萬五千八百兩

劉榮緒修灞橋捐銀三百兩道光十六年本縣賑濟捐銀千兩
二十七年省城賑濟捐銀千兩同弟憲之賑涇原五百餘村捐
銀三萬五百兩完本里逋租修文峯橋卹樓底水災共捐銀三
百餘兩咸豐元年修崇仁橋捐銀八百六十兩子生慧庠生咸
豐三年修縣城捐銀五百兩省城團練捐銀三千二百兩完本
里逋租銷鹽課共捐銀三百兩同治元年城防捐銀千五百兩
憲之又重修名林橋及河隄共捐銀七百餘兩修灞橋賑饑二
十七年省城賑濟兩次完本里逋租卹樓底水災修崇仁橋修
縣城省城團練共捐銀皆如榮緒數

劉映莛修吳村橋前後捐銀九百兩修崇仁橋前後捐銀二千
三百兩修灞橋捐銀六百兩完本里逋租道光二十七年賑濟

三原縣新志

卷六中

本

二十九年樓底水災共捐銀八百餘兩子慶雲咸豐三年修縣
城捐銀三百兩同治元年本堡守城捐銀三千二百兩縣辦城
防又同其叔映芭共捐銀一萬二千兩光緒丁戊大饑賑恤及
籽種又共捐銀三千七百兩

李榮基字培初諸生孝友淳雅讀書好博覽鄉前輩著述多能
舉其詞事母不忍離嘗訓蒙某氏僅半月忽夢母仆傷臂卽辭
歸母果傷臂人謂有齧指之誠待弟尤篤愛亂後以貧遠館及
歸母歿悲泣甚未幾卒學使吳扁其門

張登甲字鼎三太學生好義疎財有姻王某臨歿以家貲數千
金託寄並求教其子登甲時加訓誨至成立仍還原金一毫弗
取歲歉爲族黨完逋租邑侯余表其門

劉映菁字毓英性孝友慷慨好施尤明大義咸豐元年捐修崇

仁橋銀二千兩修堡城捐銀五千兩同治元年回變縣設同德局捐銀三千兩城防捐錢一千緡西陽陵前雲陽諸團共捐銀六七百兩本堡防守開壕製具捐銀三萬兩完逋租修渠堰捐銀二千兩亂後散給闔縣牛種捐銀二萬四千兩事聞 特詔嘉獎命陝西巡撫賞給義卹鄉鄰扁額刊行正學書數種見雜記同治十三年崇祀孝義祠

張永治有孝行十八歲失明然能忍性養量記善忘過譽弗喜毀弗怒時存濟人利物心嘗同族姪柯竭力築補堡城及遭回亂多賴全活五十七歲瞽目重明六十一歲生子七十九歲見孫八十二歲卒

潘秀雄有至性善事母母患瘵疾常置小輿令子孫前牽已後推之冬就暖日夏就清涼以寬母心如是累年母歿遭回亂率勇出城擊賊不勝死之

三原縣新志 卷六中

空

張樹科父母早世繼祖母撫養成人樹科奉如慈母祖母老失明同妻翟常侍宿孝養益至祖母年七十餘以天年終

段森事親孝每食必侍親授匙箸食畢然後食繼母胡虐遇之輒引罪母不悅其婦遂出焉又欲逐森森跪諫不聽或自移鍋釜他處森又往跪哀求母歸乃已

楊顯文未嘗讀書事孀母有至性常驅騾販運爲業每歸見母倚門望卽趨扶母至家母喜亦喜母怒則和顏勸解歿後鄉人稱其孝

郭景震同治元年縣設同德局捐銀五百兩城防捐銀一千四百兩子璽字次玉副榜築立堡寨光緒丁戌大饑賑恤籽種共捐銀二千數百兩

皆遂嘉慶元年樓底鎮火災賑錢三百六十餘緡丙寅饑又賑錢三百緡

皆象文道光甲午饑賑錢二百餘緡徐士莊道光丙午賑米八十石

王瓊馬額鎮人事母能孝正直好義爲鎮保正鄉人或市商有爭端得瓊一言立解咸敬服去道光丙午歲饑自出麥百餘石散給村眾及親友焚積券恤路困多不令人知公舉鄉飲賓年七十八卒

李英鐵匠爲生事母至孝晨昏必省問家貧無甘旨而蔬食菜羹必精潔數十年怡怡母側母老動履艱難與弟耀以椅昇母出入

農興治商州人家貧負母逃唐村行傭供母主人或遺果食衣物必懷歸奉母母或不受仍還主人興治亦勤工人愛其誠實且以孝多願興治傭以是母得養

麻汝棟汝林兄弟篤愛力勤農務出入端謹不至城市不看劇衣食悉推讓怡怡相守性鯁直不求人雖貧不厭日有命弟五十餘方完昏鄉里稱爲古人回亂同被害

子之孝親無所用其僞而人或感慕而爲之君子亦樂取焉至愚眊賤工目不識詩書爲何物矢念之真率性而行若英興治棟林之所爲有足感動人者彼衣冠富貴者流或且易而侮之獨不知其於父母兄弟何如也性善之說蓋觀於此而益信

段書銘段寶鼎皆設義塾延師教貧寒子弟段寶德爲人和厚事兄能悌析產不爭多寡鄉人稱之

張來鳳庠生壬戌城防捐銀三千二百兩馬炯貢生捐銀一千六百兩張垂紳捐銀八百兩張悅恕捐銀七百兩

李瑛字輝山道銜工部郎中善人廷佐曾孫也好吟詩嘗守先人行義家法道光二十九年樓底水災奉母劉氏命倡捐巨款拯救咸豐元年修崇仁橋捐銀萬兩同治元年城防捐銀八千六百兩三年縣立永遠局獨力捐銀三千兩其他善舉甚多光緒丁丑大饑而瑛忽亡遺命捐銀三萬五千餘兩通賑闔邑貧民左部堂扁旌其門曰行道有福事聞議敘嗣子郎中

劉昇之字東初諸生湖北候補知府映菁子光緒元年同族姪質慧捐麥千石依朱子法立推惠義倉以便其鄉三十餘村之人丁丑大荒倡捐麥穀各五百石明年散籽種又捐麥百石銀一千二百兩捐宏道書院膏火銀一千三百兩現刻朱子及諸

賢儒書多種見雜記爲澄城理學名儒張蘿谷先生立墓碑並刻其遺書

劉質慧字季昭優貢生憲之子孝友敦謹好施子樂與賢師友遊刊布諸先賢書數十卷見雜記爲 國朝關中大儒朝邑王仲復先生立墓碑捐義倉麥五百石見昇之傳自同治元年防城守堡及邑中歷次公款約捐銀數萬兩年三十二而歿士論惜之子昌復十餘齡奉其母馬氏命於光緒丁丑大饑捐銀四千五百兩又捐籽種銀二千四百兩

胡礪金字夢巖議敘道及從弟礪鋒部郎同治元年回變城防捐銀共三萬兩守備關城又捐銀三萬八百兩光緒乙亥礪金子靖諸生又同礪鋒捐義倉麥五百石丁丑賑濟靖捐麥五百石籽種銀一千三百餘兩礪鋒捐賑及籽種共銀三千六百餘

兩

李懋功字勳臣錫齡嗣子捐知府同治五年奉嗣母曾氏命重修北關城垣費銀四萬餘兩防城共捐銀二萬三千餘兩光緒乙亥捐義倉麥五百石丁丑大饑捐麥五百石又捐籽種銀一千二百兩又捐京師潘家河沿先世官京曹時住院二所計房四十餘間以爲會試舉子新館

李彭字少錢自同治初元治城及北關設立防堵製備器具以及修渠勸農籌餉各局皆奉其母傅氏命捐銀約六七千兩光緒乙亥捐義倉麥丁丑賑饑捐麥籽種捐銀悉與族孫懋功等劉賡祥諸生捐知府光緒丁丑捐賑及籽種銀二千三百兩張積善捐銀六千八百兩乙亥又捐義倉麥五百石荆廷柱五百兩武承瀚四百兩其三二百兩以下尙多不復記餘見各傳中

三原縣新志

卷六中

奇

程忠貴農人也目不識丁性慷慨仗義家貧常貸人錢或以婚葬事告輒與之多爲人排難解紛軍興差繁有車馬者多避匿忠貴每爲搜集或竟自捐支邑侯嘉之處頑兄嫂皆曲折有道收養遺子愛逾己出歿之日鄉鄰憐其孤寡爭先餽賻送葬者數百人旁觀亦爲洒涕

附吳中規七子九孫十五曾孫一元孫子鵬廩生鷹貢生鴉庠生孫迺廉迺功庠生曾孫宗徽庠生家七十餘口年八十九五世同堂

周天祥五世同居周敬道置倉贍族七世同居張應中諸生七世同居賀福祿五世同居

壽民四人

吳敬天年九十歲王福起馬某嘉慶初同赴千叟宴 御賜

金牌龍杖各物

梁津年九十九歲

恩榮壽官

方伎舊志十人存五人新增九人

按舊志載宋于元隱元白德明李志性姚永靜明劉宗道皆道士講修鍊家言或為詭異之術非所以範世型俗儒者宜勿道今削之

後五代苗光易李志精占卜之術事能預知今天授泉有苗家峪即其故居也

明張徵通志字以周精通方脈天順閒舉為太醫院醫生術屢取效尋授御醫院判

國朝陳堯道嘉績父也李志字素中幼為諸生潛心岐黃製方奇效遠近來者滿戶尤施藥濟貧困為人方正純謹凡鄉里紛

三原縣新志 卷六中

奎

難德其排解今按所著有傷寒辨證痘疹辨證二書富平李天生因篤有傳

董鳳翀張志字君靈世業儒於幼科痘疹尤為專門或遇逆難方書所不載耳目所僅見者必靜坐深思而得其故治之果效

子漢傑傳其術為河南新蔡令尤善鍾王書法今按鳳翀著有痘科經驗良方漢傑著有戴氏幼科方

新增賀應祥字長發號梅菴麟會祖也性恢奇篤於師友乾隆中應畫試 詔至京師所交皆一時知名士長洲彭蘊璪編畫

史彙傳云繪棧道圖骨格蒼古墨香居畫識云工指筆畫松尤超逸 學使吳清卿大徵題其畫云先生豪俠好義遊燕趙吳楚

如故鄉里無賴子懼不敢過其門其素行篤實嚴重如此故畫筆蒼老胎息入古酷似沈石田筆意亦如其人 本朝名畫家具此魄力者實不多觀畫以人重其畫又足以傳其人固不當作尋常藝事觀也

孫覺字序堂工繪事筆墨雄厚山水尤擅場

傅訓字巖野諸生書法秀傑不愧古人

秦永稜通醫理幼科痘疹獨有精詣得鳳翀之傳

劉鑿字文輝增生精趙文敏文衡山書法臨有道教碑刻石亦善繪事

宋大勳字易堂督憲吏書法超逸有晉人筆意

段寶瑒字聘侯諸生性瀟灑邁俗好吟詩畫筆清秀

侯振家道憲吏工書能爲擘窠大字嘗書西安隍廟坊額陶方伯亟稱之

王誥爲人直爽精痘科瘟疫尤取效

三原縣新志卷之六

知縣焦雲龍重修

邑人賀瑞麟編纂

人物志第六下

節孝 貞烈 賢淑 閨秀 貞壽
瑞應 附考

列女節孝舊志二百六十六人補一人新增九百六十八人貞烈舊志二十五人新增一百七十一人賢淑舊志十七人新增四人新增閨秀一人貞壽三人瑞應一人附考一人至 國朝則先其已旌者所以重 國典也若時代未能詳考姑且從闕有以節孝著者元三人孫氏張德妻德亡氏年二十四子世亨復早亡妻王氏年二十九世亨子忠娶劉氏生二子又逝劉年二十八皆守節不渝孫卒年八十九王年七十劉年六十七事聞 詔旌其門續文獻通考

三原縣新志 卷六下 一

明四十八人吳氏仇秉陵妻年二十六陵卒奉姑撫子誓死守

節景泰中旌谿田通志 任氏王仲禮妻年二十四夫亡子敬

甫三歲守節四十年卒年六十四 費氏張翼軫妻軫亡費年

二十五子學方四月養姑撫子守節不二成化中旌 王氏申

瑾妻太宰端毅公恕女弟敬事翁姑親操井臼瑾亡守節教子

三十年如一日兄恕為表其墓以上通志 王氏生員仇潛妻

端毅公恕長女年二十二守節八十餘卒 補 呂氏張鸞妻年

二十鸞卒撫孤尙永娶常氏亦卒姑婦同守節俱嘗艱苦呂卒

年八十三常卒年七十八常子元琛廬墓三年以節孝旌谿田

通志 梁氏尙應昌妻年十七守節教子有成 袁氏生員趙

道成妻年十七守節紡織度日卒年七十三 馬氏郝峨南妻

忠憲理女也夫亡撫孤博通女史內則史鑑諸書有近體詩百

餘首

其自嘆云寒暑推移物變遷光陰倏忽換流年難停鳥兔東西轉久識葵茹歲月緣對鏡窺形祇自嘆蒼顏皓首有

誰憐解來駒隙看今昔都作黃梁夢裏天憂子遠行云歲逢戊子大春寒作客真憐行路難暮雨愁添重渡水曉風欲過萬盤山塞南塞北心無限春去春來夢已殘傳道邊庭烽火急好尋歸計理征鞍

劉氏秦僑妻年十九

僑亡守節事姑撫子成立曾孫一鵬官藩司 王氏司馬郎來

儼然繼妻守節五十餘載人號曰女師子蒙見孝行 李氏諸

生孔有孚妻夫亡無子舅姑欲奪其志氏以死自誓事舅姑益

謹冰操五十餘年萬曆中旌 王氏秦岷妻年十九岷亡繼母

欲嫁之不從紐續自給撫兩月孤志張爲儒士萬曆中旌 張

氏段顯妻年十九而寡孝事姑撫子思明娶婦孫氏偕亡遺孫

三人氏紡織撫育苦節四十年 李氏王治甯妻年二十七守

節六十三卒子仲妻秦氏年十九守節七十二卒孫士端妻秦

氏年三十守節六十一卒三世貞操人比之張婦三節以上通

志 張氏太學生來斐然妻年十七夫亡守節五十年溫自知

三原縣新志 卷六下

志料 孔氏員太學妻年二十夫亡自縊救免撫遺孤苦節三

十五年 張氏孫世萬妻夫卒年二十紉紉自給苦節五十年

吳氏秦昂妻年未二十而寡甘貧撫孤縣令旌其門 張氏

王君賞妻夫亡絕粒數日家人敦勸乃苦志撫孤歷五十餘年

卒 劉氏秦根立妻年二十一夫亡無子撫嗣子一鶴早喪撫

遺孫養文成家又亡借孫婦馮氏撫曾孫宗儒成立壽八十三

終 王氏焦應選妻孝事舅姑夫亡年二十聞父母將有別議

齧指誓天欲自刎父母懼而止甘貧教子源溥成進士官中丞

卒年七十七萬曆中旌 秦氏李根元妻年二十二元卒自縊

數次救免乃剔一目甘貧守節教子松年領鄉薦卒年八十四

周氏郭光明妻年二十二夫亡苦節撫孤歷四十年卒 韓

氏諸生溫誥妻誥亡氏年二十五撫三孤成立苦志四十年高

歷中旌 高氏生員李大芳妻年二十五夫亡撫孤守志五十年旌 王氏楊世芳妻年二十六夫亡撫孤在陞官戶部守節五十年以上通志 崔氏郝緒妻夫亡家貧聞議婚者泣曰吾甯餓死誓不他適逾年果餓死里人爲立碑表之志料 雒氏秦甲業妻年少苦節教子四器領鄉薦天啓中旌 張氏秦鍾我妻事舅姑盡禮撫孤成立 李氏田富民妻苦節三十六年 趙氏生員袁賁鶴妻苦節三十餘年 牛氏秦一陞妻少寡家貧遺孤三嘗冬夜著鶉衣紡績指凍裂母子對泣宗黨有憐而助者卒不受撫子有成 孔氏員維甯妻茹苦教子三十六年 呂氏張忠妻少寡辛苦自持終身不易督學靳公錄其子楠爲增廣生以嘉其節 睢氏張懷琰妻夫亡翁姑俱失明氏扶病嘗藥曲盡婦道歿而禮葬人稱孝婦 周氏師策妻年十九而寡遺子尙德從溫無知學交知名士崇正中大饑自節省以活族黨卒年八十七 段氏舉人溫日知妻夫亡與妾李氏年俱二十同志守節撫遺腹子樹珍入庠 謝氏溫予知妾予知亡氏年三十懿德恪謹守節終身 馬氏舉人雒獻書妻忠憲理五世孫女年二十而寡守節四十餘年 邵氏中丞焦源清繼室咸陽人年二十一值闖變執源清及子之序繫長安獄源清死之之序得釋時之序甫三歲氏與乳媪張氏紡績撫育一十八年之序入庠氏曰汝善繼父志我將復命地下矣果於源清亡期前三日卒以上通志 仵氏李守志妻年二十一夫病篤以氏年少家貧恐不能守氏喻其意翦髮自誓及夫歿孝事孀姑時崇正十四年屢遭奇荒卒能盡禮撫子成立苦志五十六年 姚氏賀仲孔妻隆慶五年夫故時年十九苦節不渝

卒年九十四以上張志

國朝已旌者七十二人梁氏岳文魁妻年二十八夫喪長安扶櫬歸葬守志終身七十六年撫孫映斗官翰林光斗庠生順治七年旌李氏趙思敬妻年二十二敬亡痛絕復蘇遭明末兵荒親屬強之嫁乃扃戶引決救免家甚貧孝事翁姑撫子成立卒年八十旌楊氏魏麟祖妻年十八守志撫孤事舅姑以孝聞徐氏生員盧星燦妻年二十三夫亡撫遺腹子灃矢死堅守家範甚嚴灃卒成立旌楊氏劉卓然妻年二十五夫亡家貧歲歉質衣斂葬撫孤守節堅貞不二以上俱雍正三年旌王氏趙鼎臣繼妻年二十六夫亡前妻子甫成童氏二子俱襁褓教養辛勤卒皆成立旌侯氏寇良宰妻年二十七夫亡奉祖翁姑盡孝撫孤永齡授室而夭乃撫族子苦節數十年旌田

三原縣新志卷六下

四

氏張玳妻年二十一玳亡撫孤事親堅志守節以上雍正八年旌程氏生員李慎妻年二十八而寡翁姑早歿事祖翁姑盡孝教子極嚴迄能成立旌來氏王大任妻年二十四寡甘貧守志卒年七十六旌王氏顧世公妻年十八苦志守節養老存孤夫弟某夫婦早卒遺子女撫如已出以上雍正九年旌俱通志趙氏王大政妻守節五十餘年旌李氏張憐妻孫氏陳玠妻雒氏王棟妻以上乾隆四年旌焦氏劉三友妻乾隆五年旌員氏黃樹勳妻年二十二而寡祖姑黨及姑王皆孀二子襁褓氏一身支持五十六歲卒乾隆六年旌賈氏王鴻猷妻乾隆七年旌李氏秦知來妻守節四十一

年乾隆十二年旌李氏賈嗣徽妻苦節四十六年李氏張廷楨妻苦節三十七年以上乾隆十四年旌王氏李之

昇妻苦節四十一年乾隆十五年 旌 秦氏吏員申燾妻親
老子幼仰事俯育三十五年乾隆十六年 旌 留氏監生劉
嗣慶繼妻守節四十六年乾隆十七年 旌 張氏侯于鑄妻
年二十三寡姑老子甫八月康熙六十年饑饉拮据事盲姑壽
終子可久成立夫堂弟于仁八歲失怙恃貧無依氏撫之爲娶
妻 申氏王用穀妻年十八夫亡子甫五月苦節四十六年
張氏秦褒妻夫亡撫姪延祀年六十四卒以上乾隆十九年
旌 張氏李承禮妻年二十一守節卒年七十一乾隆二十年
旌 趙氏朱元洲妻年二十七寡康熙三十一年大饑翁姑
就食河南祖姑年八十同氏在家夜無燈織紵風月下子早亡
又撫其孫暨繼姑幼子兼育其姪年八十九卒 李氏楊觀繼
妻苦節五十六年以上乾隆二十一年 旌 里氏李奏池妻
苦節四十二年乾隆二十二年 旌 杜氏李采藻妻乾隆二
十四年 旌 李氏蕭漢臣繼妻年十九夫亡於蜀奉親撫孤
五十八年乾隆二十六年 旌 常氏李瑄繼妻夫亡年二十
四守節五十年乾隆二十七年 旌 鄧氏孫起棟妻苦節六
十八年乾隆二十九年 旌 王氏李漢英妻夫亡無子撫孫
爲嗣守節三十九年以上通志 王氏段明經妻奉姑以孝聞
撫孤成立守節五十餘年 姚氏孫嗣完妻孀姑幼子紡績度
日苦節五十餘年 李氏王琳妻夫亡氏年甚少絕粒屢日家
人勸以姑老乃誓志守節事衰姑盡禮艱苦三十餘年以上乾
隆三十年 旌 羅氏生員高鑑妻守節五十餘年以上劉志
崔氏監生李典繼妻年二十四寡事病姑撫弱子守志終身
賀氏張思慧妻年二十立志守節卒年五十有五 李氏張

鸞麟妻年十八夫亡無子撫從子爲嗣守節三十七年以上張志 張氏監生劉梓妻以上乾隆三十二年 旌 劉氏王公玉妻夫亡守志值歲荒艱苦不渝歷三十餘年乾隆三十四年 旌 孫氏王宣綸妻家貧紡績撫孤成立守節三十餘年乾隆三十五年 旌 唐氏趙琮妻夫亡姑病湯藥未嘗少懈撫嗣子愛逾己出守節四十餘年乾隆三十六年 旌 章氏張應鐘妻事翁姑盡禮紡績撫育嗣子守節三十餘年 劉氏段延珍妻夫亡家甚貧姑老失明子幼氏紡績支撐勞瘁終身守節四十餘年 張氏馮德昇妻善事孀姑撫孤成立 雒氏李肇甲妻事姑撫孤守節四十餘年以上乾隆三十七年 旌 李氏劉哲妻結褵一載夫亡誓死守節撫孤成立乾隆三十八年 旌 李氏程義妻事姑盡孝值歲歉糟糠不厭姑食無缺

教子有成守節三十餘年 權氏彭理妻 蘇氏李希孟妻家貧厲貞苦節四十餘年以上乾隆三十九年 旌 潘氏周堆彩妻翁姑俱老紡績以供菽水族黨逼凌忽死撫孤卒克成立 程氏劉思惠妻敬事翁姑初終不易撫子有成備嘗艱苦守節五十餘年以上乾隆四十年 旌 任氏李紹統妻孝事孀姑教子甚嚴家貧守節不二其操 楊氏李元妻夫亡守貞矢志不移屢值困窮卒能完節 楊氏生員馬典妻 來氏王宮槐妻守節二十七年卒以上乾隆四十一年 旌 張志 楊氏張緒聖妻乾隆四十二年 旌 張氏謝景煜妻年十九而寡家酷貧糟糠不給守志彌甘 伍氏生員張世需妻需亡截指誓守禮事翁姑教子有成苦節四十七年 李氏郭學智妻翁姑衰老拮据針紉孝養無虧撫遺孤辛苦艱難卒克睹其成

陳氏李汲妻事姑撫孤雖貧不渝其操 王氏李世德妻矢志守貞事翁姑以孝聞 段氏李昌年妻守節撫孤養葬舅姑皆能如禮 閻氏李承祖妻事兩世孀姑皆獲終老遺孤六齡撫之成立以上乾隆四十三年 旌 馬氏張爾懋妻事姑教子鄉黨共稱苦節乾隆四十四年 旌 焦氏趙純禮妻年十九禮亡翁姑年老氏孝事之無子撫姪作棟爲嗣夫弟純嘏夫婦早亡亦無子又撫姪作梁以嗣嘏茹荼飲冰貞操不二歷三十九年 里氏范世慶妻矢志守節茹苦不渝以上乾隆四十五年 旌俱劉志

新增八百八十二人張氏王延宗妻 張氏生員周洪綸妻以上乾隆四十九年 旌 麻氏屈作瑛妻 蒙氏劉沛妻 袁氏任秉極妻 喬氏段雲鸚妻 蓋氏郭君成妻 馬氏楊蔚

妻 劉氏梁廷禮妻以上乾隆五十年 旌 楊氏李昌泰妻 乾隆五十一年 旌 常氏李緒妻 邢氏劉士惺妻以上乾隆五十二年 旌 李氏張世德妻 劉氏張植妻 來氏韓繼聖妻 謝氏監生線士清妻以上乾隆五十三年 旌 王氏賀宗桂妻 潘氏秦世英妻 李氏張奇觀妻 王氏劉良浩妻以上乾隆五十四年 旌 馮氏馬鈿妻 秦氏監生李之萬妻 李氏秦臺寵妻以上乾隆五十五年 旌 田氏溫起皋妻 趙氏房勇基妻 梁氏生員李持中妻以上乾隆五十七年 旌 劉氏王前妻 王氏袁自英妻 徐氏劉倬妻 以上乾隆五十八年 旌 李氏段盡公妻 高氏段士衡妻 以上乾隆五十九年 旌 李氏王質妻 里氏李廷瑞妻 線氏趙鉅妻 梁氏孟崎妻 張氏吳克謙妻 張氏趙士通

妻以上乾隆六十年 旌 蓋氏郭子鳳妻 張氏李建業妻
 以上嘉慶元年 旌 魏氏余尙樸妻 任氏雷麓妻 井氏
 馮永和妻 蓋氏孫懋妻 李氏周恆妻以上嘉慶二年 旌
 傅氏岳九峯妻 劉氏趙延齡妻以上嘉慶三年 旌 王
 氏秦世潤妻 孫氏馮楷妻以上嘉慶四年 旌 李氏張毓
 秀妻 李氏劉富德妻 朱氏張善妻以上嘉慶五年 旌
 惠氏王鵬飛妻 李氏賀世英妻以上嘉慶六年 旌 李氏
 王玉壘妻 焦氏王秉規妻 陳氏胡碧田妻 程氏楊廷椿
 妻以上嘉慶七年 旌 周氏薛濟妻嘉慶八年 旌 賀氏
 監生魏碩文妻 慕氏里可宗妻 張氏王廣先妻 李氏生
 員申瓚妻 趙氏周豐彩妻以上嘉慶九年 旌 孫氏張慎
 修妻 蕭氏李士信妻以上嘉慶十年 旌 仝氏焦廷彥妻
 劉氏朱三統妻以上嘉慶十三年 旌 劉氏魏時遇妻
 段氏周元德妻以上嘉慶十四年 旌 李氏蕭永武妻 周
 氏張秉乾妻以上嘉慶十五年 旌 張氏馮昆妻 李氏生
 員王成梓妻 王氏李鐸妻 劉氏申瑜妻 馮氏生員張夢
 鶯妻 楊氏苟景妻以上嘉慶十六年 旌 秦氏趙大智妻
 王氏程大定妻以上嘉慶十七年 旌 李氏段純志妻嘉
 慶十八年 旌 車氏張良炳妻嘉慶十九年 旌 范氏分
 巡永甯道梁鴻翥繼妻 顧氏知縣李學李繼妻以上嘉慶二
 十年 旌 李氏張培基妻 張氏葛向榮妻 李氏王連妻
 以上嘉慶二十一年 旌 劉氏李元芳妻 侯氏穆世懋妻
 李氏申廷鎔妻以上嘉慶二十二年 旌 孫氏王隆基妻
 嘉慶二十三年 旌 劉氏知縣楊鵬翮妻年十九而寡子未

周歲撫之成立子亡撫孫苦節五十餘年 孔氏趙續武妻

汪氏王永伸妻 汪氏王宗訥妻 劉氏喬廷錫妻以上嘉慶

二十四年 旌 姚氏閆培因妻 姚氏馬居易妻以上嘉慶

二十五年 旌 魯氏馮恆妻 張氏楊兆鶴妻以上道光三

年 旌 呂氏相里大斌妻道光四年 旌 魏氏生員李師

曾妻 劉氏任毓懷妻 魏氏焦作鈇妻 崔氏胡肇啟妻

里氏李錚妻 張氏馬增福妻以上道光六年 旌 李氏劉

棟妻 邵氏王志忠妻以上道光七年 旌 溫氏張濤妻

齊氏知縣喬墉妻 梁氏喬墉妾以上道光八年 旌 王氏

史學伊妻 曹氏韓毓華妻 溫氏監生秦人佺妻 秦氏相

里中偉妻 張氏田子武妻以上道光九年 旌 賈氏張維

揚妻 王氏黃天桂妻 胡氏童生傅啓泰妻 張氏王懋妻

三原縣新志 卷六下 九

姚氏增生劉質妻 周氏童生劉耀祖妻以上道光十年

旌 崔氏王世忠妻 孫氏王本澈妻以上道光十一年 旌

權氏張連璧妻夫亡翁姑衰老時夫弟尙幼奉親理家既撫

嗣子夫弟喪偶遺有子女亦撫之成立苦節四十餘年後以嗣

子激貴封恭人 陶氏溫會給妻 趙氏監生劉永寅妻 史

氏劉廷佐妻 田氏劉廷柱妻 郭氏苟懷義妻以上道光十

三年 旌 李氏生員管承裕妻 徐氏劉奎妻以上道光十

四年 旌 趙氏張嶸妻 張氏劉承齡妻 孝婦胡氏党楫

妻以上道光十五年 旌 尤氏朱衣妻 汪氏武生王昌文

妻 趙氏魏作楷妻 王氏任承祖妻 門氏童生李大靄妻

以上道光十六年 旌 是年彙案請 旌奉 旨建立總坊

人尤多 王氏麟祖母高陵生員世霖女歸吾祖諱瀛年二十

四而寡時吾父僅六齡祖姑及翁姑皆篤老日勤十指卒葬三
 喪撫叔姑遺子無異所出教吾父極有法度曾祖爲吾父授書
 祖母輒從機上暗記督令覆誦麟兒時嘗抱置膝上猶口授所
 記書也年七十餘非衣裙不出閨門其嚴肅謹飭如此督學宋
 扁其門 田氏申毓芝妻 汪氏王喆妻 孔氏監生張毓攻
 妻 張氏員襄慶妻 鄧氏張鳴珂妻 傅氏李登全妻 李
 氏劉文泰妻 呂氏監生王桓李妻 同氏賈故民妻 趙氏
 廩生段炤妻 萬氏監生張衍慶妾 章氏張錕妻 馬氏張
 廷桂妻 李氏相里中倫妻 吳氏張正身妻 賀氏李昀妻
 柴氏生員李岳舉妻 呂氏孫秉俛妻 范氏相里湖妻
 邢氏景漢壽妻 戴氏寶成祿妻 賀氏劉思順妻 張氏李
 帝寵妻 王氏周壯圻妻 毛氏劉新哲妻 馮氏穆永珩妻
 李氏王以謙妻 王氏孫志禮妻 張氏監生曹梓妻 留
 氏劉興懷妻 謝氏劉興恪妻 趙氏周炯妻 王氏劉映蕙
 妻 章氏張學智妻 校氏王經福妻 吳氏鄭之楷妻 咎
 氏郝子建妻 史氏楊乃宣妻 李氏楊善學妻 袁氏薛子
 高妻 劉氏薛世寅妻 蕭氏侯璵妻 甯氏侯璋妻 石氏
 王鳳儒妻 蕭氏魏復賢妻 史氏巨秉琦妻 張氏從九侯
 士鑑妻 楊氏張量寬妻 任氏馬學孟妻 李氏張義焯妻
 朱氏張次鳳妻 吳氏慕世德妻 程氏王鵬搏妻 李氏
 王世德妻 楊氏李學倫妻 蕭氏王植楠妻 魏氏鮮懷仁
 妻 李氏梁生輝妻 康氏楊元秀妻 鄧氏王登雲妻 鎖
 氏糜廷蘭妻 屈氏王憲祖妻 羅氏郭玉妻 姚氏王泰妻
 蕭氏王隨妻 華氏劉元俊妻 權氏張銳妻 張氏王在

奎妻 吳氏李永恂妻 薛氏柴廷仁妻 李氏張慶善妻
王氏馬文熊妻 王氏章啓堃妻 魏氏李世清妻 張氏李
上林妻 張氏王俊妻 王氏薛永祥妻 俱氏王元正妻
張氏王瀄妻 常氏馮源洙妻 李氏閻義妻 李氏王涵清
妻 田氏監生李大震妻 雷氏李春和妻 姚氏張凌霄妻
潘氏王學妻 馮氏曹寬妻 李氏王漣妻 章氏張江妻
姚氏生員王僑妻 楊氏李汝庚妻 周氏崔昌騏妻 葉
氏王喜儒妻 雷氏劉秉金妻 常氏王文灼妻 李氏劉夢
實妻 劉氏王開春妻 何氏王維模妻 趙氏梁本妻 李
氏劉世清妻 王氏劉鎰妻 劉氏張守榮妻 孫氏李秉衡
妻 李氏孫長昭妻 何氏張輝祖妻 王氏李瑛妻 鄭氏
周紹武妻 段氏張象楠妻 周氏王天治妻 張氏孫士溥
妻 孫氏咎崇良妻 曹氏梁永寶妻 任氏賈世成妻 朱
氏李同文妻 趙氏張尙淵妻 蓋氏楊溶妻 王氏劉仲昀
妻 汪氏王天培妻 王氏李登龍妻 孫氏焦作鏢妻 汪
氏王朝榛妻 咎氏徐孝巍妻 汪氏王廣德妻 蕭氏范學
孔妻 王氏張宏綬妻 張氏生員史文炳妻 張氏監生李
謚妻 張氏生員馬魁妻 惠氏劉必信妻 楊氏劉嗣勳妻
馮氏王登妻 汪氏王五倫妻 范氏周萬銀妻 宋氏生
員李大觀妻 李氏生員惠澤遙妻 馬氏蓋遇春妻 蓋氏
呂世恆妻 楊氏生員吳廷瑞妻 賀氏康思成妻 相里氏
張瑩妻 愍氏張濫妻 鄧氏王成周妻 里氏李連春妻
王氏李生安妻 李氏相里書林妻 王氏秦溥仁妻 周氏
王金妻 趙氏萬世傑妻 賈氏李思恩妻 陳氏王守法妻

王氏李太灼妻 周氏趙廣益妻 張氏王德智妻 路氏
李永愔妻 崔氏吳漢英妻 盧氏劉瑄妻 王氏張桐妻
王氏李詔妻 許氏王大振妻 汪氏王悅秀妻 仇氏從九
李大霍妻 李氏孫昇妻 李氏蕭淮妻 程氏任學孝妻
李氏張可妻 張氏高建唐妻 曹氏焦穫英妻 彭氏焦穫
清妻 郝氏同吉祥妻 楊氏龐廷福妻 楊氏從九秦起妻
高氏王朝賓妻 王氏汪崇文妻 賈氏李德涪妻 孫氏
監生張鏞妻 羅氏朱應堂妻 穆氏蔡秉忠妻 同氏王登
榜妻 郝氏王咸妻 劉氏慕振妻 劉氏李珩妻 穆氏李
瑢妻 蔡氏侯永興妻 馬氏趙永蘭妻 蘇氏劉元桐妻
章氏張振民妻 劉氏焦君元妻 王氏劉韻和妻 張氏李
隸妻 李氏郝本清妻 岳氏布理問常體乾妻 黃氏周樊
妻 程氏宋憲妻 馮氏蓋占鰲妻 王氏楊承烈妻 郭氏
劉魯瞻妻 石氏李桂妻 韓氏劉時可妻 王氏賈建德妻
秦氏溫瀚妻 侯氏王燭妻 任氏監生張濟清妻 鄭氏
張三清妻 王氏黃德妻 曹氏劉生恢妻 來氏劉宋妻
姚氏尹明善妻 王氏王文成妻 賀氏王朝泰妻 里氏趙
冲旭妻 周氏段印組妻 顧氏王員妻 李氏劉永旭妻
史氏侯炎昌妻 李氏張宗洽妻 薛氏生員米建章妻 周
氏薛闇妻 武氏周選士妻 張氏李瑄妻 范氏惠若峯妻
范氏王秉復妻 王氏張永積妻 潘氏張雲懋妻 王氏
劉維藩妻 汪氏王士典妻 汪氏王朝彬妻 劉氏王克掄
妻 王氏周天柱妻 蘇氏張本茂妻 李氏高天福妻 趙
氏慕道秀妻 段氏李友煜妻 段氏張鑾妻 潘氏溫惇妻

王氏李中杰妻 魏氏監生李植梅妻 李氏舉人來淦妻
王氏溫廷選妻 李氏王珠照妻 李氏溫熙妻 張氏監
生張步青妻 袁氏陳榮妻 于氏李振宗妻 杜氏張志信
妻 王氏李翀漢妻 馬氏李沛妻 李氏王澤洲妻 馬氏
楊璨妻 李氏監生王清妻 汪氏監生王澄妻 殷氏孫芹
妻 董氏何廷泰妻 侯氏張文炳妻 孔氏王榮先妻 劉
氏張克浚妻 李氏呂永成妻 劉氏張景崙妻 劉氏李光
泰妻 汪氏王文紹妻 王氏馬榛妻 李氏王俊妻 秦氏
李大有妻 張氏馮倫妻 劉氏李凌雲妻 周氏張克相妻
朱氏王朝柱妻 李氏梁琦妻 姚氏王遵道妻 崔氏黃
存忠妻 王氏生員張堪妻 馬氏生員申兆白妻 來氏喬
輝妻 張氏王學海妻 李氏張九如妻 吳氏武生王兆鰲
妻 張氏楊秉善妻 李氏馬奎瞻妻 李氏廩生楊思誠妻
陳氏孫葵妻 里氏李萬育妻 李氏馬維善妻 劉氏申
資妻 劉氏李文酉妻 劉氏王士傑妻 畱氏劉維嚴妻
相里氏廩生劉庠妻 康氏梁彩瑚妻 侯氏張毓龍妻 李
氏侯兆熊妻 相里氏李維桂妻 周氏焦涇伯妻 馬氏黨
昱妻 李氏段煥章妻 由氏柴桂妻 任氏李鳴翼妻 朱
氏王肅妻 白氏秦淵若妻 王氏許世耀妻 段氏張祥跟
妻 史氏王勳妻 周氏孫大舉妻 張氏賈步瀛妻 馬氏
監生李含華妻 汪氏王志英妻 李氏張自顏妻 王氏李
世傳妻 曹氏李永恆妻 李氏潘廷經妻 賈氏李潘妻
張氏姜克烜妻 張氏李敕采妻 王氏李世伸妻 李氏王
州妻 孫氏張雲忠妻 李氏咎瑞妻 王氏毛世倫妻 宋

氏王君英妻 劉氏生員孫士洪妻 曹氏赤雲妻 赤氏武
生劉君用妻 劉氏張義武妻 耿氏孫秉麟妻 闕氏周禕
妻 李氏張士薰妻 麻氏張桂妻 李氏張廷輔妻 段氏
王朝理妻 李氏趙宏閻妻 段氏王良衮妻 王氏楊宏智
妻 楊氏楊恆懋妻 朱氏李明妻 汪氏王立功妻 崔氏
魏炯文妻 張氏王世昌妻 郝氏何瑛妻 李氏邵興旺妻
張氏楊茂林妻 陳氏史箴妻 李氏朱廷榭妻 張氏段
維謙妻 趙氏王蒲妻 張氏邢宣妻 王氏張凝吉妻 周
氏趙九經妻 薛氏孟先德妻 馬氏孫遇春妻 文氏王業
義妻 張氏康德印妻 劉氏王思澄妻 賈氏相里茗妻
張氏劉鋌妻 楊氏生員劉徵妻 崔氏生員趙秉禮妻 顧
氏王孟修妻 楊氏王良棟妻 王氏曹樹義妻 龐氏蓋世
泰妻 馬氏王宏澤妻 徐氏劉卓奇妻 李氏貢生馮習值
妻 雷氏杜克健妻 黃氏李又佩妻 張氏劉起元妻 汪
氏王大吉妻 馬氏魏永齡妻 張氏劉文清妻 劉氏馬君
鼐妻 房氏馬君調妻 賈氏生員高錦妻 于氏維柵妻
朱氏監生馬之建妻 雒氏馬凝安妻 張氏梁嘉穠妻 王
氏孫克勤妻 李氏劉傑妻 馬氏蓋人傑妻 呂氏孫得武
妻 張氏賈文英妻 梁氏劉夢琪妻 王氏吳憐妻 陸氏
侯忠泰妻 李氏高天祿妻 汪氏王大用妻 樊氏李兆麟
妻 王氏吳櫛妻 李氏秦登甲妻 仵氏史沔妻 張氏鄧
叢林妻 劉氏楊筭妻 王氏楊作槐妻 周氏吳桐妻 楊
氏王思泰妻 雷氏吳杰妻 邢氏袁杰妻 俱氏武宏彩妻
劉氏管廷蘭妻 賈氏馬善述妻 岳氏楊倍妻 張氏舉

人王步雲妻 張氏孫景勛妻 陳氏高恆泰妻 侯氏劉謙妻 王氏劉宗皓妻 劉氏李珏妻 曹氏張祥順妻 楊氏孫秉侗妻 朱氏吳秉相妻 杜氏吳宗姜妻 曹氏吳永貴妻 王氏焦培梧妻 賈氏件大綱妻 劉氏吳永和妻 劉氏潘鐘鯨妻 劉氏李世佛妻 李氏崔協妻 孫氏邢祿妻 趙氏生員潘仁趾妻 楊氏馮其楠妻 楊氏馮永吉妻 劉氏吳兆義妻 焦氏李嗣昌妻 徐氏馬應龍妻 李氏溫垣妻 鄭氏監生秦怵妻 邢氏王梅妻 張氏武緒妻 寇氏武越鰲妻 張氏武靖遠妻 淡氏李性沈妻 史氏宋允升妻 侯氏王成桂妻 李氏生員梁徵妻 劉氏常自伸妻 曹氏郭寬妻 王氏楊起宗妻 陳氏劉宗禮妻 田氏李伯禮妻 解氏監生劉泰安妻 張氏蓋至學妻 王氏朱述有妻 劉氏王君誠妻 劉氏彭震妻 楊氏范千祥妻 常氏董永錫妻 張氏馬沛妻以上二人道光十八年 旌 徐氏劉思學妻道光十九年 旌 王氏楊強善妻 常氏朱仕鏗妻 魏氏劉映葆妻以上道光二十年 旌 魯氏王希聖妻 沈氏張諄妾 王氏李之宓妻 朱氏王印詔妻以上道光二十二年 旌 宋氏趙五福妻 淡氏段學綸妻以上道光二十三年 旌 王氏生員李大墉繼妻 劉氏王霖妻以上道光二十四年 旌 張氏維煜妻 張氏李廷佐妾 劉氏優生李應運妻 何氏劉鏞妾以上道光二十五年 旌 孟氏生員張應福妻 耿氏魏恪妻 章氏張廷元妻以上道光二十七年 旌 陳氏劉鏞妻道光二十九年 旌 韓氏劉銳妻 孝婦李氏王兆祥妻以上道光三十年 旌 尤氏

王朝治妻娶日氏至半途夫亡奔喪守節獨居一樓數十年道光某年旌 王氏吳中常妻咸豐元年旌 郭氏王湖沂妻 王氏王如梧妻以上咸豐五年旌 王氏李瑋妻咸豐七年旌 張氏焦楹妻咸豐八年旌 劉氏高自立妻咸豐九年旌 秦氏李應西妻 申氏張鑑妻 趙氏王步蟾妻 安氏王坤妻 王氏管垣妻 章氏張殿魁妻 梁氏黃書年妻 權氏李瑛妻 郭氏張濬妻 郭氏曹一新妻 雷氏王鈍妻 崔氏秦殿甲妻 李氏王玉龍妻 趙氏崔允安妻 汪氏王士演妻 王氏侯金印妻 李氏張若敬妻 馬氏陳瀾圃妻 張氏李瀛妻 來氏仇銳妻子文煥舉人乾隆中人至是始旌 王氏吳全興妻 尙氏周運興妻 崔氏周全興妻 薛氏李頌妻 王氏劉維垣妻 薛氏周學朱妻 郝氏周學張妻 郭氏劉蘭妻 薛氏劉殿熬妻 陳氏馬誠妻 侯氏李先登妻 郝氏潘士太妻 張氏生員李煥堂妻子培根拔貢由訓導升江西長甯知縣 李氏權念智妻 賈氏李嗣昉妻 張氏廩生程墉妻 王氏侯振泰妻 王氏楊恆悅妻 王氏楊任賢妻 馬氏糜殿璋妻 姜氏劉大通妻 屈氏李天財妻 王氏屈希孟妻 陸氏屈恆祥妻 范氏伍誠祿妻 馮氏張學文妻 令狐氏趙忠立妻 武氏康學涇妻 王氏王道和妻 趙氏劉珠妻 王氏劉學敏妻 杜氏胡世春妻 張氏韓鶴齡妻 任氏張延友妻 李氏張秉蕙妻 管氏鄧榮基妻 岑氏秦思禮妻 趙氏楊步月妻 馬氏楊漣妻 余氏王灝妻 秦氏王澄妻 楊氏件作福妻 許氏楊愛妻 章氏張兆鳳妻 劉氏吳彥傳妻 張氏

王春輝妻 魚氏侯繼發妻 高氏李映川妻 王氏段延科妻 王氏張迺勳妻 雷氏張睦妻 里氏李永福妻 劉氏王義茂妻 李氏焦子有妻 寇氏王世文妻 劉氏薛生枝妻 周氏蕭森妻 王氏房士楷妻 仵氏韓大成妻 賈氏趙夢蘭妻 王氏張培元妻 張氏楊均妻 徐氏李永興妻 封氏魏維垣妻 門氏郝永義妻 楊氏張兆瀚妻 李氏楊呈鶴妻 劉氏韓又雍妻 薛氏王永來妻 汪氏王五雲妻 同治壬戌回亂投井死 王氏胡全忠妻 雷氏樊焯妻 劉氏王齋妻 盧氏王自迎妻 常氏劉多之妻 雒氏崔新泰妻 段氏惠登仁妻 武氏張伯年妻 周氏惠爲錫妻 惠氏雷昌信妻 成氏惠維權妻 屈氏惠純常妻 杜氏曹天順妻 楊氏惠銓妻 劉氏張連陞妻 李氏王繼宗妻 張氏鄭永義妻 俱氏楊克修妻 郭氏唐緒宗妻 邢氏王文興妻 任氏門福成妻 李氏門福榮妻 李氏慕智妻 張氏惠學邦妻 劉氏王霽妻 謝氏焦穫秀妻 吳氏武呈琦妻 李氏邢德科妻 王氏鄭傑妻 秦氏郝廣義妻 秦氏潘廷銓妻 郭氏梁正元妻 賀氏梁信妻 孫氏張紹祖妻 楊氏張士寬妻 王氏張洽妻 張氏王振清妻 張氏李茂妻 趙氏吳廣美妻 毛氏張偉妻 劉氏陳履鼎妻 姚氏劉丙三妻 孫氏張介妻 武氏王太典妻 仵氏武慶雲妻 成氏李席琳妻 呂氏梁邦泰妻 韓氏徐繼昶妻 侯氏王宏泰妻 王氏劉志昇妻 姚氏劉映菊妻 李氏蕭治妻 魏氏張璧妻 鄧氏魏起妻 李氏段振基妻 汪氏王先桂妻 趙氏屈君昌妻 張氏巨在陸繼妻 王氏段體

浩妻 藍氏安育妻 張氏惠登常妻 張氏毛世繪妻 里
氏李士俊妻 王氏楊大有妻 雷氏楊同城妻 張氏馬中
駟妻 萬氏馬憲妻 李氏王承業妻 曹氏白在中妻 周
氏劉尙才妻 王氏生員李應福妻 賈氏趙安基妻 郭氏
梁天代妻 王氏劉廣孝妻 任氏劉廣德妻 張氏王丕治
妻 王氏張連帥妻 申氏張連陞妻 李氏王志仁妻 萬
氏張連發妻 馮氏侯文誼妻 韓氏王永照妻 薛氏王經
妻 王氏張蕙妻 郝氏李自振妻 里氏李慶雲妻 章貞
女許字張性理性理流外女守貞事翁姑三十餘年 賈氏件
紹昌妻 劉氏趙掄妻 段氏趙作東妻 王氏曹應魁妻
楊氏趙作棟妻 馬氏賈沅妻 趙氏秦廷彥妻 吳氏王宗
堯妻 王氏周廷璽妻 梁氏張塏妻 李氏張培妻 韓氏
周緝敬妻 李氏郭登甲妻 楊氏沙景順妻 郭氏韓得祿
妻 潘氏王之屏妻 史氏韓士忠妻 汪氏王寅妻 王氏
衛紀壽妻 陳氏劉相賢妻 屈氏監生劉儀妻 劉氏管彝
舞妻 楊氏孫生萼妻 茹氏王澄妻 王氏李步輝妻 何
氏武鉦妻 常氏梁鉦妻 暢氏楊恆泰妻 張氏楊金桂妻
鄭氏楊克讓妻 王氏張棣妻 房氏吳鈿妻 張氏徐士
适妻 張氏雜瀛妻 張氏王晟烈妻 李氏趙楨妻 黃氏
田世貴妻 楊氏邢玉貴妻 張氏陳乃杠妻 王氏郝瀚妻
杜氏生員張志信胡錫爵妻 呂氏王雋妻以上咸豐十一年 旌 周
氏監生李際陞妻 殷氏監生李桂妻 李氏樊起蒙妻 李
氏梁嘉賓妻 李氏潘乃瑜妻 李氏生員侯晉三妻 李氏
楊瀚妻 楊氏從九王熙妻 盧氏李恩妻 劉氏王信妻

張氏從九相里文繼妻 蕭氏李逢成妻 崔氏生員相里哲
繼妻 孫氏賀兆麟妻 段氏從九崔煥章繼妻 劉氏李松
年妻 孫氏劉祿妻 邢氏賀麟書妻 張氏蓋夢周妻 張
氏申國相妻 高氏張大任妻 張氏郭念祖妻 周氏張珍
妻
周氏矢志守節可謂難矣然人獨稱其買異姓兒爲夫立後
以爲婦人之矯矯此不可訓莒人滅鄆春秋譏之異姓爲後
律有明禁神不歆非類民不祀非族蓋氣不屬也又何有感
通之理乎是陽若有繼而陰實絕之陳北溪字義論此甚詳
婦人固不足知此而此義不可不明於天下予故不載其事
並著是說以爲世之取異姓爲子者戒

郭氏馬學成妻 宋氏管楷妻 周氏馮文傑妻 張氏管汝

三原縣新志 卷六下 十九

秀妻 岳氏劉衍慶妻及其子萬善妻徐氏先是其姑劉奎妻
徐氏已旌稱三世守節邑令余扁其門曰節昭賢訓 李氏趙
逢渭妻 郭氏鄧萬鎰妻 楊氏石生玉妻 潘氏武善忍妻
曹氏劉映苑妻 李氏喬琳妻 孫氏王在灃妻 鄧氏王
傑妻 崔氏侯錫祺妻 王氏陳炳妻 毛氏王世泰妻 段
氏王雲慶妻 溫氏雷晟妻 范氏劉兆清妻 周氏劉大道
妻年二十七夫亡飲泣節哀事奉孀姑族某欲圖產業屢侮益
堅卒撫嗣子昌運入庠守節四十年 鄭氏劉述先妻年十八
而寡事親撫孤並撫夫弟現守節三十七年 孝婦劉氏義士
管象鼎妻以上光緒三年 旌

其未旌者一百四十四人崔氏劉衢妻年二十七夫亡守節九
十五歲無疾而終通志 王氏閻雲行繼妻十五而寡撫前妻

子如已出家貧母勸改嫁卒不聽李志 焦氏張諫陞妻嫁五月而夫出沒於蜀年十七守節事親撫遺腹子宏鰲娶婦生孫鰲尋父櫬又亡於蜀焦與媳胡鞠二孫茹苦終身焦卒年九十五胡卒年七十七通志 樊氏生員李大道妻 劉氏秦復振妻 張氏秦春榮妻子安成舉人李志 張氏劉作棟妻夫亡撫三歲遺孤兼撫前妻子無何兩子繼亡偕子婦任氏復撫孤孫苦節六十年通志 范氏康光盛妻 王氏梁弒妻 康氏任君成妻通孝經列女傳姑病割股姑歿撫其遺子與己子同 姚氏張思清妻嫁未一載夫客死孝奉翁姑織紡易食汲水荷薪曾無暇晷苦節數十年 馬氏李文開妻 馬氏秦彥亨妻夫亡子幼舅姑勸改嫁截髮自誓不櫛沐者三年卒成其志 仇氏生員員可羣妻 梁氏生員陶國棟妻 申氏張鳳翮妻以上李志 張氏申效明妻子世傑明經 魏氏王伉妻夫亡撫孤大業既長復娶兄女爲婦年二十六夫業復亡煢煢姑媳共鞠孫雛姑卒年七十婦卒年六十五 孔氏晁周鼎妻年二十七而寡撫子瑜入庠旋亡又撫孫亦入庠卒年八十有三以上通志 張氏生員李天眷繼妻 趙氏張榮祖妻夫亡撫子子亡撫孫卒克成立 李氏生員李維京妻夫亡丹陽子居女紅積數十年身赴丹陽扶柩歸葬撫從姪承祧年踰七十卒以上李志 王氏秦鄰楚妻年二十一夫亡遺孤七月撫育娶妻未幾又卒痛指藐孫謂媳曰秦氏兩世惟此一息其善撫之遂哀傷而卒年五十九通志 管氏溫溥知妻幼通內則孝經溥知宦遊卒於粵氏年二十二遺子二齡數經兵荒甘荼茹藥四十餘年 劉氏李翔鳳妻 蓋氏生員張共斗妻 袁氏

秦傅妻年二十二傅歿於外計聞勺水不入口者五日教子為

諸生苦節四十餘年 杜氏李質芳妻撫孤遊泮年八十無疾

而終 王氏秦崇初妻 盧氏冉重妻 韓氏生員李奇梓妻

夫亡無子撫姪立嗣守節五十三年 劉氏廩生秦甲佑繼妻

幼通書史于歸六載夫亡前子九歲已子一歲守節課子履值

兵荒嘗誡其子曰年荒眾人之荒學荒吾兒之荒兵亂眾人之

亂心亂吾家之亂也終年六十 孫枝蔚有秦母行擬古樂府一

知高貴女知從一而終人有賢與愚所知不一同解劉氏有

好女十七為人婦為婦夫何難入門為人母端坐受兒拜視兒

淚常有問兒何所苦兒無飢寒否二解秦氏得賢婦宗族來相

賀何由識婦賢夫子常安坐夜聞機杼聲較比琴瑟大琴瑟豈

不任婦心所愛書聲和三解書聲忽不聞但聞室中有哭聲遺

孤呱呱泣其兒旁血盡乳枯止啼無方止啼雖無方餬口計則

長環顧機與村不愁他日無衣裳四解慈巖巖巖嶺溪湯湯不

見夫子涕下浪浪婦也何所思但思魯敬姜敬姜豈不賢生兒

文伯亦可傷得師如孔子乃有家珍自吝藏五解家珍母不惜

頭上唯簪珥兵荒復海臻何以教吾子母今在天言猶在耳口

三原縣新志 卷六下 三

歲之荒憂者眾矣勿荒汝學憂在一己曰兵之亂亦有時止汝
心之亂則胡所底六解母也年六十焚香拜謝倉浪天夫子久
相待我當急歸報黃泉報曰一兒隱魚鹽一兒名高國學問夫
子有前妻相見亦得同歡然嗟乎如母所為豈不難七解甯都
魏禧傳曰嗚呼婦節之難也向矣然烈婦多顯於世而節十不
二三豈不以守節者婦人之常耶天下惟常故治反常則亂積
常可至於聖人積反常雖躑躅不足極其所至故書曰五常又
曰若有恆性而或於常之中遭其變變而不失其常雖史傳所
紀載何以過焉三原節母口劉氏年十七繼室文學秦君甲佑
六年而君病瘵又一年而卒時前子四符方九歲子四探一歲
節母艱難以教二子者三十年而後乃以壽終方君之疾也起
居扶持唯節母是依倚藥餌節母是問聞以內闔以外事皆一
覽於節母會遭寇亂兵火接歲時雖偉丈夫當此左右支吾難
矣而節母以一婦人身處其間孫枝蔚曰節母為秦氏母為父
為師為秦氏再興主為會督為秦氏禦侮之臣魏禧曰嗚呼節
母可謂能恆其德者矣天下之人不能有常而節母變而愈常
則世之以節母為奇行為古之賢人母足怪也節母子探與禧
交節母之歿探受命南行不及視含殮每道其母德則疾首痛
心終日啜涕而不能已禧哀夫孝子之志而益嘆其母之不可
無傳也探曰母知書通內則孝經大義撫兒符愛有加為娶婦
先後七人探出見妻生盡誠死盡哀幾滅性大母劉嘗與諸婦
會食獨指母謂曰汝善人天必報之以後母訓二子曰年荒眾
人之荒也學荒則吾兒之荒也兵亂眾人之亂也心亂
則吾一家之亂也魏禧曰嗚呼可以傳矣作秦節母傳 王氏

孫延祚妻端毅公七世孫女年二十延祚遊湖亡盡解其簪珥
迎櫬歸葬仰事俯育苦節四十年 李氏李長春妻長春通州
參將闖逆破關遯商山不知所終氏年二十四嚙指誓志事姑
撫子卒年七十 羅氏李鴻德繼妻隨夫寓揚州乙酉州城破
夫死氏年二十五斷髮毀面號痛劒戟中等尸負歸異鄉無依
茹苦撫孤凡二十七載 秦氏生員袁大白妻邑令旌其門
周氏常應隆妻邑令旌其門 姚氏常履公妻 李氏房映斗
妻 蓋氏監生孫枝蔭妻年二十七而寡闖賊亂抱夫主攜子
匿井中得免于卒成立 陳氏焦作鑄妻 王氏李儀鳳妻甲
申春兵亂逐氏清河崖度不能脫奮身墮崖下傷臂尋甦時年
二十四閱四年夫亡苦節撫子壽八十二 石氏袁希白繼妻
邑令旌其廬 薛氏來翼哀妻給諫大中姪女乙酉兵亂哀掖

三原縣新志 卷六下

氏匿鄰家聞兵噪甚急遂與同族來鑑三女俱投井中越日衮
火燭井中見數尸縶之出三女俱斃氏猶微息過宿少甦臂折
肋傷臥牀數載越十年衮亡氏年二十九撫二歲子苦節二十
七年卒 師氏康三接妻兵荒常并日而食苦節撫孤 牛氏
杜鶴泰妻夫亡兵荒撫育三子悉出針紉 李氏生員梁應運
妻子鑑婦劉氏姑婦皆年三十而寡皆七十五而卒兩世苦節
鑑子澍之儉於庠 李氏生員李慎妻慎亡氏方少艾毀容守
志五十餘年 李氏生員石崇極繼妻少寡或勸姑嫁婦得重
聘可養生氏泣誓曰姑勿慮貧針紉尙可爲生奉姑守貞二十
餘年會大祲與子相繼亡鄉里傷之 孫枝蔭詩曰黃鸝惟思舊
青松不畏寒女中聞有此
親戚爲長嘆只道生兒好誰言得 屈氏雜大奇妻娶三歲夫
如難廁綸瀚織手石建可同看 亡遺孤五月繼姑諷之更嫁不從逼之又
不從鞭逐之氏歸依

寡母鍼帶自給撫孤稍長令省姑姑屬其叔逐之氏憤恨成疾
卒 申氏生員牛兆麟繼妻撫前妻子瞻斗及己二子炳斗冲
斗皆入庠 劉氏生員申孔學妻 楊氏樊咸亮妻 楊氏賈
允相妻允因救父難死於流寇氏拮据養姑育遺腹子子早亡
又撫其孫藩司旌其門以上李志 何氏張斗輝妻 王氏生
員房大任繼妻撫前子世勳入庠未幾天同婦楊氏苦守孀幃
冰操不二己二子亦成立 侯氏貢生樊遂妻父觀察惲翁廷
尉咸修名門令質善事舅姑舉遺腹子殤撫姪芬爲諸生 楊
氏穆登醴妻醴任揭陽尉卒於官氏年二十四事衰翁撫遺孤
安貧守節卒年八十五 王氏張成德繼妻 雒氏李慥妻
趙氏李瑾妻 蕭氏王惟垓妻 高氏監生李思義繼妻 申
氏張古雅妻歲祲苦節教子獲遊庠以上通志 陳氏秦景運
妻 李氏秦濟世妻以上續志 李氏王繼厚妻厚卒粵東氏
事舅姑惟謹康熙己未壬申兩度饑荒備嘗辛苦子長赴粵扶
櫬歸葬氏以悲哀致疾尋卒 劉氏監生來淑沂繼妻以上通
志 來氏監生張宏緒妻續志 康氏馮瑾妻通志 張氏進
士梁士駿繼妻 陳氏秦瑁妻以上續志 楊氏監生申效祖
繼妻通志 馬氏秦卓冠通志作大用妻年十九夫亡旅邸奉姑二
十餘年養葬盡禮撫子孫曾三世卒年八十三張志 楊氏申
汝忠妻年十七夫歿蘇姑生子方彌月號泣不食翁姑慰勉乃
進水漿椎髻織紡事親養葬如禮教子有成 王氏生員申效
禹繼妻夫死流寇斷髮毀面每尸負歸事親教子苦節終身
秦氏申松妻 劉氏申廷瑞繼妻 楊氏申德齡繼妻夫歿黔
省以女紅積貲二十餘年扶柩歸葬嗣子亡又撫其孫以上續

志 梁氏張恪妻

袁仁林傳曰梁氏儒生張恪妻也與恪同年生歸四載乳女一人恪歿年二十有一恪讀書事親孝家道中落雖有兄嫂亦未舉子莫可為嗣續計者乃

泣然謂梁若年少可自為計梁泣曰慈親垂白緩死以代君養十指尚存計出此矣且兄嫂有子他日撫之自是益勤紡織針紉事佐家有無供菽水事姑與嫂和衷怡色承志惟謹歷三十餘年如一日而歲時麥飯夫靈淚未嘗不泫泫下恪歿後數年兄始有女及舉子兄卒子為兄後竟莫與延嗣梁倚姑若有以自處者姑病願以身代數月姑疾革執梁手曰吾無以報汝汝有女未字乃吾未了心也汝其卒畜之梁含淚諾終喪朝夕益艱或則微窺其意吃不為動惟與孀嫂日撫貌孤與己女及孤齟齬目中落落一嫂又下世自恪後十有五年更四喪梁子然特立當是時外家寥落無同生手足蚍蜉蟻子之援而志不少渝方且抱孤攜女形影煢煢日哭殞所旋為拮据窶窶如姑歿時已而率其故常尊盟十指用以衣食顧復孤幾不知無母且日若叔儒者不幸齋志歿矣孤不可以不學里塾某先生今時賢者其往師之吾具而修其於孤也惴惴焉惟恐無見於世而時其教誨固將以是終其身者同支兄恂憐其志以子嗣僕一人樵蘇供爨下寒鐙刀尺教二女婉婉待年張氏一門扶危繼絕身任其責歷今庚子辛丑饑饉薦臻人民播越守其艱貞視以為常初莫知其身之苦而遇之窮也里中人由是嘖嘖賢之居常語次咸嘆息以為難嗚呼士窮乃見節義婦德亦然當式微已甚次第云亡微梁也曷以家哉乃距恪亡十六七年絕而復續是眞能不死其夫矣或曰梁方三十有七烏以保其終余

三原縣新志 卷六下

齒

傳

袁氏生員温虬妻蘇州人歸虬未三年虬亡無子女獨居

二十五年嗣一子已授室又皆亡氏日啖豌豆數合飲井水一

孟饑寒切身者又二十七年卒 趙氏劉忬業妻年三十夫歿

蘇州撫遺腹子大生既長娶王氏氏年七十七卒大生亦旋卒

河南客邸王年二十三守志撫孤已守室而歿又嗣卒子撫之

兩世苦節人以爲王尤難云 梁氏王福德繼妻 王氏李瀚

繼妻 尚氏余大興妻 馬氏李景明妻 劉氏生員來賁旌

妻 韓氏衛雲鶴妻 王氏李作枋妻 周氏馬名什妻 李

氏里遴之妻 董氏李長枝妻年二十五而寡隻身操作奉姑

育子子早亡復撫孫歷五十年卒 王氏生員李潤妻 張氏

王肇元妻 王氏樊克念妻 劉氏郭蘭生妻 王氏李玉鯉

妻 李氏雷如妻 王氏張錦妻 李氏韓振基妻 董氏李元吉妻 邱氏賈叔宜妻 樊氏李麒生妻 李氏李嘉謨妻

孫氏監生來德曜妻與夫弟舉人功成妻温氏皆寡矢志冰

蘖功成無子德曜有子二曰芝曰蘭温撫蘭為嗣芝長娶劉氏

蘭娶張氏未幾温卒芝亦卒劉無子苦節二十六年卒無何蘭

又卒張年三十依孫氏撫孤孫孀居六十年八十餘終 杜氏

秦楷妻文學恆燦女通內則撫遺腹子入庠 范氏中部訓導

黃國憲繼妻 李氏劉子遠繼妻 周氏劉志名妻 張志作大名

孫氏任傑妻 楊氏馬士驥妻 賈氏來遐齡妻 王氏廩生

李世德妻 李氏馬君彥妻 劉氏馮祚妻年十九夫亡撫子

其原授室而天原妻張氏年二十五婦姑相依撫子浩浩亦授

室而天浩妻姚氏年二十二不替貞操又撫子學誠成立苦節

三世 孫氏廩生秦將妻 王氏咎悌妻 周氏高雲錦妻年

二十九寡其嫂每譖其兄逼令嫁氏父貢生恂察其志堅徙與

同居周其衣食撫子成立守節三十六年 張氏張大紀妻

王氏秦世潤妻 劉氏房璘妻 陳氏馬端徵妻 馬氏蕭銓

繼妻 趙氏李拱唐妻娶十日唐外出雲南卒不返守志六十

年 雷氏李友梅妻 鄧氏張應卿妻 房氏楊傑妻 王氏

高廷桂妻 葛氏監生孫錦妻 雒氏李維郎妻 秦氏監生

來校昂妻甫嫁三月昂客揚州久之死氏矢志守節撫從子入

庠復歿獨居作苦二十餘年 蘇氏生員張克嶷妻 王氏王

爾濟妻 馬氏王六服妻年九十卒苦節六十七年 王氏監

生仇文燦妻 賈氏生員崔維响繼妻以上張志

新增八十六人麻氏楊士篤妻夫亡無子家貧養姑性孤冷鄰

里目爲死人苦志守節五十餘年卒 劉氏張坵妻事親守節
三十四年五十九而卒邑令余旌其門 李氏生員管文治妻
年二十六夫亡辛苦撫孤矢志不受人憐恤年三十九卒 王
氏張玉金妻年十九夫亡針黹養親撫二子成立苦節四十餘
年 鄭氏姚和周妻年十九夫亡奉親撫孤卒年五十八歲
姚氏王聯妻年十八而寡遺孤尙未週歲孝養翁姑苦節撫子
三十五年而卒 石氏張思從妻夫亡遺子數歲針工度日或
勸改嫁輒怒詈之備受辛苦撫孤成人六十三歲卒 賈氏宋
兆隆妻矢志撫孤八十二歲卒守節五十三年 張氏相里元
妻年二十二夫亡守節撫孤四十六歲卒 張氏監生郭景唐
妻守節三十餘年 張氏郭景隆妻守節四十餘年 郭氏張
全智妻年二十四夫亡奉姑撫子年六十卒 段氏李桂妻夫
亡撫孤紡績自給卒年七十守節四十五年 楊氏潘鈐妻
李氏鈐子世義妻 毛氏劉大義妻年二十八夫亡茹苦撫子
或勸再嫁婉言拒之守節三十七年 陳氏生員溫楹妻年少
而寡斷指守節奉姑撫子年四十八卒 宋氏王誠愨妻年二
十夫亡在外矢志守節同治元年回亂堡人悉逃氏家貧無食
遂取蘆席自掩甘饑而死年六十八歲 徐氏馮銀絲妻夫亡
無依居母家守節數十年七十三歲而卒 賈氏趙安基妻年
十八而寡養姑守節卒年五十八歲 費氏張維妻二十六歲
夫亡撫養嗣孫守節三十八年 李氏楊文第妻夫亡氏年二
十八家貧行傭撫子回亂子遇害媳攜次子改嫁氏撫長孫辛
苦全節七十三歲卒 費氏楊兆炎妻矢志撫孤守節二十七
年 雷貞女許字徐玉林時童養徐氏玉林出外久無音耗父

母憐其少將取別嫁女知不復歸甯奉侍翁姑唯謹年二十七以疾卒 張氏夫失名樊萬德母年二十一而寡撫萬德鍼帶自給卒年六十三歲 馮氏張某妻夫失名二十而寡子冕甫七月養親撫子守節四十二年卒 武氏潘世順妻年二十九夫亡遺孤三歲家貧父促改嫁氏曰如姑老子幼何終不聽父怒不復往視氏傭工養姑二十餘年子亦成立年六十二而卒 武氏段柏年妻夫亡無子姑歿舅老孝事唯謹及終鬻產營葬六十三而卒守節三十六年 張氏楊生桂妻年十八而寡撫遺腹子成立授室丁戌連年奇荒母子餓斃守節三十三年 楊氏曹鈞妻年二十七夫亡養姑撫子紡績所積輒好施藥子士楷入武庠卒年六十有七 章氏張鈿妻夫亡奉翁姑撫二子悉出十指爲叔姪代還義倉麥五石及養葬孀母亦皆針工所積卒年六十八守節四十餘年 賀氏張可賜妻可賜買易松潘鎮十八年未歸氏紡績養姑備歷艱辛可賜卒客死氏守節三十六年七十三歲而卒 姚氏溫琚妻年二十三夫亡七十二歲卒 張氏劉大麟妻夫亡撫嗣子亦死苦節二十餘年卒 員氏吳柄妻年十七孀居守志二十餘年卒 秦氏李佩楨妻二十七歲夫亡守節三十餘年卒 楊氏張承策妻夫病危時卽面誓曰餓死情亦甘畜生事決不爲夫遂氣絕時年十八至六十歲家益窮困因勞致病卒 楊氏張必知妻十九歲守節年四十卒 李氏王體良妻年十六甫嫁夫亡或勸改適氏泣曰我命可知矣於是矢志守貞至丁戌奇荒年五十餘賑糧不足閉戶自斃 武氏相里繼善妻孝事翁姑守節三十餘年五十五歲卒 士氏管永釗妻夫亡矢志茹苦食貧撫

昌遐成立年五十六卒計守節三十五年 康氏郝德有妻夫
亡家寒織紝供子讀書入庠子出外媳亡又撫三孫教之讀書
備歷艱辛守節四十年年七十卒 李氏康克修妻年二十六
夫出西域數年亡氏撫孤養翁守節四十九年卒 張氏王廷
盛妻年十八而寡撫姪階爲嗣娶婦邵氏階亡邵年十九遺子
二歲兩世撫孤張七十一卒邵六十卒 王氏張思孝妻年二
十三夫亡遺腹數月誓生子守節終身後果生子家貧無依母
家勸之改嫁不從遂絕來往卒撫子成立年五十三而卒 王
氏張玉印妻十九夫亡苦志撫孤七十六歲卒督學扁以霜雪
不渝 王氏張萬玉妻夫歿翁姑衰老率以女紅自辦薪水撫
子成立守節四十二年卒 何氏張薛保妻孝親教子苦節四
十四年卒時六十五歲 董氏段學程妻夫歿奉祖姑及翁姑
並叔翁姑均無閒言教子成立守節二十餘年邑令余旌其門
周氏盧生蓮妻年二十三夫亡五十二歲卒 李氏周恩孝
妻年二十四夫亡六十二歲卒 王氏徐步雲妻年二十八夫
亡卒年五十四歲 王氏管機妻年二十夫亡卒年六十歲
王氏管克勤妻年二十夫亡卒年五十四歲 郝氏劉志恪妻
年十九夫亡苦節二十九年 李氏周玉順妻年二十八夫亡
卒年七十歲 張氏周應選妻二十守貞三十五歲卒 姚氏
王士貴妻年二十九夫亡撫子孫兩世八十餘卒 周氏劉欽
如妾年二十夫亡守志三十四年撫嗣子翰華入庠有詩名
張氏王景華妻年二十二夫亡撫孤孤後亦亡苦志三十餘年
卒 張氏王景信妻年二十八夫亡撫嗣子成立卒年七十餘
歲 張氏蘧忠朝妻年二十五夫亡撫姪成立四十六歲卒

蓮氏李忠妻年二十九夫亡卒年八十歲 武氏康學漢妻年
十九夫亡事姑至孝卒年七十三歲 梁氏李漢妻年二十三
夫亡傭工撫姪卒年五十七歲 趙氏李秀妻年二十五夫亡
卒年八十歲 李氏王貴集妻年二十一夫亡卒年五十餘歲
胡氏岳永文妾年二十五夫亡撫孤四十八年卒 楊氏岳
永鎰妻年三十夫亡苦志撫孤七十歲卒 秦氏岳永灝妻年
三十夫亡守志撫孤卒年四十餘歲 樊氏王世恩妻年二十
九夫亡撫孤三十五歲卒 吳氏樊永忠妻年二十夫出外無
音耗撫孤四十五歲卒 潘氏王思元妻年二十三夫亡撫孤
三十七歲卒 雷氏劉培耀妻年十九夫亡苦志撫孤年六十
卒 郝氏李大俊妻年二十五夫亡卒年五十五歲善事翁姑
賢明淑惠鄉里稱之 謝氏楊彥春妻年十九夫亡奉姑終身
四十二歲卒督學旌其門 潘氏段能得妻二十九而寡茹苦
奉親卒年五十五歲 杜氏張志全妻年十八志全貿易新疆
終無返期姑勸氏改嫁不從養親撫孤針工度日卒年七十五
歲 王氏從九楊大有妻年十九夫亡撫兄子如已出髮逆之
擾負孫逃難苦節三十六年卒 李氏王曰潼妻年二十四而
寡奉親撫孤守志三十年卒 劉氏張某妻夫亡無子撫姪興
賢爲嗣賢亡撫孫苦節五十餘年卒 王氏王培孝妻年二十
九孀居守節撫子卒年五十一歲 靳氏喬文清妻年二十四
夫亡茹苦撫孤孤殤哭之失明年餘遂卒守節八年 梁氏徐
景潛妻年二十八夫亡孝事翁姑撫孤成立後入邑庠計守節
九年卒 劉氏楊湧妻年二十九夫亡遺三子弟婦溥妻李氏
年二十溥亡於外家貧姑老二氏傭工奉養撫三子成立俱苦

節四十餘年卒

有以貞烈著者明十七人馬夏姐朝江女居東關年十四喪母子處寇至解所著裙覆面投井死巡按請旌今名所居巷曰貞節 楊氏貢生秦儒奇妻素賢孝流寇亂避母家高樓賊縱火氏抱幼女投下絕復甦匍匐入井死 劉氏段爲章妻幼貞靜嫻婦儀闖寇入城恐被辱抱幼女投井死 巢氏歸於秦夫失名闖亂泣謂其夫曰汝第攜子爲宗祀計我偕女死矣遂沈幼女井中紉衣自縊死賊至見其懸梁有欲取衣者其魁叱曰烈婦其可令裸乎去之 俱氏梁應堯妻遭流寇投井死 申氏

通志作白氏

梁銷妻流寇至北關投井死

楊氏溫樹璿妻恭毅堂

孫婦寇至投崖死 來氏三女俱明經來鑑女長貞年十九貞所祜妻次芳年十六趙耀妻季媛年十五未字貞芳方歸甯同

三原縣新志 卷六下

三

處一室寇入城俱投井死

王氏舉人梁士駿妻居北郭年十

六聞流寇來抱子投井死

某氏逸其姓陳五妻北山寇亂搶

南關強挾氏馬上氏泣墜者三賊怒連斫死

王氏趙肖先妾

夫死自縊以殉

張氏李仲玉妻玉亡京口聞訃痛悼不獨生

次日扃戶自縊死題旌

王氏武舉張汝翼妻居孤村遭山寇

剽掠汝翼與賊戰被害賊擄氏馬上哭墜者數次賊怒剗七刃

而死 李氏柴玉堂妻孀居數年遭寇被擄罵不絕口威以鋒

刃罵愈厲賊怒寸磔之以上通志

張烈女年十四居北郊東

里堡明末寇至掠女去攜之馬上奮罵躍墜者再賊知不可犯

刺殺之今李氏半畊園左卽其殉節處也

縣令崔公龍見書傳後云往讀太史公名

泯滅而不稱悲夫茲於烈女有深慨焉乾隆辛卯庠生馬錫朋聞其事於庭詢謀僉同既爲補傳竊恨闕而弗備也夫其就義在明季距康熙二年未及二紀其父何名字人與否必有可考會耆儒溫自知作三原志料何以失載康熙乙酉山陰李侯大

開志局雍正庚戌 勅修通志廣蒐人材均未之及前侯豐山張公纂述極博固於聞見而馬生何以未陳豈以余之不敏人鄉問俗來告以善者不徒託之空言故不棄余耶抑顯晦有時歷久而彰耶又聞之女生長東里堡聚族數十家無一存者獨姓以女傳耳嗚呼其族數十不啻候盡時烏忽焉一盡顧以婉婉沒世不忘詎非死有重於泰山有輕於鴻毛耶人之居此世而甘與草木同腐者何也劉志

新增國朝已 旌者百六十七人任烈女父元臣字苟四道子

品級父母早喪童養翁家年十四品級天卽欲身殉因翁姑勸慰乃矢志奉養然獨居輒淚潄潄下久之其叔父欲令改字女泣曰兒終爲苟家人耳嘉慶九年五月二十四日其叔母迎女歸復勸以叔父意女痛憤不言亦不食乘隙投井死嘉慶十四年 旌 張氏孫天扶妻夫病癰潰爛膿血淋漓氏侍湯藥躬澣濯備極勞苦三年如一日及夫歿號泣痛切以頭觸棺比葬送柩卽投墓穴以眾攔救得不死越日家人防少懈遂潛赴廚

三原縣新志

卷六下

三

投甕水死初天扶病泣語人以殉節人謂如翁姑及老母何氏

曰有叔姊兄弟在薄命人偷生何爲時年二十三道光十三年

旌 劉氏楊人滋妻夫亡葬畢墜樓死 趙氏崔祥妻年二

十七生二女夫貧蕩將賣氏及女氏知恐爲所誑誘抱女投崖

死 馮貞女字李邦俊邦俊赴西域賈亡女聞欲自盡以養姑

不果及姑歿終喪三年服毒死時年二十三以上道光十五年

旌 吳氏趙邦福妻夫亡家貧姑欲嫁之不聽歲飢姑與嫂

各就食母家因局戶七日不食自縊死咸豐十一年 旌 劉

氏王智妻年二十九弟睿妻田氏年二十一壬戌北關陷恐賊

縱火各分抱先人木主寘懷中攜姪祥臨十三歲慶臨四歲女

水仙十六歲艾姐十一歲逃匿空院賊戕二姪氏恐受污置木

主井側同二女及田氏投井死 馬氏溫文傑妻名宮雲年十

六忠憲公裔生員丕興女北關陷賊搜得氏驅迫以行至西門
氏坐地賊欲捉臂使上車乃給賊曰毋捉我臂以矛來手可挽
賊授矛氏持矛大罵自刺腹死賊退見者憐之藁葬路側閱數
月改葬顏色如故邑人楊秀芝弔以詩曰死車下胡爲者誓心
曠日知者寡甯爲車下死不爲車上生則
受辱死則榮委身白刃完吾貞血飛痛裂肝膈聲逆賊吼虜
車走橫屍塞路異身首婦死千載骨猶香漢皇甫妻同不朽
田氏劉謙吉妻聞賊陷北城其夫遇難攜子女赴水死兒婦張
氏訓導溥女聞變脫簪珥付族人急殮姑尸亦赴水死 馮氏
孫應元妻賊至夫妻沐浴更衣對縊死姪婦郭氏亦自盡 史
烈女名貞奴父聲華字於趙賊破堡恐汚投井死 宋氏李久
觀妻年八十六歲撫姪禪爲子禪遇賊被害氏投井死禪婦鄧
氏亦投井死 段烈女秦昌女年十五賊至欲掠以去其母朱
護之且罵賊賊怒殺之強挾女登車女哭詈墜車者三賊知不
可犯亦殺之 賈氏張楨妻因翁被害痛罵賊不已賊怒斷其
手足死 賈氏鄧某妻被賊強之從誑賊稍退急抱其幼女投
井死 楊氏生員宋養楨妻聞賊至攜女及姑孫氏俱投井死
葉氏王秉壬繼妻年十八壬聞賊自縊賊掠氏不肯去大罵
被殺 李烈女父名信年十六不受賊辱被害 李烈女名東
英李禮妹年十四罵賊不辱被害 雷氏范守恭妻因護母不
去賊傷其母大罵求死被賊支解 封氏安兆田妻被賊執給
以招鄰女賊縱之至鄰舍井側大罵賊賊怒擲刀擊之氏奮身
投井死時同死者安貴璋妻賈氏 康氏安貴彬妻賊至欲汚
之氏怒罵賊刺以刀被傷暈倒頃復甦賊又至誘以好語仍罵
不已賊搥殺之 相里氏楊連捷妻賊至服毒死 段氏曹元
儒妻賊至恐汚與其夫妹琴仙投河死 姚氏劉紀承妻賊欲

逼其子三元妻周氏氏堅持大罵遂並被殺時賊不殺耶穌教
村人多信之氏獨不信故至此 杜烈女虞林妹名春英年十
六罵賊不辱受重傷死 惠烈女生員普之妹因母被害赴溝
自盡 潘氏二烈女秉鈞妹長一英年十五幼玉英年十三避
地窖賊破窖欲擄以去二女大罵賊砍殺之 李氏周萬泰妻
賊欲降萬泰不從以戈刺賊賊圍殺之氏方匿草房見夫遇害
卽躍出罵賊不畏王法賊怒寸磔以死時年二十一歲 孫氏
監生吳繼瀚妻回亂避居東里武家堡遇賊大罵賊恨斷頭碎
骨以死 張烈女名戒姐千總爾照女年十八回亂從母王避
邑北關城破王匿女賊以刃挾王去王大罵賊怒將加害女突
出護母罵愈烈遂並及難時家屬生員培妻溫氏生員爾輝妻
淡氏抱子江之悉投井死聖妻劉氏焚死貢士爾熾子西之爾

三原縣新志 卷六下

三

勳子寬之俱被害死 王氏張敏時妻賊至欲脅之氏被髮毀
面罵不屈賊遂砍死 梁氏張善承妻罵賊遇害 劉氏梁學
正妻賊欲逼之火罵不屈被殺 焦氏楊小山妻年二十七遇
賊挾氏馬上罵不屈同女被害 康氏賈居順妻被賊逼投井
死 党氏武培蘭妻幼知書賊擄氏馬上哭墜者數恐以利刃
弗顧罵不絕口賊怒以矛刺死 武芳霞培鉞女年十五遇髮
逆義不受辱投井死 趙氏楊應庚妻賊入村潛避祖塋中遇
賊大罵賊刺其腹出腸挂樹去 劉氏楊輔政妻逆回破四險
堡被執不屈遂遇害 徐氏丁友鴻嫂賊陷北關其夫與翁巷
戰死之友鴻尙幼氏匿鴻牀下極力翼蔽受傷身死 趙氏李
崇妻賊至投井死 張氏陳照妻同夫避難惠家原侍夫病賊
猝至挺身護夫夫被傷因罵賊被賊分屍死 張氏李文燦妻

被賊執逼指地窖備受箠楚卒罵不止賊恚割其脣舌死 賈氏王延齡妻復焯女名芝姐年二十五夫亡守節賊至翁被執氏護救得免賊牽氏欲去出村賊他顧氏急赴祖塋觸墓石死 張氏薛均妻逆回至村擲磚擊賊賊執斷其臂復大罵又拔舌遂死 張氏侯復才妻逆回欲擄之氏罵攜三子投井死 劉金枝允義女年十六逆回薰斃其母并窖中女救未得抱母頭痛哭越日死 毛氏孫化鶯妻年二十夫亡守節遭亂遇賊被害 竇氏王夢筆妻逆回用火破溝窖氏抱子投崖墮火中死 潘氏二女父建祿回亂二女匿巖穴閒長年十五幼年十三賊搜欲劫去二女堅不屈賊怒以刀徧砍身擲溝中死 段氏潘清泰妻回亂奉姑匿巖穴賊搜姑索銀物氏護救被殺 同氏女年十六父美女避回匪潘家窖賊至女不能脫將劫去罵不已賊殺之 王氏女年十四父應選捻逆欲劫之投井死 李氏惠懷澧妻與弟懷浚妻郝氏遇捻逆劫之行二婦給言以物卽各投井死 段冬青宗謙女年十四捻逆掠女女罵賊賊不捨女奮力墮馬大罵之賊遂砍死道旁 曹氏惠承緒妻張氏惠習文妻張氏惠爲政妻寨陷皆攜兒女投溝死 蒲氏崔大明妻捻逆破寨擄婦女氏獨墮泥坑中罵賊賊曳出殺之時崔樹榮妻郝氏年十五亦不從賊去同被害 許氏崔伯龍妻寨陷投井死時崔有智二女長十四幼十二賊擄至溝邊二女攜手同投死 張氏崔廷朝妻賊至與許振興女十五歲振星妹十四歲皆被脅不從同時遇害 楊氏女父懷魁年十四捻至家人皆竄女避未及賊欲掠去以搜物女乘間投井死 郭氏梁其昌妻北關陷同姪婦郭瀚妻焦氏恐被污投井死

劉氏生員李含輝妻北關陷同兒婦喬氏孫女鳳姐長女員在
庚妻外孫渭兒淑姐俱死於火 蕭氏李本妻北關陷投火死
趙氏李棠妻與子宗昌妻秦氏投井死 李氏監生梁鳴和
妻夫亡家貧茹苦撫孤北關陷罵賊不屈死 張氏崔書誥妻
捻逆擾村罵賊死 蒙氏王清昌妻避賊高窰窰陷捻逆欲犯
之憤罵投崖死 趙氏張鳳翥妻夫亡守節三十餘年賊破窰
死之 管氏孫吉祥妻回至罵賊不屈遇害 張氏孫培萬妻
捻逆擾村逼之赴井死 馬氏李德昌妻聞捻匪至村投井死
王氏張浩妻賊傷其子氏罵之賊強載氏馬上墜馬罵更厲
持里許遂被殺 惠氏女父紹德名春姐年十四遇賊掖之行
女大罵挾以刃且加頸不懼仍罵不止賊遂殺之 張氏惠海
林妻年十八而寡無子撫姪誓事翁姑素有賢聲捻匪至村不

屈被傷死督學旌其門 王氏張朝鳳妻年二十賊悅其色爭
執之氏大罵五六賊挾之行乃被髮毀面臥地久持罵益厲賊
恨亂矛刺數十傷氣絕死 王氏張昌純妻年十九聞賊警同
張承范妻段氏投井死 王氏張堃妻夫亡守節四十餘年捻
匪至罵賊遇害 李氏王治平妻與媳孫氏高氏孫媳段氏被
賊執不屈同遇害 汪氏王道綸妻遇賊殺別婦女輒罵之亦
遇害 史氏相里文德繼妻十九而寡事姑撫前子與己子皆
成立守節四十二年回變遇賊不屈被殺 周氏相里應奎妻
家貧逆回亂同奎逃難奎猝遇賊被害氏聞痛不欲生一女僅
五歲宗黨有憐而恤之者不受及母來視已數日不舉火卽以
女託母母勸之嫁泣曰甯死不爲遂不食十餘日死時年二十
七歲 吳麻氏夫失名年五十餘回亂語人曰此何時可受辱

而生耶遂整衣焚楮服毒死 何氏張秉恭妻年二十六孀居奉姑撫子兼盡孝慈回亂遇害 李氏穆其恪妻素賢明回至開門罵曰豬賊何竟反遂被傷投井死 楊氏穆其慎妻寡居事兩世孀姑以孝聞教子亦嚴年六十聞回變氣憤成疾賊至罵之遂被害 何氏李珍妻逆回至逼氏馬上罵不屈遂支解死 劉氏李士瑩妻回亂攜子投井死 梁氏王仲洲妻罵賊死 李氏王景燭妻壬戌七月氏送夫妹嫁某村甫至家賊至家人悉竄氏與夫妹牽衣投井死 党氏周玉桂童養妻年十六擒匪至投井死時同死者李金妻劉氏李長發妻韓氏 喬氏李洲妻擒逆擄夫去氏聞忿激同子根兒投井死 楊氏女名十姐年十六擒逆至投井死 管氏周良棟妻回至大罵不屈被害 翟氏周環妻回殺其夫氏投醋甕以殉 路氏周賜妻年八十聞賊至投水死 李氏周福榮妻回至投崖死同時死者又有周維屏妻朱氏維貞妻張氏維垣妻魏氏其姓天吉妻趙氏 門氏王佩習妻回至投崖死 韓氏門建勳妻聞賊投井死 李氏賀芝靄妻擒至被繫奮力斃斷投井死 鬲氏高聚奎妻被掠奮罵賊以刀劈死 景氏韓林發妻高氏林昌妻趙氏王興元妻任氏興順妻回至同日投崖死 蘧氏張仲清妻翟氏蕭廷任妻秦氏岳永照妻張氏王思徵妻皆罵賊死 金氏李維林妻惠氏李寅兒妻賊至同被擄以計脫俱投井死 唐氏張涵妻同子生員鎔經妻盧氏女菊香罵賊不屈死 曹氏李友兒妻賊逼越牆投崖死 武氏賈承珍妻回焚其屋氏大罵死火中 李氏楊吉妻賊至逼之不從遂被殺 王氏喬文浚妻北關陷投井死 馬氏曹果妻解氏曹杰妻俱被

賊執欲脅之遂投河死 楊氏寇興禮妻聞賊投井死 蔡氏

賈希德妻賊驅之去給以入室取物遂抱幼子投井死 寇氏

馮德盈妻年十九賊欲逼之大罵不屈死以上同治四年光緒

元年歷次奏 旌 章氏張嘉祥妻年二十二祥亡無子冀夫

兄生子可嗣無何夫兄亦亡於蜀柩歸並葬氏先日哭奠祥柩

遂整衣履夜深扇戶服毒死時同治三年十二月初氏母

勸改嫁泣曰兒不為禽獸行母不悅故至死不視含殮遲三日

面如生 邑令余弔以詩云婦閨忍死已經年祖祀夫塋兩念懸

柳觀急經借鴈序竹林無復望蟬媽勉行祭奠揮雙淚 同氏潘述祖妻年十九夫亡家

貧姑憐其苦諷之嫁不聽姑歿欲殉以柩在遲年餘鬻產營葬

越二日痛哭姑位訖自經死 朱氏任經源妻嫁八月夫亡孝

事翁姑矢志守節越九年聞賊至村遂自縊死以上光緒三年

旌

其未旌者八人雷氏呂承謨繼妻年二十夫亡撫前妻子矢志

靡他父母憐其少欲嫁之不許因歸甯潛匿議娶者窺之氏弗

知也返於家其子以告氏閉戶痛哭自縊死 焦氏中丞源溥

孫女隱士之夏長女也性幽靜好聞古賢媛遺事年十七歸臨

潼舉人王天寵寵卒絕食累日而病父強之歸氏泣語曰兒奉

父教得從王郎地下足矣一夕夢王郎來迎已遂起盥櫛含笑

而殉計為婦僅一年也 李烈女馬尾村人王申大荒從親就

食漢鎮二親疫死女年十六容貌端嚴其地有市僧薄聘之曰

買妾實將鬻平康以博厚利女至家偵其情惟唾罵求死比鄰

傳其事三原之賈漢者公忿鳴官市僧陰殺之以滅口聞者哀

之 秦氏適張逸其名康熙三十一年歲大祲邑多流亡氏內

外無依一日至龍橋河北見岸土有坑可隱身遂入焉里老吳姓者遺之食不食次日復遺之則所遺固在也勸之食且問其故至再乃曰多翁德意然不可常繼但坐此土坑中冀死後不暴露耳遂餓死年才二十餘里老憐而封之 李氏皆一輪妻一輪貿易蜀中氏年二十三聞夫訃三日夜哭不絕聲自縊死以上皆通志 慕烈女中丞天顏孫女給諫見曉長女許字一等侯次子張宗禮未娶婿亡女奔喪截髮斷耳守之終身 范雙姐東楊村范友魁女許字楊執中父母以其貧改字周姓雙姐聞而隱痛絕粒數日復私飲毒皆為父母覺救之不得死乾隆九一作十五年月三日夜乘閒潛投村南潦水中家人不知也明日飲馬者見衣角浮水上驚呼拽出則已死矣時年十有六狄道詩人吳鎮作歌曰范烈女生何許乃在嵯峨之南涇川之濟天不可移爰難忤曲池水清兒心苦白蓮夜深作人語下有

三原縣新志 卷六下

鴛鴦嘯儔侶吁 嗟女兮哀千古 李氏監生劉源澄妻涇陽進士李懷莪女也

年十九夫亡撫孤至十二歲而夫本支無可嗣者氏大痛曰夫祀絕矣何以生為遂不食而死以上張志

新增四人鄭氏王貴妻貴為儒學門斗日吸洋烟氏屢苦勸不聽自縊死學師為立碑墓側 李氏潘廷桂妻苦節四十餘年

丁戌奇荒忍餓投崖死 范氏竇元有妻歲奇荒忍饑濟夫與子自甘餓斃 王氏杜孟堉妻領賑食翁與子忍餓致斃

予志吾邑列女至 國朝及壬戌之亂其節烈之多有感焉 蓋 國家二百餘年深仁厚澤其婦女亦涵濡於 聖化

最溥且久又况 兩宮太后撫育 先帝及 今上之懿 毅后身殉 惠陵之休千古未有風

聲志氣充塞感通雖閭閻閭閻早默喻於無言且前修一統

志時下教州縣吏書不得阻撓

上所欲旌嗚呼盛哉顧

讀史漢諸書所載一代列女甚屬寥寥豈非真可傳信者爲足示法後世而餘則不必具焉孫酉峰邵陽志亦謂武功朝邑二志節烈不過數人止爾自恨邵志之多若責以康韓之義無可辭者然則吾志較邵不啻倍之其於古人義法尤爲未合顧有不得不然者亦酉峰激於公義揚善之心聊備列之以俟異日省志 國史更加采擇而後之續修者或止取其尤可傳法者著於篇如史漢康韓例其可也是予之志也有以賢淑著者明一人趙氏少保温純繼妻母家世居涇陽自閣子徹三禮小學內則少保與四明相公論事不合力疏引退氏實贊之少保歿撫兩孤日知自知親督教之春秋毛詩誦聲琅琅立名振聲嚮少保掌臺端有客暮夜兼金介族子之婦氏正色拒亟叱出他日有貴家婦邀遊比邱尼門辭勿往又諭以異端不可近幼掌閨奧卽擁華胄無挽車提甕之苦而有鹿門灞陵之操韓詩撰溫夫人傳

三原縣新志

卷六下

三九

國朝十六人申氏侯達先妻御史于唐母孀居孝事翁姑歿葬以禮諸姑無家者養之子姓失怙者育之年八十卒通志 楊氏張蘭堦妻脫簪珥佐蘭堦誦讀流寇亂家計蕭條夫登賢書亡氏誓柏舟教子健成名歷二十餘年卒 王氏桂陽牧李宏樵妻事翁姑曲盡婦道夫仕宦兩地皆以舅老不願隨行定省之暇專意教子彥瑁成進士彥坳登賢書及彥瑁奉檄戒無迎養曰我往則家政廢兒能爲國爲民卽孝也大禮出彥瑁積俸佐以簪珥悉賙族黨 王氏大城知縣李松年妻幼讀書明大義隨夫之官年方二十甘荆布屏綺羅出釵釧簪珥助繕城工

大城被寇傾篋犒士城賴以全及解任歸長子死亂軍中夫傷臂折骨賴氏保全甫至家夫亡年三十三撫孤成立卒年七十
殷氏生員李寄鳳妻鳳困諸生家貧氏績紝供舅姑舅病革醫藥罔效割股作羹進食之病尋愈 呂氏生員侯一桂妻少嫻女誠夫亡教子于藩登武甲授臨清都閫軍民感之氏封恭人壽百歲無疾終以上李志 李氏王偉繼妻撫前子繼蘭及姪三人恩勤如己出與媳宋氏夜紡績教孫鉅讀書 薛氏梁涎之妻中丞薛柱斗女姑患癰氏刺臂血敷之遂愈涎之令湖富時氏置救生船立伴嬰法撫夫姪履中甫兩歲恩教踰己出及歿履中服斬衰三年 李氏梁徵之妻諸生履中母事姑吮癰嘗穢寢不解衣者數載冬日爲姑澣衣不及乾以身溫之僅一子讓嗣夫兄歲歉糜飢掩骨善繼姑志以上續志 文氏郡

三原縣新志

卷六下

四

士溫濟武子婦也濟武病啖喘呻吟牀褥者數載子宇遠遊門無三尺童婦每求米於胞叔旦夕跪進毫無怠容積勞成病以死 程氏少司農梁世勳繼妻通內則嫻禮儀佐夫敷歷中外內政肅然夫卒氏持門戶唯以禮自閑延師課子鴻翥歷官漕運總督 王氏李晉侯妻夫歿子亡育其孫乾隆二十八年歲饑氏鬻屋銀百餘兩代完焦穫里七八九甲逋賦人以爲難 雒氏李宏遠妻親黨負欠不責償乾隆十三年歲饑出貲五百餘兩十七年秋成未稔又出貲三百兩以惠鄉里所司皆上其事給嗣子李涵頂戴 雷氏馬明經妻乾隆十三年歲饑斗米銀五錢五分氏糴一十六石二斗以贍學中寒士及里之貧者 秦某少孤無依爲之養育娶妻夫婦繼卒殮葬竭貲二百餘金 姜氏生員張子裕妻中年喪夫孀居三十五年孝親睦鄰婚

喪不足者脫簪珥以助之同時有周廷佑妻馬氏夫商隴蜀有老母侍養供甘旨鄉人稱之 寇氏李春張志作和春妻夫繼母歿遺子一女二氏撫育恩勤翁稱其賢課子璵以女紅佐脩脯卒有文譽膺鄉薦以上張志

新增四人賀氏劉恩悰妻事舅姑以孝聞和姊妯娌篤姻族里中無業而貧者每歲除必給以銀米賙寡婦以全節貲孤子以贍生歲饑出粟賑恤全活甚眾里人扁其堂曰積善 吳氏生員楊秀元妻幼嫻姆訓事兩世姑皆盡孝姑歿叔幼衣履悉躬任之性儉約不事華靡好濟貧乏里中有親死不能斂者氏檢篋出衣令自取族某貧將遠賈無資脫簪珥與之某客死其家卒不償亦弗問也子士果將宦蜀氏戒曰諺云要想作好官先戒嬾殘貪常念此語吾目瞑矣識者以為氏此語與呂氏清慎勤

三原縣新志 卷六下 聖

三字箴可為暗合 范氏劉鈺妻事翁姑克盡婦道鈺以肆事遠出氏理家務井然有條待眾妾有恩義數十年無怨言眾妾常相聚語曰吾儕日侍夫人見其嚙笑不苟舉止有度治家則若網在綱馭下則若驂從勒望之莊嚴不可犯即之又和藹可親不知何術至此氏聞之曰吾自行吾素耳處妯娌獨任勞苦每謂昆弟始和終乖皆婦人有以致之吾時省懼恐蹈此轍耳貧乏孤寡必周恤之水旱之災必命子輩賑濟曰吾力所能為亦吾分所當為耳海疆捐輸氏首捐萬金為二子映菁映萼倡菁萼遂各捐萬金時惟氏家捐輸為獨優自歸劉氏四十年無期功之喪子孫林立四世一堂卒年八十有二以孫廣瀛貴封夫人 劉氏魏維屏妻鈺妻范氏女孝事孀姑姑歿殮具在視無悔相夫勤儉供塾師飲饌精潔士類稱之好施予歲荒出營

珥賑救本村

人性本善雖婦女與男子無異節烈如前尙已至賢媛則舊志有者備錄之近百年中何少也豈記載無存故不可考歟抑皆內行之常非節烈卓卓在人耳目間或略而不傳歟又多宦家巨族富顯者易於表揚而貧賤者不免湮沒歟正學不明人心陷溺閨庭之間尤無法守君子所以刑家者固宜身作之則而陰教不彰濡染益深彼薄俗何以風焉此予所以慨也

有以閨秀著者一人路浚波字秋湄生長會甯隨父路綽公別駕任所慧質天授好吟咏適生員郭抱一永安寓居三原永安能詩浚波時相唱和如良友切劘既永安貧甚浚波典衣賣釵孝事高堂絕無怨悔生子振希聰明絕倫年十三入庠十六而

三原縣新志 卷六下

聖

殤有哭子編老益窮困偃僂惟教授生徒度日而已所著有剪紅詩草

有以貞壽著者三人范氏八品軍功侯繼先妻年一百四歲

恩賞銀段

勅旌貞壽之門

王氏李文燿妻年一百八

歲 黎氏王泰母年一百六歲子二孫三曾孫五元孫一五世同堂泰現年八十二歲邑令庾命紳士親饋酒肉米布

有以瑞應著者一人穆氏武世友妻喬和堡人道光二十九年閏四月二十二日一產三男奏 聞賜米五石布十疋

附考一人唐太宗文德順聖皇后長孫氏

按后本非縣人今依李志附存之以備考而並載張公之辨

於後庶幾後人有所折衷云

張象魏曰前志以長孫里而存疑夫地名變遷今古不常今人

莫不以邠州爲古豳國甘泉縣爲古甘泉宮考之史冊則在今三水甘泉在今清化不得以命名而沒其實也宋敏求

長安志永康陵在大淡村獻陵在縣龍池鄉崇陵在縣化青
村端陵在縣神泉鄉此皆唐時地名今有能指其地者乎考
端毅舊志宋元以上分一十二鄉管一百三十四村並未分
里亦無長孫之名洪武初改十二鄉為四鄉始分二十八里
乃有長孫之名未詳取意他如武官留官大忠等里亦莫悉
其所指矣其云遺蹟甚多因於古蹟門載有牧樓濯髮美人
渠萬善寺洗馬池等名不惟今無遺址可尋即端毅谿田均
屬邑人端毅舊志谿田通志均無此說且既云賢后而稱其
渠曰美人褻孰甚焉又云咎如思謂后先豫人後或徙斯夫
唐以西安為西都洛陽為東都風景繁盛帝與后時所往來
不應復徙於此雜昂萬善寺碑謂今之樓底人傳為長孫皇
后膏沐所詩云豈無膏沐傳曰膏所以澤髮者沐滌首去垢
也此宮闈之常不必別有所謂后兄无忌齋沐之地夫
齋戒沐浴朝祭所有事魯隱公齋於社圃秦漢以來皆有齋
宮不至遠至三原也惟漢律五日一沐唐制十日一沐
言休息而洗沐也以爲无忌沐之地於理爲近再考唐書
后其先魏拓跋氏後爲宗室長因號長孫蓋即古者諸侯不
敢祖天子大夫不敢祖諸侯之義如魯三家皆姬姓也不敢
與莊公爲伯仲故以孟仲叔季爲氏孟長也又不敢自以爲
長而曰仲孫猶今人所謂第幾房也后之氏長孫以此魏都
洛陽及其亡也宗室因之著籍焉史册昭然理所必至故馬
谿田馮少墟賈中丞勅修通志端毅邑舊志均未之載又
按太平御覽后長安人隋右驍衛將軍晟之女也晟爲長孫
覽從子隋書云洛陽人贊曰長孫氏爰自代陰來儀京洛代

三原縣新志 卷六下

陰者雲中以北元魏之所發跡洛陽唐東京也云長安人者
晟官長安猶鄠邑大夫之稱鄠人也去簡錄云其先出獻文
帝世襲大夫之號爲
宗室長賜姓長孫氏

三原縣新志卷之六下終